

ASO LUA, 18 IUNI 2019

Na tauaofia le Fonotaga a le Fono Aoao Faitulafono i le itula e 9:10 i le taeao e tusa ai ma Polokalame o Fonotaga a le Palemene 2019/2020.

Tatalo.

FOFOGA FETALAI: Ou te faasilasila atu ua toe amatalia nei Tualumaga ma Galuega a le Fono Aoao Faitulafono. Avea ia lenei avanoa ou te faatalofa atu ai ma le agaga faaaloalo i le paia i lau Afioga i le Palemia aemaise o le mamalu o le Kapeneta, ae faapea foi le paia maualuga i Minisita Lagolago ma le paia o lenei Palemene, i Afioga i Taitaifono ae faapea foi sui usufono o Komiti taitasi a le Palemene, aemaise foi Ofisa Sili o Pulega o Matagaluega ma Faalapotopotoga a le Malo ua mafai ona tatou afaatasi e molimauina la tatou galuega ma le fonotaga i lenei taeao.

E faapea foi ona ou faatalofa atu i le paia maualuga o Samoa ua potopoto, ua faapena ona tatou faatasi e molimauina galuega a le Palemene i lenei taeao fou.

Mo le silafia e le Maota, ua nofoia nei le nofoaga mo tagata lautele e sui auai o le polokalame faalauiloa lona lua a le Palemene mo Tagata Lautele 2019, o se vaega faaauau o polokalame faalauiloa e aoaoina ai ma faailoa atu ai ana matafaioi patino aemaise o matafaioi a sui usufono ma Komiti Faa-Palemene. O sui auai o lenei polokalame ua filifilia mai ai Sui o le Malo ma Sui Tamaitai o nuu mai afioaga uma i Salafai, o se vaega o la latou polokalame ua mafai ona auai mai ai ma mataituina ma molimauina tualumaga ma galuega a le Fono Aoao Faitulafono i lenei taeao.

Ia avea ia lou leo faatauvaa e fai ma sui o le Palemene e faatalofa atu ai ma faafeiloai aloaia atu ai i lo outou mamalu maualuga, o le tatalo ia agalelei le Atua i tualumaga uma o la outou polokalame i lenei aso.

“TUSI FAAMAONIA O LE FILIFILIA

TUSA AI ma aiaiga o le Fuaiupu 84(2) o le Tulafono o Faiga Palota 2019, o **A’U, TUIMALEALI’IFANO VA’ALETOA SUALAUVI II**, Ao o le Malo, ua tautuina atu ai nei le Tusi Faamaonia o le Filifilia o le ua taua le Suafa i inei e avea ma Sui Usufono o le Palemene o le Malo Tutoatasi o Samoa.

NAMULAUULU LEOTA Sami Leota

18 IUNI 2019

Faatautoina o le Sui Usufono mo Faasaleleaga Nu.2

TU'UINA ATU i lou nei lima i Vailele i lenei aso, 25 o Mati 2019.

Tuimaleali'ifano Va'aletoa Sualauvi II

AO O LE MALO

FAATAUTOINA O LE SUI USUFONO MO FAASALELEAGA NU.2

FOFOGA FETALAI: A o le i afio mai le sui usufono o le Palemene i luma o le Laulau mo le Tautoga, ou te valaau atu i le sui usufono ina ia tulai a o ou faitauina le Tulafono Laitiiti o Amio Tualoa Faa-Palemene.

Tulai mai lau Afioga i le sui usufono.

TULAFONO LAITIITI O AMIO TAUALOA FAA-PALEMENE

FAAMATALAGA O FAAMOEMOEGA:

O le matafaioi patino a sui usufono uma o le Palemene o le tausisia lea o tulaga aupito i sili ona maualuga o uiga tualoa, e puipuia ma faatumauiina ai le mamalu o le Palemene ma faia ai taumafaiga uma e faatumauiina ai aiaiga autu o le Faavae.

O aiaiga autu ua taua ua faamoemoe e tuuina atu ai ni taiala, ma ni tulaga i sui usufono taitasi o le Palemene, e tataua ona faatino ai o latou tiute ma matafaioi i se tulaga tutoatasi po o le aotelega.

O AIAIGA AUTU

(1) **Faamaoni i le atunuu ma ona tagata.**

O sui usufono uma e tataua ona tausisia mataupu o le Tautoga o le Loto Faamaoni i taimi uma ma tausisia le mamalu ma le aloaia o le Malo Tutoatasi o Samoa ma ana faalapotopotoga ma ona tagata.

(2) **Faaaloalo i Tulafono**

E tataua i sui usufono uma ona tausisia tulafono o Samoa ma puipuia aiaiga autu o lo o i totonu o le Faavae.

18 IUNI 2019

Faatautoina o le Sui Usufono mo Faasaleleaga Nu.2

(3) Faaaloalo i Tagata uma

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, o le le faaituau aemaise le amiotonu i taimi uma.

(4) Faatinoga Lelei o Pule

E tatau i sui usufono uma ona:

(a) Faatulaga a latou mataupu totino;

(b) Faaaoga so o se faamatalaga ma faamatalaga uma na maua mai i o latou tofi faale-malo; ma

(c) Faatinoina o so o se malosi po o pule na maua i o latou tofi faalemalo.

Mo na o le lelei o tagata lautele ma pe afai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le sui usufono lava ia, tupe faaetulafono po o se aia a le sui usufono e tatau ona manaomia e faasilasilaina atu a le faia o so o se laasaga e aveeseina ai se feteenaiga po o le le auai atu i lena feutagaiga tau pisinisi.

Manaoga Faapitoa mo Minisita ma isi Tagata o lo o Umia Tofi Faale-Malo

O sui usufono uma o lo o umia tofi faa-Palemene o so o se ituaiga ua manaomia e usitaia atoatoa aiaiga autu e pei ona faamatalaina i luga ma e le tatau, i lalo o so o se tulaga ona faia so o se faaiuga po o le tuuina atu o se malosi o so o se ituaiga, po o le a lava, e tusa ai ma le mataupu o le a maua ai e le sui usufono so o se faaopoopoga i ana meatotino po o se faamanuiaga.

FAASALAGA

O le soloia o lenei Tulafono laitiiti o le a ono tagofia e le Komiti o Tulaga Aloaia ma Amio Tauloa po o le pei ona o le a fuafuaina e le Palemene.

FOFOGA FETALAI: Mo le faatinoina o le Tautoga, ou te valaau atu i le sui usufono mamalu mo Faasaleleaga Nu.2 ina ia afio mai i le Laulau mo le faatinoina o lana Tautoga.

Ia faitau le Tautoga ma taʻu lou suafa.

18 IUNI 2019

TAUTOGA O LE LOTO FAAMAONI

õO AU O í í í í í í í í í í í í í í í í , ou te tauto i le Atua e Ona le Malosi uma lava, o le a ou faamaoni ma tauaveina tonu le loto faamaoni i le Malo Tutoatasi o Samoa, ma o le a ou faataunuuina ma le tataui ai ma le faamaoni ou tiute e avea ai o se sui usufono o le Palemene o Samoa. Ia fesoasoani mai le Atua ia te aõ.

MALELEGA MAI LE O LE AO O LE MALO

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoaofaaitulafono na te iloiloia ai le Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Tulafono o le Faasologa o Tiute 2019.

TUUIINA ATU i lou nei Lima i lenei aso 17 o Iuni 2019.

Tuimalealiifano Vaaletoa Sualauvi II
O LE AO O LE MALO”

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofaaitulafono mo le iloiloia o Tulafono Tau Faaofi ua faaaliga iinei:

1. Tulafono Tau Faaofi o Teuteuga Eseese i Tulafono (Faasoaina o Matafaiou Tauave i Minisita) 2019.
2. Tulafono Tau Faaofi o Teuteuga o le Tulafono o Auupega 2019.
3. Tulafono Tau Faaofi o Teuteuga o le Tulafono o le Komisi o le Toefuataiga o Tulafono 2019.

18 IUNI 2019

Faaaliga mai le Taitai o le Maota

TUUINA ATU i lenei aso 17 o Iuni i le tausaga 2019.

Hon TUILAEPA Dr. Sailele Malielegaoi
TAITAI O LE MAOTA

FAAALIGA MAI LE TAITAI O LE MAOTA

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofa o le Iloiloina o Tulafono Tau Faaofa ua taua i lona **Tulaga Faanatinati.**

1. Tulafono Tau Faaofa o Teuteuga Eeseese i Tulafono (Faasoaina o Matafaioi Tauave i Minisita) 2019.
2. Tulafono Tau Faaofa o Teuteuga o le Tulafono o Auupega 2019.
3. Tulafono Tau Faaofa o Teuteuga o le Tulafono o le Faasologa o Tiute 2019.
4. Tulafono Tau Faaofa o Teuteuga o le Tulafono o le Komisi o le Toefuataiga o Tulafono 2019.

TUUINA ATU i lenei aso 17 o Iuni i le tausaga 2019.

Hon TUILAEPA Dr. Sailele Malielegaoi.
TAITAI O LE MAOTA

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono, e tusa ai ma T.T.49(2).

1. P.P.2019/2020 Nu.69, Pepa mo le Palemene mo le Faamaoniga o Iloiloga o Feagaiga Faava o Malo i le Fono Aoaofa o le Iloiloina.

18 IUNI 2019

Tuuina atu o Lipoti a Komiti Faa-Palemene

2. P.P.2019/2020 Nu.70, Lipoti a le Komisi o le Toefuataiga o Tulafono a Samoa i le Iloiloga pe Faamata e Talafeagai le Faatulafonoina o le Fefaasoaiga o Faamatalaga i le Va o Matagaluega ma Faalapotopotoga a le Malo ó Lipoti Faaiu 24/18.
3. P.P.2019/2020 Nu.71, Lipoti Faaletausaga Ofisa o le Failautusi Fono Aoao Faitulafono 2016/2017.

TUUINA ATU O LIPOTI A KOMITI FAA-PALEMENE

Na tolaulauina e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.52(5).

1. P.P.2019/2020 Nu.72, Lipoti a le Komiti o Tupe Maua ma Tupe Totogi i le P.P.2019/2020 Nu.21, Tala Faatatau Lona Lua o Tupe Faaopoopo 2018/2019.
2. P.P.2019/2020 Nu.73, Lipoti a le Komiti o Tupe Maua ma Tupe Totogi i le P.P.2019/2020 Nu.22, Tala Faatatau Autu o Tupe Faatatauina 2019/2020.
3. P.P.2019/2020 Nu.74, Lipoti a le Komiti o le Vaega tau le Tamaoaiga i le P.P.2018/2019 Nu.138, Lipoti Faaletausaga a le Matagaluega o Pisinisi, Alamanuia ma Leipa 2017/2018.
4. P.P.2019/2020 Nu.75, Lipoti a le Komiti o le Vaega o Atinae Eseese i le P.P.2018/2019 Nu.53, Lipoti Faaletausaga a le Faalapotopotoga o le Malosi Faa-Eletise 2016/2017.
5. P.P.2019/2020 Nu.76, Lipoti a le Komiti o le Vaega o Atinae Eseese i le P.P.2018/2019 Nu.59, Lipoti Faaletausaga a le Faalapotopotoga o Vaa a Samoa 2016/2017.

TULAFONO TAU FAAOFI O LE FAATATAUINA O TUPE FAAOPOOPO (NU.2) 2018/2019 & TULAFONO TAU FAAOFI O LE FAATATAUINA O TUPE 2019/2020 – felafolafoaiga i luga o le faitauga faalua

FOFOGA FETALAI: E tusa ai ma le Tulafono Tumau 133 o le a faaaau felafolafoaiga i Tulafono Tau Faaofi nei e lua e pei ona valaauina ma e tataua ona saunoa sao lava i Tulaga Tau Tupe ma le Tamaoaiga o Samoa faapea Faiga Faavae tau Tupe a le Malo.

Ia, ma o le avanoa foi lenei ua tuuina atu i le paia o le Palemene mo saunoaga faalauaitetele i luga o le faitauga faalua o Tulafono Tau Faaofi e pei ona taua. Ia, ou te tapa sui usufono e amata ona tulai mai e saunoa e tusa ai o la tatou Tulafono o le Tala Autu ma le Tala Faaopoopo o le Tupe.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ia, e faatalofa atu i lau Susuga i le sui usufono mamalu mo Faasaleleaga Nu.2, o lea ua e tulai mai e tamua foi aua tulaga o le tatou galuega. Malo faafetai, e manatu i le tapuaiga a le itumalo aemaise foi o le matauina ma le agaga faaaloalo o lo o faapena ona faatasi mai sui usufono o le itumalo, e tapuaia le faatautoga o lau Afioga i le sui usufono mamalu aemaise o lau uluai saunoaga lea i totonu o le Palemene, e avea ai lau Afioga e avea o se sui usufono mamalu o le Palemene.

Ia, tulai maia lau Afioga i le sui usufono mamalu lau fetalaiga Namulauulu.

LAUGA FAATAUPOU

Tofa NAMULAUULU LEOTA SAMI LEOTA (Faasaleleaga Nu.2): Lau Afioga i le Fofoga Fetalai, o lea ua talatuu le tafaoga i le tofa tatala ua ou uia ai foi lenei avanoa faaauuro, se i faailo ai se lagona o lenei itumalo vaeatu le vaatele i le Fonousu a le Palemene o Samoa, ae tainane le tapuaiga mamala a si o tatou atunuu. O le tala e fai i le atu Fagaloa, òOu te tu i Fao ae ou te fia laa i Malata, se i apo ane le ua ina ia sopo le soifua o le alii o le atu ò ae paga lava lea, e manao i le ufi ae fefe i le papa. E momoo foi i le lupe ae fefe i le gata. O le ala lea o le ui a uta o se leo o lenei itumalo, se i muai togi le aute i fanua ma faalanu le tapui e faigata lo tatou taeao ua sooula ma aso ua laei mamalu. E faafualalafa ai se leo ma le faaaloalo e faapea, tulou, tulou, tulouna lava.

Tulouna le malae i Tiafau o le afeafe o le faamanusina a Aiga ma a latou Tama, a o le tupua na tu malo ai le ati fetalai ma le faasau ma ta i matagi aua le usoga a Pule ma Tumua, Ituau ma Alataua, Aiga i le Tai ma le Vaa o Fonoti. Tulouna le malae i Tiafau o le malae na osi ai le feagaiga a Samoa ma le Atua o le faavavau, e ala i le galuega mana a le vaa folafola o le Talalelei na o latou lalase le povalea, ae faavae ai nei i le Atua Samoa, e pei ona togia e outou tuua ma o tatou matua. A lea ua pa ai nei le male ae maota lele ae maeva ai Samoa uma i le laulai o le alofa matalasi o le tatou Tapaau mai le lagi.

E muamua ona ou faatalofa atu aua le nofo tapuai a Lana Afioga Mamalu O Le Ao o le Malo, a o sootaualo foi o lau Afioga i le Sui o le Fono a Sui Tofia. Ua paia sautuaafe le malae i Tiafau aua o lea ua aina le falalafa i le tofa faalele, lau Afioga i le Palemia ma le Aiga Kapeneta, ua nofoia foi Nofoa o le tofa faatonutonufolau i lau Afioga i le Fofoga Fetalai o le Maota, lele foi ua atoa le atuao o le saofaiga i pou faifaia o sui usufono o le Palemene o Samoa. A, e le galo le tapuaiga mou, a lau Afioga i le Sui Faamasino Sili ma le Ofisa o Faamasinoga.

E manatua foi le la itu o le vai, le paia maualuga i le Faleagafulu ma le Manuatele aua le susu o Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu Saelua, tainane le nofo a Maopu, le afio o le Laau na Amotasi, Alii Faatui ma le Auvaa o Tootoo ma upu ia te Oe Manuatele.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E faatalofa atu foi i le afifio o le Kovana Sili ma le Kovana Lutena, afio lau Afioga i le Peresetene o le Maota maualuga, le Fofoga Fetalai o le maota o sui ma le tafatolu o faigamalo a Tutuila ma Manua, ae matua lava le tuu i le faanonogamanu i Auauna o le Talalelei o lo o talafaaauto i itu e fia o Samoa ona o lo latou valaauina. Faamalo le soifua laulelei.

Ou te manatu lau Afioga i le Fofoga Fetalai, o Samoa mamala na, taalolo laia paia le oia ma mamalu faalanugata aua a satia outou paia Samoa e, ona tavelo lea o tao o toa o Samoa i le vateatea ae faaifoifo i malae uma, e afua mai i le matasaua seia gagaifo le la i le fafa o saualii. E mafua aisea lea mea? Aua foi e leai se vave e leai se matuaofaiva faafialima maea na te toe uluulu matalauina le maota o Samoa, ua maea ona atofuli e o tatou tuua ma o tatou matua, taalolo ia.

Lau Afioga i le Fofoga Fetalai, o le viiga ma le faafetai i le Atua e faavae ai Samoa e le faaitiitia i ituaso faapenei. E maualuga le talitonuga, o lou tulai atu i le aso i luma o lenei maota mamalu, ona o lana valaauina ia te au. Faafetai le Atua i au meaalofa e ala i lenei tofiga. O lau tatalo faatauanau, ia e fesoasoani mai ia te au i le faatinoina o lenei auaunaga, ma ia aua, aua lava nei i a te i matou, foi pea le viiga ia te Oe le Atua.

Avea ia lenei avanoa maualuga e mauala atu ai se leo o le auauna e momoli atu ai mai le taele o lou agaga lau faafetai tele ma lau faamalo i le paia ma le mamalu o si ou itumalo. Tulouna le malae i Mataniufeagaimaleata, o le malae na sunui ai le alafale o le Atua, o le malae na pulafia ai le lagi o Samoa ma fultua ai tupu o Samoa i faanuupo ae liliu ane e tapuai le Atua ma le Malo e faavavau.

O Mataniu e susu ai le Aiga Sa Malietoa ma ona paepae e fia, e susu ai le alaafaga i Usoalii ae alaalatai ai Mago ma i laua Luasiufanua, faapea le nofo a ituaiga ia te oe Sapapalii. Talofa e, o le a ea se upu o le a fai atu? E moni ai tala a le atunuu, ðE le tauiloina le asa a le Tupu.ö A lele ua silasila ma fita faafofoga Samoa e ala i le tofa sailimalo, e pei o upu i alii saafiafi, se ua ta uu se ua ta pani, se ua ta moe i le va o tamaitai.øFaamalo faafetai. O lea ua tasi mai Saua ae faalua i Matautunaaai.

E faatulou atu i le malae i Fuifatu, e fofola le fala e tasi e susu ai Sua o le tupu na tausí, tootoo o Fuifatu ma Faasaleleaga. Tulouna Fuifatu o le malae o le soaiga tao o le usoga a Puleono i Salafai, ae o le toaiga o le faaalataua a Tumua. O le malae e afio ai lau Afioga Leilua Peaalii ma lo outou aiga Sa Leilua, e afifio ai le Toalima o Alii, e afifio ai Sa Alaalatoa, e susu ai Alo o Malietoa ma le Matua, ae alaalatai ai laua na pule, Tuilagi ma Namulauulu, alaalatai ai Maopu Tufuga ma le na aimalae, le lautinalaulelei, le vainalepa ma le mamalu ia te oe Safotulafai.

Faafetai i la outou tofa o le laau taia e le oia e matagi, e a? Ou te malu ai, o le susuga pau, o le maa faafuagalua, malo faafetai, malo faaeaea. Faafetai sailimalo i lo tatou Aiga Sa Namulauulu i ona fuaifale e fia, i lau Fetalaiiga Tuilagi ma le fuaiala, faafetai Maopu Tufuga ma le mamalu ia te oe Safotulafai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O saafiafiga a le tupu o Tavita ia Ionatana, oSa sili foi lou alofa ia te au na i lo le alofa o fafine, o ua faapena lagona tutupu ae lou nuu e. Se ua malepe le fale o le agaga i la outou puleto ma lo outou alofa molipo i le tagata na fanau i lou manava, se i tulou. Faafetai.

Le afifio o le fuaifale na toese o Salevalasi, lau Fetalai Fuga ma le mamalu ia Safotulafai, lo tatou nuu i Tapueleele, malo le toa, malo le tau. O le moli i le tuugalamepa ma le aai e tu i le mauga, e le mafai lava ona lilo. A lea ua ila le ai pei o le faiva o matematega, malo faafetai, faafetai le tauatai.

Le paia e o faletua ma tausi, saoa ma tamaitai, le malosi o le tatou nuu ma i latou uma na taupeau mamao mai mai itu e fia o Samoa, e le gata iinei a o atunuu mamao, ona o lo outou sailimalo. Se ua malo le alofa, faafetai le lotonuu. Lau susuga i le Tooa na Lua, lau Afioga Tuitogamatoe, lau susuga Tata ma Tei, malo faafetai. Afai o le pae ma le auli lo outou faalupega tina, o outou aao, o auupega e tau ai le taua, a o gaugatao lava e fasi ai au. O la outou tuualalo o le fesoasoani sili lea i taimi o puapuaga ma le le mautonu, o outou aao e malu ai le pitolaau a alii ma faipule. Faamalo faafetai.

E le faagaloina foi i le agaga le faafetai i tamalii ma failauga o le tatou itumalo, o nai ou uso vaeatu outou sa, sa matou tausinio i le faiga palota. Lau Susuga Papaliitele Taeu Masipau, lau Tofa Maileiomalo Eneliko Pau ma lau Tofa Lemai Faioso Sione, sa ofoina mai lo outou soifua e fia tautua i lo tatou itumalo e ala i le faiga filifiliga. Ou te manatu o lenei ua tumatila finagalo o le tatou itumalo, ma ua agai mai ia te au. O lau tatalo, tatou galulue faatasi aua se tatou sao mo Samoa ma ona upufai. O le mea moni, e le tu faamauga foi se tasi na valaauina, e faiaso pea le Atua.

E le uma le agaga faafetai lau Afioga i le Fofoga Fetalai, i le Afioga ia Pau Sefo Pau, sa ia alagaina le galu ma sisi le atu o le taeao aua le tofi o le tatou itumalo. Talofa e, e ui lava ina ua tuua le Malo, ae o lo o mulimuli pea ia te ia galuega lelei sa ia faatinoina. Ou te tatalo i le Atua ia maua sou malosi e faaauuina ai ia galuega lelei. Tau ia ina ia alofagia pea e le Atua, ia maua pea le faamafanafanaga ma le lototele, lona filemu i lau afioga i le faletua ma le nofo a alo ma le aiga faanoanoa.

E faapitoaugafa lau faafetai tele i nai ou tama faaleagaga, i le nofo a faafeagaiga ma outou faletua e le gata i totonu o si ou itumalo, a o tafa e fia o Samoa ma le lalolagi atoa. Se ua tafe tino i vai i le mana o a outou talosaga, ua leai se mala e afe e toia ai lo tatou faamoemoe, e le mafai le mafai e se upu molemole ona faalanuina la outou galuega fita. O le tatalo, ia faamanaina pea e le Agaga Paia la outou tofa faale-Atua aua manu faaifo mai le lagi mo Samoa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E fia faaleo le agaga faafetai i le Vaega Faaupufai a le HRPP, i lau Afioga i le Palemia ma sui usufono mamalu uma. Faafetai i le taliaina o se finagalo o lou itumalo ina ia ou tauaveina ai le fua o le HRPP i le faiga palota ua mavae atu nei. O le mea moni, e tautala galuega, e tautala mea lelei ua faatinoina e ala i la outou tautua faifaiepea e le gata ia Samoa atoa, e aofia ai ma si ou itumalo. A lele ua tali faaaliali le mamalu o Faasaleleaga Nu.2 ua filifilia ai nei au o le sui faatu o le Vaega Faaupufai o le HRPP. E faaalii ai le tumau pea o la latou lagolago ma le faatuatuuina o le Vaega Faaupufai a le atunuu, ua masani i le tautua atunuu. E tele ou fili, ae pe afai e au le Atua i se Vaega Faaupufai e silasila mamao mo le manuia auiluma o fanau a Samoa, o ai ea se faasagatau mai? Faamalo le galulue, faamalo le tautua punouai.

E le mafai foi ona ou faagaloina si a matou falefaigaluega, le Federal Pacific Group i Samoa, a o fafo atu foi o Samoa nei. Lau Afioga i le Taitaifono, le Komiti Faatonu, le Pulega ma le afaigaluega, talofa e, ua outou mafatia ma gasea, ae tatou te le soototo, tino ae sa faatino la outou galuega alofa i le lagolago i lenei faamoemoe ona o la tatou mafutaga, faamalo faafetai.

E momoli le faafetai i nai au uo, aumeamamae ma nai au paaga faipisini, se ua logo i tino logo i loto pei o le tala i le malofie lo outou alofa tulai ma le soosootauau. O le mea moni ua mama avega sii ai lenei faamoemoe, faafetai, faafetai tele.

Ou paolo e ma ou gafa, o ou aiga ou te malu ai, se o upu a le aumatutua pe a lalanu uaga, se ta te inu i ota tino ua le natia i fatualavai lo outou alofa moni, lo outou titi faitama ma lo outou talatama faaaliali i ituaso o faaiuga ma filifiliga faigata o le olaga, aemaise lava i faamoemoe tetele faapenei, se ua faamalo faafetai.

E taua tele i lenei ituaso ona ou faafetai faapitoa i ou matua sa tele so latou sao i lou olaga tuputupuae a ua fai i lagi le folauga. Ou te faafetaia matua o lou tina le Susuga i le Faafeagaiga ia Setu Namulauulu ma si ou tina ia Avalisa Fuamatu. Ou te faafetaia nai ou matua Fuimaono Joseph Fuimaono ma lou tina ia Vevesi Tugaga Fuimaono. Ou te manatua foi si ou tina o Luao Taatimu ma si ou tina o Upu Setu Namulauulu. Faafetai i la outou tausiga, timaiga ma aoaoga taua, e le taumate o lea ua manuia ai lou olaga.

Ou te manatua foi le tapuaiga a nai ou matua o lo o nofo tapuai mai Niu Sila, si ou tama o Taulapapa Leota Fau, ma si ou tina o Ututafao Sami Namuulu Leota ua le auai mai ona ua le atoatoa le malosi o le tino. Ou te faafetai i luma o lenei aofia ia te oulua matua, ia saga faamanuia pea le Atua ia te oulua.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E muliai lau faafetai i lau Afioga i le Fofoga Fetalai i si ou toalua ma si au fanau. O taimi uma lau Afioga ou te talanoa ai i lou toalua, ou te lagona ai le agaga faafetai i le Malo o Samoa ona o le auina atu o alo ma fanau i atunuu mamao e faalateleina ai le atamai, aua foi o i tonu lava lea sa ou fetai ai i lou toalua ina ua ou malaga atu i Ausetalia. Ina ua maea le tausaga muamua lau Afioga, sa maua mai le faaiuga o suega faaiuga o le tausaga, ua matua tele lava le faaletonu ua i ai. O le mea moni, sa logo au e le Ofisa, o le a toe faafoi mai au i Samoa. Ia ona ou nofo lea ma ou mafaufau, sa ou vili mai i si ou tina, o le uso o si ou tina sa faapea ona tausia au ma ou nofo aoga ai i Vaimoso. Sa ou logo le loomatua ma ou faapea mai, -vaai oe tina, ua ou le mafaia le aoga o le a toe faafoi atu au i Samoa. O le mea masani lava a le olomatua, sa ia ote ia te au, ote ote ia te au ae muliai lana faamatalaga faapea mai, -atalii, a ua e le mafaia le aoga, sue se teine palagi e te sau ma aumai i Samoa.

Lau Afioga i le Fofoga Fetalai, ina ia faamotu le ote, sa ou fai atu i le olomatua, ua lelei, o le a faia lou finagalo, ma le le iloa foi e le olomatua, ua ia faaopoopo le mamafa o le isi avega, aua o le mea moni lava, o lo o tau kamuta foi le nanu i lena taimi.

Lau Afioga i le Fofoga Fetalai, o le mea na tupu ina ua fai lau uo palagi, na pasi lau aoga ona sa ou musu ou te fail, faafoi mai au i Samoa toe faamavae ai ma lau uo lea. Avea ia lenei avanoa ou te faafetai ai i si ou toalua, Maria, I want to thank you today, without a doubt, you have been my healing strength. I want to thank you for standing by my side right through the good times and also the hard times.

Lau Afioga i le Fofoga Fetalai, o lea ua maea ona tapui le vatapuia e tusa ai ma tu ma aga faaleaganuu i ona tulaga faalupelupe, a o lenei vaega o le aso, se i faailo se manatu o lenei itumalo aua le taulafoga o lo o faia nei. Faafetai i lau Afioga i le Minisita o Tupe i le tala manino o le Tupe ua faataatia mai i lenei tausaga, e matua matagofie le sini autu ua faataoto, ia autasi mo se lumanai manuia o Samoa. Ou te manatu ona o au o se sui o le Komiti sa lauliliuina le Tala o le Tupe ua faataoto nei 2019/2020, o lea o le a le tele ai se faamatalaga i lea vaega. Sau se taimi ona folasia atu lea e le Afioga i le matou Taitaifono le aotelega o le matou galuega.

Na pau o lea, muamua, e ao ina faaleo atu le agaga faafetai tele i lau Afioga i le Fofoga Fetalai ma sui o le Komisi Faa-Palemene ona o la outou faatuatuaga e ala i tofiga ua outou faaeaea ai lenei itumalo i le Komiti o Tupe ma tupe alu. E fiafia foi e faailoa atu le lagolagoina atoatoa e lenei itumalo o le Tala Faatatau o le Tupe ua tuuina mai 2019/2020.

Lau Afioga i le Fofoga Fetalai, e momoli atu le agaga faafetai i le Malo e auala atu i le Minisita o Faiga Palota, ona o galuega lelei uma sa faia i nisi o Tulafono ogaoga ma le maaleale e le i leva ona pasia atu nei e le Maota. Amuia foi lenei itumalo ua faamauina i talafaasolopito o Tulafono o Faiga Palota ua latou asaina le gasu o le taeao i le uluai faatinoina o manaoga o ia Tulafono.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O Tulafono sa fulifuligata faalaaui mamafa i ai le tofa ma le faautautaga alumamao, aua e ui lava sa tetele i Pesega, lele ua matua i le oo. E tele ma anoanoai vaega lelei o lenei Tulafono sa o matou matauina.

O le mea muamua, o le le toe i ai lea o ni fale palota i Apia nei, ua tafiesea ai le laumea faapaamata sa faavaatua ai Sui Tauva e ala lea i le manumalo mai Savaii ae toilalo atu i Tumua nei. O le uluai palota foi lenei ua ave ai le faamuamua mo le aumatutua ma le mamalu o le atunuu e le atoatoa le malosi aemaise i latou o le a fou malaga. Pau si a matou tuualalo lau Afioga i le Fofoga Fetalai, muamua, ia lava se taimi e faalauiloa ai e le tatou ofisa lea vaega aua le nofo silafia e tagata palota.

Lona lua, ina ia faatinoina e le Ofisa o Faiga Palota le iloilo totoa o le agavaa o suitauva ina ia tusa ai ma le Tulafono, ina ia taofia ai le anoano o le mau vevesi, o lo o tulai mai i taimi o faiga palota aemaise o i latou o lo o faatupu vevesi ma faia nei soligatulafono ma le iloa.

Ma le mataupu lona tolu lau Afioga, se i tagai ane le Ofisa i le faatauina o le pulega mamalu a alii ma faipule. O le tasi lenei o meaalofa tuusao a le Atua ia Samoa o lana faamatai, e pulea ma taitaiina ai Samoa ma lana faigamalo. O le molimau ola, o lo o nofo filemu ma fealofani ai pea Samoa i le sili atu i le 3,000 tausaga ua mavae e oo lava i le aso. O le atugaluga lau Afioga, e le o i ai se vaega o faataua ai i le Tulafono le aiatatau a alii ma faipule fai ai a latou faaiuga tonu ma talafeagai i totonu o nuu ma afioaga. E maua luga lou talitonuga o le Malo o Samoa ua faavaeina i le Atua, ae salani i tu ma ana agaifanua faa-Samoa. Lau Afioga i le Fofoga Fetalai, o le talosaga lena, se i tagatagai ifo i ai le Malo i le faatauina pea o le pulega faamatai aemaise i taimi o a tatou faiga filifiliga. Ou te le tau faailo i le Maota lenei, o le maota o matai, ua filifili mai e Samoa atoa, o le Maota o tagatanuu o Samoa uma. E le faatonuina le la i le mea e goto i ai, ma le fisaga i lona ala e agi i ai. Ae tau ia ina ia taulia i le ave so matou vaivaiga tautaulenua, i tafatafa ane o lau Afioga ma le faigamalo.

E fia faaleo le faafetai tele i le Malo o Iapani, i lona sao maoae ma lona aao fesoasoani mai ia Samoa ma ona tagatanuu uma i le tele o tausaga, e ala atu i lau afioga i le Amepasa o le malo o Iapani. Lau Afioga Mugaileatuolo o se matai o lenei nuu ma lenei itumalo. Faafetai mo le faamatuina mai o le fesoasoani tau tupe aua le toe faaleleia o le faleaoga o Safotulafai, tau ina ia saga faamanuia pea le Atua i lau afioga ma le malo o Iapani. E momoli le faafetai i le Minisita ma le Matagaluega o Galuega, ua faatino le auala i Maliolio i Samalaeulu, o se tasi o auala sima, e matua sopo gata pe a louloua le tau. Ae na ona ou valuvalusia ai aa o le fau i se finagalo o lau afioga ma le Matagaluega, pe le ua tataua ea ona se i tagai ifo loa i le auala sima lea i Sapapalii, aua o lo o i luga foi o la tatou auala autu. O le mea moni, e tutusa lelei lava le faigata o lo o feagai ma tagata femalagai i Maliolio ma Sapapalii. O se popolega tele ua matua lamatia le soifua o tagata aemaise le afaina o eleele ma faatoaga pe a sopo tafega.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Faafetai i le Malo i se tofa na ae, aua le toe faaleleia o le auala lea e ui atu i tua o Safotulafai agai atu i Patamea ma Samalaeulu ma isi nuu. Faafetai aua o lea o le a i ai se auala e alo i ai i aso louloua aemaise pe a motusia ma osofaia e galu tetele le auala autu. E fia afeaina i sau faamatalaga le auala galue lea a Tuasivi ona e taua. O lea ua maea ona asia ma fuafuaina le survey a le Matagaluega, ma o le auala lea i Tuasivi o se auala ua talafeagai mo le faamoemoe lea a le Malo, e aveesea faatopetope ese atu ai gasegase mai le falemai i Tuasivi agai atu i le auala lea e fausia i Patamea ma Samalaeulu pe a oo i le taimi o galuafi ma sunami. O lena foi ua i le Matagaluega la matou talosaga mo lea auala, atoa ai ma le matua lagolagoina e o matou nuu o Fogapoa ma Tuasivi fuafuaga a lo tatou Malo mo lea auala. I le faatinoina lava o lena auala i Patamea ma Samalaeulu, o lea foi ua faaalua e le Matagaluega o le a faaleleia atu ai ma le aualasima lea i Vaiaata i le agai mai i tai i si o matou nuu o Tapueleele. O se faamanuiaga tele lea i si o matou nuu aemaise le Kolisi o Vaiola ma i latou o lo o aumau ai i lea nofoaga, ona ua tausaga e le mafai ona sopoia lena auala sima pe a tetele tafega i aso louloua.

E le po malae i lena vaitaimi i le siisii i luga o le suasami, ua matua uia ai lava ala o galu i totonu o si o matou itumalo, afua mai i Sapapalii se ia paia Tuasivi. E tatalo atu le Malo, se i tagai ifo mo ni talitgalu mo si ou itumalo, aemaise lava i aiga tau lalata i le sami. E na ona ou tuitui malofie atu ai i le tofa lufilufi lima lelei i lau Afioga. Se i e silasila ane i le talosaga a lena itumalo, aua lava le malupuipua o soifua o tagata, pe a oo ina gatalitalia ma soua le gataifale.

Lau Afioga i le Fofoga Fetalai, matou te ta le lave ma leu le iuofi a tautai o le mafua taulafo, e avatu ai malu i puega i la outou fita faafofoga, i lau Afioga i le Palemia, le aiga Kapeneta ma sui mamalu uma o le fonousu a Samoa ae tainane le tapuaiga mamala a vaa folafola o le Talalelei, Tama ma Aiga, le Usoga a Pule ma Tumua, Ituau ma Alataua, Aiga i le tai ma le Vaa o Fonoti. Faamagalo sa matou upu ua logovale, pe taulaulu i la outou fita faafofoga, o upu lava a le au faitofa a le atunuu, e leai se faiva e leai se lafoai. E ui lava foi ina potu le tautai ae se lava lana atu i ama. O manatu faamagalo ni lape ma faatape i iliili mamate, ae tatou seu i le Atua e magalo ai mea uma.

Faatai ma se leo o le auauna, faamatafi e le Atua lo tatou aso. Soifua ma ia manuia.

FOFOGA FETALAI: Malo saunoa i le sui mamalu, ia o se fau lava e tai i lou finagalo ma le umi o le saunoaga, ma la matou tau soso atu i le tulaga o le avanoa ma le taimi. Ae ui i lea o lau saunoaga faataupou lea, ae manatua o le tapuaiga a le itumalo ma Samoa. Malo faafetai o lea ua atoa lava i tagi le tulaga o le saunoaga, ae malo manatu i la tatou galuega i lena aso.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Malo faafetai e le tau laeia i se matou tala le saunoaga matagofie, o lea foi ua faafofoga le Palemene, faafofoga tapuai mai foi Samoa. O le avanoa leni mo se isi sui usufono e fia saunoa. Tulai mai le sui usufono o Lefaga ma Faleaseela.

Afioga TOLEAFOA KEN VAAFUSUAGA POUTOA (Lefaga ma Faleaseela): Faafetai i lau Afioga i le Fofoga Fetalai mo le avanoa o leni sui usufono. Aua se sao o lou itumalo, i le lufilufiina o le tamaoaga o Samoa i leni Tala Faatatau o le Tupe 2019/2020. Fai mai le upu, o Manua o le nuu, e matafanua i Saua ae siufanua i Fitiuta ona ou faatulou lea. Fai mai le upu o Tapusalaiia o le nuu, e matafanua i Utuma ma Salega, ae siufanua i Faleseu Faleomavaega Laloifo ma Falesau, ona ou faatulou lea. Fai mai le upu o Upolu o le nuu e matafanua i Matamatagi i Aleipata, ae siufanua i Tulatala ona ou faatulou lea. Fai mai le upu o Savaii o le nuu, e matafanua i Faasaleleaga ae siufanua i le Vaotele i Tufu ma Toloa, ona ou faatulou lea. O le taotoga lea o Samoa mai le Papaitau se ia paia le papa na fili ai puletuu, na ao i ai paia o le atunuu, tulou tulou lava.

Ou te faatulou atu i le paia o Tama ma Aiga, o Aiga foi ma tama, le usoga ia Tumua ma Pule, Ituau ma Alataua Aiga i le Tai ma le Vaa o Fonoti. O paia na o Samoa e faamemelo i malae i Tiafau, o le malae o le faautugatagi, lea e faavae i le Atua le Tama, le Alo, ma le Agaga Paia.

Ou te faatalofa atu i lau Afioga i Le Ao o le Malo ma lau Masiofo. Ou te faatalofa atu foi i lau Afioga i le Sui o le Fono a Sui Tofia ma lau Masiofo. Afio lau Afioga i le Sui Faamasino Sili, ma alii o le faamasinoga. Lau Afioga i le Palemia, le Sui Palemia, Minisita o le Kapeneta ma Minisita Lagolago, afifio Taitaifono o Komiti faa-Palemene. Afio lau Afioga i le Fofoga Fetalai, ma le Palemene o Samoa. Faatalofa atu i Ofisa Sili o Pulega, ma Faalapotopotoga a le Malo faapea Kamupani aemaise o Sui o malo mai fafo o lo o papaaao i Samoa nei. Ou te faatalofa atu i lau tapuaiga Samoa o lo o faafofoga mai, e le faagaloina foi le tapuaiga a le Au fai tatalo i fata faitaulaga e fia i totonu o lo tatou atunuu. Malo le galulue, e lagona i tino le mafanafana, e le tuulafoaina e le Atua Samoa, ona o le mana o la outou tapuaiga ma la outou tatalo. E le faagaloina foi le tapuaiga a le faigamalo a Tutuila ma Manua. Lau Afioga i le Kovana ma le Sui Kovana ma lau faigamalo. O le paia lava lea aua Fatu le gae ma Malotumau, o Laloifi ma Falesau, o Gagamoe ma Utumoe, o paia na o le Faleagafulu tainane oe le Manuatele, Tootoo o le Faleula. Ae le i agai se manatu o leni sui usufono i le Tala o le Tupe, lau Afioga i le Fofoga Fetalai, e fia faamau le agaga faafetai o leni itumalo i le Maota fono fou leni i Tiafau. O lana Tala Faatatau Muamua o le Tupe 2019/2020, lea o le a lipoi nei i le Palemene o Samoa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Faamalo le galue i lau Afioga i le Palemia ma le Kapeneta, faamalo le le faalogologotiga, faafetai foi i le Malo o Ausetalia, le lagolagosua ia Samoa aua lenei galuega. Alo ane ia laia le Palemene o Samoa se i o tatou sufi le anofale o le Maota fono nei, aua se manuia o Samoa mo nei ma a taeao.

Lau Afioga i le Minisita o Tupe ma lau Matagaluega, o lea ua afu lelea lau faatamasoalii, ma paepae faatumua o lagi o le malofie i le tala faatatau o le tupe. Ua manufulu ai nei le Palemene o Samoa aua se manuia o le atunuu. Faafetai mo le tala o le tupe, o le mea sili ona taua, o lena e gafatia ona totogi a tatou aitalafu ma lelei le faasoa i tupe, aua le galueaina o lo tatou atunuu aemaise Matagaluega a le Malo. Ae o le fautuaga i lau Afioga, ia silasila mamao i nisi o vaega e maua mai ai nisi tupe e fesoasoani aua le atinaeina o le atunuu. Ae faamalo faafetai i lau Afioga ma lau Matagaluega ona o lenei galuega.

Lau Afioga i le Minisita o Aoga, e avatu le faamalo i lau Afioga, o lea ua silasila le atunuu i le faamoemoe aua taaloga a le Pasefika, lea ua tapenaina. E momoli atu ai le agaga faafetai mo le tapenaina o lenei faamoemoe, le lagolago a le aufaipisinisi. O lo o matauina, o Faalapotopotoga Tumaoti, e le gata i lea o lo tatou atunuu. E faaalua lea i nisi o le atunuu ua faamatagofie so o se vaega o le atunuu, o le a faatino ai taaloga.

E le faaititia foi le agaga faafetai i le Malo, ona o le tofa mamao i alo ma fanau a le atunuu, lea na toe faaalu ai le isi afa miliona e faaauau ai a latou aoaoga i atunuu i fafo, ona o le faaletonu o fesoataiga a le komiti sikoasipi ma le Malo, semanu e le alu ai sea tupe tele, ae faafetai i le manatu i le lumanai o Samoa mo a taeao. E toe faafetai atu foi i lau Afioga i le Minisita mo le tele o galuega lelei aua le Matagaluega o Aoga. Ae na o sina fautuaga lau Afioga i le Minisita o Aoga, se i e silasila ifo lava i le tatou degree lea e faauu ai tatou i le Iunivesite. Ua ou faamaonia e le o faaaogaina i Niu Sila lau Afioga ma Ausetalia. O alo ma fanau ia e manuia i le quota, ua maua mai faailoga degree, o latou faailoga seiloga e toe aoga e toe sue le diploma i Niu Sila, faatoa agavaa lea i galuega totogi lelei. O le talosaga atu lea i lau Afioga i le Minisita o Aoga.

Lau Afioga i le Minisita o Vaalele, e momoli atu le agaga faafetai i lau Afioga, e le faigofie le galuega, e mamafa le galuega. Ae momoli le faafetai i galuega lelei na taumafai i ai lau Afioga i le Minisita ma le Pulega o le Vaalele o le Samoa Airways, i le toe vave ona toe faaauau le malaga a tatou vaalele, ina ua maua mai le tatou vaalele lea.

FOFOGA FETALAI: Malie le sui usufono o lo o saunoa. Tulai mai le faauilavea.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ua ou tulai atu, e fai sina au tali puupuu lava i le mataupu lea sa saunoa i ai le sui usufono e faatatau i fanau ua faamanuia mai a latou aoaoga i le tatou Iunivesite. O le mea moni lava, ua toatele i latou e pasi mai i le Iunivesite o Samoa, e maualuluga faatinoga o a latou galuega. Ae a i ai lava se isi e faaletonu, e le o le Iunivesite la e tuuaia, e tuuaia lava le tagata ia e le faamaoni.

E i ai foi la tatou aoga foi lea, e taua lea mo le aoaoina o fanau a Samoa i mea tau trades, e le gata o le tatou lava aoga mo matata eseese, ae o lo o i ai foi ma le fesoasoani mai a Ausetalia. E i ai foi le latou aoga faapitoa mo tomai faapitoa, e eseese. E tusa lava la pe tutusa ia tomai o laua, na pau lava le eseese a o i Niu Sila po o Ausetalia ae ave tusipasi ia e lua, e le tilotilo i le tulaga foi lea o le tomai. O le a faapefea ona iloa le tomai e le i amata ona iloa ai lea o le eseese. Ae tasi lava le mea e tilotilo i ai, o fea e sau ai le tusipasi lea?

Ma o le mea lena e faafetai ai le Malo o Ausetalia, ona ua mafai ona aumai le latou aoga fai i i nei issue le tusipasi tusia ai, o le tusipasi po o le a lava le tulaga o ituaiga tomai ae tusi ai le tusipasi mai Ausetalia.

A e alu la ma lau tusipasi lena i Peretania, ae o atu le toalua lea, e tasi lava le mea e tilotilo i ai, e take le tagata na alu atu ma le tusipasi lea mai Ausetalia. O le mea lava lena e masani ai, o le natura lena o le soifua. E le faapea o le tusipasi e mafua ai ae o le tagata lava ia ona e i ai tulaga faapena i le tatou soifua, o lea foi e matauina pe toalua tagata e pasi maualuluga mai i o i Cambridge, ae o mai pe toalua loa vaai atu i le isi loa e maualuga lava le saosaoa, ae vaai atu le isi loa e le agai i luma ae agai i tua, Ae mafua i le a? E mafua mai lava i le tagata lava ia.

O le mea la lena ou te tulai atu ai ina ia faataua le itu lenei, lea la e i ai le tatou Iunivesite. Ia manuia tele lau lauga.

FOFOGA FETALAI: Ia, faaauau le saunoaga a le sui usufono.

Afioga TOLEAFOA KEN VAAFUSUAGA POUTOA: Ia malo faafetai i le saunoaga a lau Afioga i le Palemia. Ou te masalo o lena ua manino le faafofoga mai o le tatou atunuu, ona faaauau lea o se faafetai i le Afioga i le Minisita o le tatou vaalele. E pau lau talosaga e tatalo atu, e na o se fautuaga se i e silasila ane i le tatou vaalele pe le maua ni a tatou vaa se lua, e fesoasoani ua tele le lagolago a lo tatou atunuu i lo tatou vaa. Tatalo atu foi i lo tatou alavaa lea e agai atu i Apia i Ueligitone, pe o le a se tofa i lau Afioga i le Minisita ma le tatou Kamupani Vaa, ae toe faaauau lea malaga agai i Ueligitone i Apia ma Apia i Ueligitone. E momoli atu foi le agaga faamalo, i lau Afioga aua le atinaeinaí ua molimauna foi le tele o galuega lelei o lo o faasolo e lau Matagaluega.

18 IUNI 2019

Tulafono Tau Faaofi o le Faatatauina o Tupe Faaopopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua

Na ou oo mai lea i le Minisita mo Galuega, momoli atu le agaga faafetai i lau Afioga i le Minisita, ia lea ua matauina lea ua matagofie le tatou auala lea e agai atu i Afega e agai atu i Malua, ae maimau lau Afioga pe ana sosoo atu i Toamua e agai atu i Afega. E na o se tatalo atu ma le agaga faaaloalo i lau Afioga. E momoli foi le agaga faafetai o lea foi ua matauina le auala laupapa lea i Vaisigano ia lea ua amata ona tino mai.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Lau Afioga i le Fofoga Fetalai

FOFOGA FETALAI: Ia se i tulai mai le Minisita mo Galuega.

Susuga Hon Papaliitele Niko Lee Hang: Ia e le faalavelaveina le saunoaga matagofie a le sui usufono mamalu. Na o si mea lea e fia faailoa ne i te i foi ua toe laga mai i se isi lauga, o le sooga o le auala lea i Afega lea ua uma ona tapena. E le o toe mamao se taimi ona faatino lea ma le faaaloalo lava.

FOFOGA FETALAI: Ia lena ua faafofoga atu ia sui usufono mamalu, vaai le faafitauli lea ne i toe taua foi e se isi sui usufono o lea ua tali le Minisita. Saunoa le sui usufono.

Afioga TOLEAFOA KEN VAAFUSUAGA POUTOA: Malo faafetai i le faamalamalama a lau Afioga i le Minisita. E momoli foi le agaga faafetai mo a tatou auala fesootai lea ua uma ona faatinoina i le tatou malae vaalele, ia ua matagofie ai lea atinae, i le suiga lea ua i ai ia lenei vaitau, malo faafetai. Ae toe tatalo atu i lau Afioga i le Minisita, masalo o lena ua uma ona ta talanoa ma ta feiloai, ua e saunoa foi, ua e silasila i le faaletonu o auala o lenei itumalo. Ia e le tau faailoa i lau Afioga i le Minisita, o lena foi na e saunoa mai, e pasi loa le Tala o le Tupe, ia o ou mama na lau Afioga i le Minisita, ia manuia ou faiva alofilima, aua lau faamuamua i lenei itumalo, ua faaletonu tele o matou auala e amata mai i Matautu, Gagaifo, Savaia, Tafagamanu, Safaatoa se ia oo mai i Faleaseela, ma lo matou pitonuu lea i Matafaa. Se i e alofa ifo i ai lau Afioga i le Minisita.

E momoli foi le agaga faafetai i le Minisita o Galuega, o lea ua maua le tala o lea o le a i ai le isi tatou vaa fou o le Faalapotopotoga o Vaa e sui ai le tatou vaa lea o le Lady Naomi. E momoli atu ai le agaga faafetai i le Malo o Iapani, ona o lo latou agalelei pea. Sa i ai le manatu faapea o le a le toe fesoasoani mai Iapani mo se tatou vaa, ae ou te manatu o le finau a lau Afioga a lau Afioga i le Minisita o lea ua toe liliu ai le tofa ma se faautaga a le Malo o Iapani e toe fesoasoani mai mo se isi a tatou vaa. Ae o le tatalo i lau Afioga i le Minisita, o le 2021 le palota tele a lo tatou atunuu, ae o lea se i silasila ifo lau Afioga, po o lava ia tatou vaa aua lea faamoemoe.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ona ou oo mai lea i le Matagaluega o le PUMA, lea ua toe tuufaatasia i lalo o le Matagaluega o Galuega. E momoli atu ai le faafetai i le Malo, ona o le tofa ua ae ua toe tuufaatasia ai ia Matagaluega, e faafaigofie ai pemitā mo galuega, aemaise galuega tau atinae i totonu o le tatou atunuu.

Ona ou oo mai lea i le Afioga i le Minisita mo le Soifua Maloloina, masalo o se taimi ona oo atu lea o se faamatalaga i le Matagaluega, ae o lenei itula e fia momoli le agaga faafetai i lau Afioga i le Minisita sa seei i le Matagaluega, lau Afioga Leao Dr Talalelei Tuitama, malo faafetai i le tauaveina o le Matagaluega o le Soifua Maloloina i le tele o tausaga. Faamalo mo le tautuaina o le atunuu, o lea ua faafofoga mai le mamalu o lou itumalo, na matou tagisia lau fesoasoani mo le aveina o latou gasegase i fafo i togafitiga i atunuu i fafo. Faafetai i lou alofa, faafetai i lou manatu mai i le sui usufono o le itumalo, ia faamanuia le Atua i lau Afioga, i ou faiva alofilima aua le Matagaluega fou o le a agai i ai lau Afioga.

Lau Afioga i le Minisita mo le Soifua Maloloina lau Fetalaiga Faimalo, e le i fausia Roma i se aso se tasi, ae ave lau faamuamua i le mea e ave i ai le faamuamua. O le tatalo a lenei itumalo se i e silasila ane lava i le tatou outpatient. O le tele o taimi e faatali le atunuu ona o le tulaga tau fomai. O le fautuga a lenei itumalo, se aumai ni tatou fomai mai Saina, e fesoasoani i le tatou falemai, aua le tautuaina o le mamalu o le atunuu, e oo atu aua o latou gasegase. Lau Afioga i le Minisita o le Soifua Maloloina, na ona toe faamanatu atu lava o lenei itumalo, ia e leai so matou falemai e tatalo atu mo so matou sub-centre, ina ia mafai pea ona maua se auaunaga faa-soifua maloloina e tautua ai lenei itumalo nai lo le tau malaga mai i Leulumoega.

Lau Afioga i le Minisita mo le Soifua Maloloina, na o si mataupu lea e tuu atu i lau Afioga po o fea o i ai le tofa a lau Afioga o lea ua e tu mai i matagiolo, o se tasi foi na malaga atu i fafo, ia ma maua ai i le tino mai. Ia sa agai i le falemai i Niu Sila ma togafitia ai, ia ae o le tatalo atu, se i e silasila ifo i se fesoasoani a le Malo, e aumai le pili e le faigofie, ia ae a maua sina fesoasoani a lo tatou Malo, pe afa lea tamalii afa le Malo. O se fesoasoani a lo tatou Malo i tulaga tau seleni. O le tatalo i lau Afioga, ia alofagia e le Atua lou tulai mai, ia faamanuia le Atua i lau Afioga i le Minisita, ona o lou tulai mai aua le tautuaina o le tatou falemai ma le siitia o le soifua maloloina i totonu o le tatou atunuu.

FOFOGA FETALAI: Ou te faamanatu atu i le sui usufono mamalu e i ai isi avanoa e maua e le sui usufono o mea taitasi. Ia o le auiliiliga, e lua avanoa tai 15 minute i mea taitasi e fua i ai le saunoaga. O nisi mea tuu i le taimi avanoa lena e tai 15 minute e lua, ae faamaea mai le saunoaga ae faagasolo le tatou galuega.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Afioga TOLEAFOA KEN VAAFUSUAGA POUTOA: Faafetai i lau Afioga i le Fofoga Fetalai, masalo e le toe umi toeitiiti lava faamaea atu. Lau Afioga i le Minisita mo le Siosiomaga, na ona toe faamanatu atu lava ia taligalu a Gagaifoolevao ma Faleaseela, pe maua atu ai se fesoasoani a lau Afioga i le Minisita po o le Sui Palemia.

Minisita mo Faatoaga, na ona toe tatalo atu i lau Afioga, po o le a se tulaga ua oo i ai le tatou poloketi foi lea o le fugafuga. Ia tatalo atu foi i lau Afioga, se i toe faaaauu ia tatou fale foi ia o tunnel houses, fesoasoani i le au fai fualaaui aina. Faafetai mo le polokalame o le manu ainiu, lea sa faatinoina i nisi o afioaga o lou itumalo, Safaatoa ma Faleaseela.

Ia lau Afioga i le Palemia ma le Kapeneta, faamalo le galulue ua matagofie lumafale o le fale o le Malo. Lea ua tulai mai atinae ua maea ona faamatagofie, aua le tapenaina o le tatouí

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia): Lau Afioga i le Fofoga Fetalai...

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea ou te tulai atu te i ua vave faamuta ia mataupu a le sui usufono lea sa taua mai ai le Sui Palemia, ona o lea e le o saofai atu ona o lea e avanoa lona nofoa. Mo le silafia e le Maota nei, o le taimi nei i le maaleale tele o le mataupu o lo o faafeagai ma le Sui Palemia aua ia le fesuiaiga o le tau, o se mala ogaoga lea o lo o feagai nei ma le lalolagi. O le mafuaaga lena o lea ua le nofoia ai le nofoa ona o lo o auina atu e lo tatou Malo, ina ia faaleo ia le finagalo o le tatou Malo, mo le sao o Samoa i taumafaiga a le lalolagi atoa, i le puipuiga o le paneta o lo o tatou ola ai nei. Ia o le mafuaaga lena o lea ua le nofoia ai le nofoa, ae o lea lava ou te faamafanaina ia le nofoa, ina ne i te i ua le aumaia ia outou mataupu. Aua le poia faleolo, ta lau mai pea, tou te fiu e ta lau mai e le taitai ona lava mataupu e talanoa atu ai i le tulaga o i ai nei le mala o lo o faafeagai ma le lalolagi aemaise ia le sao taua e tataua ona tatou faia.

Ma o le avanoa foi lena o lea e faafogafoga mai ia le tatou atunuu, ona o le toatele o le tatou atunuu pei e le o faatauaina latou, ae o lo o moomia ia le taitaiga malosi a alii ma faipule ina ia faatino ai le agaga lea o lo o faapopoleina ai le lalolagi atoa, ia ma sao o atunuu uma o le lalolagi, e faaalua atu ai le tutu faatasi e faafeagai ma le mala maoae o lo o feagai nei ma le tatou lalolagi i le taimi lena.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Ia faaiu maia le saunoaga o le tasi lena mea na ou fautua atu. Ia ua iloa foi mea faapea o le timing le isi mea, a fetau lava le taimi, ia leaga o la e le i afio mai le Afioga i le Sui Palemia, ae o le isi vaega tele o lau saunoaga e feagai ma le Sui Palemia. Ae e logosaia lau fautuaga i avanoa ia e lua tai 15 minute, o.. ia o na e fai uma ai lava mea a lou itumalo. Ae faaiu mai loa le saunoaga.

Afioga TOLEAFOA KEN VAAFUSUAGA POUTOA: Faafetai i le fesoasoani mai a le Afioga i le Palemia, ia faafetai i lau Afioga i le Fofoga Fetalai, ou te manatu o le sao lena o lou itumalo faatasi ai ma nisi o talosaga ma tuualalo a lo tatou Malo, ae matua lagolagoina le Tala Faatatau o le Tupe e lenei itumalo. Ia faamalo le tapuai i si ou itumalo, aua le afio o le Aiga Satuala ma le latou tama, Alalatai Savailuu, Afio foi le Aiga Taulagi ma le Matua o Satuala ma le mamalu o le Faleaana, ae le galo ai nai ou tama faaleagaga. Ia manuia lau Afioga i le Fofoga Fetalai, le Palemia ma le Kapeneta ma le Palemene faapea lau tapuaiga Samoa. Soifua ma ia manuia le Fono.

FOFOGA FETALAI: Malo faafetai i le sui usufono mamalu i le logosaia se fautuaga. Ua ou vaai atu lava i lau saunoaga, na ona e taua loa auala o Lefaga ma Faleseela, ou vaai atu i le aao o le Minisita o Galuega, ua faapena ona tusingi lalo, o lona uiga o la ua faamau. Malo faafetai.

Tulai mai se isi sui usufono e fia saunoa. Tulai mai le sui usufono mo Afioga Tu Taulaga Sisifo.

Afioga FAUMUINA ASI PAULI WAYNE FONG (Nuu Tu Taulaga Sisifo): E muamua ona momoli atu le faafetai tele i lenei taeao, i lau Afioga i le Fofoga Fetalai, afifio foi lena itu, le Afioga i le Palemia aemaise foi le Kapeneta, faapea foi le Sui Palemia ma le mamalu i Sui Minisita, afifio foi lenei itu, afioga i sui usufono aemaise foi le mamalu o le atunuu ua mafai ona tatou mafuta i lenei aso. O lena foi e alala mai Ofisa Sili a Pulega a le Malo, malo foi le soifua manuia i lenei aso. Le tapuaiga a Samoa, tapuai maia o le a taumafai atu se vaivaiga o lenei itumalo aua foi le Tala o le tupe.

E momoli atu le faafetai tele i lau Afioga i le Minisita o Tupe i lenei aso. O le sini autu lava o lo tatou faamoemoe i le Tala o le tupe, òo le Filifiliga toa" po o le faiga o filifiliga ae ia toa foi le loto i le faiga. E manaia tele le sini autu o le Tala o le tupe mo lenei tausaga, lau Afioga i le Minisita. E ui lava ina le paleni tupe maua ma tupe alu, ae e le afaina. Faamoemoe i le Atua e faapaleni mai la tatou tala o le tupe.

E le mafai foi o lo o i ai foi le mamalu o lo tatou atunuu o lo o taputapu, aua foi le fesoasoani ina ia mafai ona iu manuia lenei faamoemoe aua foi le 2019/2020, i ona tupe maua ma tupe faaalu.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Lau Afioga i le Minisita o Aoga e momoli atu le faafetai tele i sauniuniga foi o fuafuaga o le taaloga o le Pasefika. E matagofie tele ia sauniuniga lau afioga. Faafetai atu foi i nuu taitasi aemaise foi itumalo ma aoga, o i latou o lo o teuteuina lo tatou atunuu aua foi taligamalo. O lea, o ou mama na lau afioga. E lei i ai lava se tatou taligamalo i taaloga a le Pasefika e le i gau. Ae talitonu le agaga o lea ua tilotilo atu, o lea ua fuafua lelei e lau Afioga i le Minisita ia fuafuaga i tupe maua aemaise foi o le faasoasoina. O lea foi ua aofia ma lo tatou atunuu. O lo tatou atunuu, e fiafia a latou e teuteu mea ia latou lava tupe e maua, o le aoga lena o le faamoemoe lau Afioga i le Minisita.

E i ai lava si tamai mataupu lea lau Afioga i le Minisita, se i e tagai ifo lava i le tulaga i le tatou Iunivesite. E matauina e fanau, a faapea ua tuua le Iunivesite ae fia oo atu i le USP i Alafua, e toe amata lelei lava le tamaititi, i mataupu na alu ai. E foliga mai e le taliaina e le USP ia mataupu ua uma ona ave e tamaiti i le tatou Iunivesite. E pei e foliga mai e le taliaina pe le talitonuina ia tulaga ia. E tataua ona fuafua lelei e le USP, o lea e iinei i lo tatou atunuu, o lea foi e silasila i galuega a le Malo o lo o faia e le tatou Iunivesite, e ao lava ona talia ia mataupu ia e toe amata lelei ai tamaiti i le level ua oo i ai le tamaititi, ae o lo o lelei lava mea uma. A maua loa se Faauluuluga o lau Matagaluega o le USP, ua atili ai ona lelei lau afioga.

I le siosiomaga ma le tulaga i le tatou Matagaluega lea o le MNRE, na ona tatalo atu faapenei lau Afioga i le Minisita, lau Afioga foi i le Palemia o lo o sui i lenei taimi, se i tagai ifo lava i le tulaga lea o fanua a le Malo, fanua faaleaganuu o lo o lisiina e le Malo. Ina ia fuafua ina ia fai ia lisi, ae le o le fai ina ia ave lau Afioga i le Palemia, ina ia i ai ni aiaiga ina ia mafai, a uma ona faaoga le fanua ona toe faafoi lea o le fanua.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai.....

FOFOGA FETALAI: Malie le sui usufono o lo o tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: O le sui usufono lea e saofai i totonu o le Komiti, e lelei ona e faamaoni e te nofo i totonu o le komiti, ma ave au fesili. E lua auala e ave ai e le Malo fanua, e ave i le faiga faalisi ma le ave motu. O le vaai mamao lena a le Malo, ae e le mafai ona e malamalama, pe a e le fesili ma e auai i totonu o Fonotaga. Ae o le aumai o mataupu faapea, o le a lou mafaufau? O lea e matau atu e matou. A e le malamalama ona e agai lea e te talatalanoa i le Minisita, ae aua le aumaia i i aua a aumai i i, e le mafai ona matou nofonofo, ae tutulai atu e faasao, ma e lua auala e ave ai, e i ai mafuaaga,

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Afioga FAUMUINA ASI PAULI WAYNE FONG: Lau Afioga i le Fofoga Fetalai, o le Maota lava lenei e fai atu i ai manatu lau Afioga i le Fofoga Fetalai, a faapea la.....e le o i inei e fai atu ai, e le iloa la.....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o le mea e fia faasao..

FOFOGA FETALAI: Malie le sui usufono sei tulai mai le faasaoga a le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: A lea ua ou tau atua, e tele a tatou mafutaga e tataua ona e aumai ai matapu ia ma faamatala atu. E le taofia foi oe e te sau ai e vaai le Minisita ma faamatala sao atu le mea o i ai, i le tulaga lea e lua auala e ave i ai e le Malo. O lea foi ou te talanoa atu ai, e faamalamalama i le atunuu. O le a avatu se faataitaiga, e lisi se auala e fai ai le auala tele o le Malo, se i mafaufau i ai. A alu atu le auala i totonu o le afioaga e lisi? E le tataua ona lisi, e tataua ona ave motu mo le faaaogaina e le atunuu lautele. Lau Afioga i le Fofoga Fetalai, e faigofie. Ae faapea le sui usufono e sau i totonu, ae le fia malamalama o lea foi e maua avanoa tatou te fonu ai, ae o le faalavelave e te le fonu i fonu a le vaega, e faamalamalama atu ai mea ia.

FOFOGA FETALAI: Malo faafetai. O mea e ao ona faamalamalama, e i ai le manatu o le Nofoa aua masalo toe lua tausaga o la tatou Paeaiga lenei. Ao ia vaega uma ua laga e le sui usufono ua maea ona faamalamalama i la tatou Faafaletui ma mafutaga a le Vaega Faaupufai. Ua taua lea vaega ona e i ai le avanoa e fesoasoani ai le Fofoga Fetalai, e faamalamalama mea ua uma ona faamalamalama. Ae faamalulu atu i le sui usufono, e i ai le manatu foi lea, aua foi e te naunauta tele, ae silasila foi i le isi itu i le tulaga....o lea e manaia le mataupu ae le o i e...o lea e i ai avanoa e fesili ai i le Minisita, o le faapupulaga lena. A ave e le Malo se vaega o le eleele e fausia ai se auala, o lona uiga e tataua ona ave motu, aua o la e faaoga for life mo le olaga atoa. E i ai foi vaega e tataua ona ave i le tulaga faalisi. O mea ua manino i ai sui usufono. O le mea la lea, malie ia le sui usufono e see ese mai le vaega lea.

Afioga FAUMUINA ASI PAULI WAYNE FONG: Faafetai i lau Afioga i le Fofoga Fetalai, o le a taatia ia le Matagaluega lea o le a fai i ai se manatu i se isi taimi.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ona oo mai lea i le Matagaluega o Galuega tetele a le Malo. Lau Afioga i le Minisita, i le tulaga o tupe maua mai le Matagaluega e faaaua mai i le Treasury ina ia oo atu i Matagaluega Tumaoti a le Malo, e na ona ou tatalo atu i lau afioga, o lo o i ai lava se faaletonu i tulaga i inisinia latou te vaaia le Matagaluega lenei o le MWTI. E pei e tetele laititi lava totogi o inisinia o Matagaluega nei o lo o faaaua atu ai tupe a le MWTI i le LTA, SWA ma le EPC. Ae se paga, e le mafai ona taofiofi e le Matagaluega lenei ia inisinia latou te faia tulaga i asiasiga, aua galuega tetele a le Malo. O lea e talosaga atu ai i le Afioga i le Minisita, e tau tuutuu i luga totogi o inisinia i tulaga ia ina ia mafai ona taofi ai ia....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o le mea e fia faasa'o.

FOFOGA FETALAI: Malie le sui usufono sei tulai mai le faasaoga a le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Ua uma ona faasilasila e le Malo le faatulagaga atoa o le aufaigaluega a le Malo. O lo o i ai le Komiti latou te faataotoina ia o tatou totogi, totogi o le aufaigaluega i ona vaega eseese. Ma na amata galue le Komiti lea i le Paeaiga i le 2001-2006, ua sui atoa ai le faatulagaga o totogi ina ia vasaga lelei totogi i totonu o le aufaigaluega a le Malo, faapea foi m le Private Sector. O i latou ia o lo o galulue mai tua. O lea faatoa faataoto ai i se tulaga e vasaga lelei ai totogi. Ina ia taofia ai le mea lea o le feoai, aemaise o le silasila totoa a le Malo, i le atinae o i latou o lo o i tua atu o le Malo. O le tulaga lena. E le mafai lava ona faamalieina ia se tagata, o le mea lava lena e manao ai lava, a manao lava le inisinia ia e tuu i luga lona totogi. E tiga lava ona tuu i luga totogi, ae i ai lava e, e le mafai ona faamalieina. Ma o le faamaonia o lea tulaga, na siitia maualuga e le Malo ona o le maualalo tele o totogi o ana tagata faigaluega ma le Palemene lenei, i le tausaga i le 2005 agai atu i le 2006, e 40% le sii. Ae faagasolo i tausaga e tolu ina ia taumafai le Malo e faavasaga lelei totogi o le Malo, e fuafua i le aufaipisinisi i tua. O le a le mea na tupu? Na tete ai nisi o fomai, e manao ia sili ese lava latou i luga. O le atunuu lenei e le o se atunuu e pei o Amerika e tafe ai le suauu ma le meli. E fuafua foi la e le Malo ia le tulaga o totogi e gafatia e lo tatou Malo.

O le tele o inisinia lenei e sau mai luga i le tai fia selau afe a latou totogi e maua i tua i le Private Sector. Ae e fuafua faatatau i le lautele o lo tatou atunuu, aemaise o latou nei, na mafua i le a ona popoto? Na mafua ona popoto ona o tupe a le atunuu. E le mafai ona tatou faatutusa o latou totogi ma totogi e maua i Niu Sila.

18 IUNI 2019

Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua

O le mea la lena tatou te fuafua ma le faatatau i ai. Ae soia tatou te faaoloatauaaina le aufaigaluega a le Malo, aua e fiu lava e faaoloataua, e mulimuli lava le Malo i faiga faavae ua faataoto ina ia sologa lelei ai le atinae o Samoa.

Afioga FAUMUINA ASI PAULI WAYNE FONG: Lau Afioga i le Fofoga Fetalai, o le mea e fia faasa'o, e le o faaoloataua atu iinei le aufaigaluega a le Malo. O le manatu...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o se mea e fia faasa'o. E mai lava i le amataga o lau saunoaga, e faaoloataua uma lava mea na na e aumaia, mai lava i le amataga...

FOFOGA FETALAI: E faapea, e faamanatu atu foi i le sui mamalu, o isi lava saunoaga, e i ai le upu foi lea e fai i le gataifale, E malu apefoe ae pisia ai fofoga, e manaia foi a lea e malu, ia ae mamai ai fofoga o le Malo o la e agai i ai le saunoaga. Ma e o saunoaga faalauaitele, e saunoa sao lava i le tulaga o tupe ma le tamaoiaiga o le atunuu i lona aotelega. Ia leaga e pei o lea ua pei e specific ua faapitoa lava i le mea lea, o le mea taitasi mea na tatou te o mulimuli ai.

Ae na ona fesoasoani atu i le sui usufono, ina ia aua ne i i ai se agaga foi lea e faatauta, ia sou finagalo ia ma le tulai mai o le Malo aua leaga o le tatou Tulafono Tumau, e laa ese loa, ia i se mea e fia faasao ma se mea e fia faamalamalama, e le mafai ona tuua e le Malo. Tulai mai le Malo e faasao le mea ua see ese mai ai le saunoaga pe limataitaiina sese ai foi ia le tulaga o le faagasologa o fuafuaga alualu mamao o le Malo. Ia e fai fuafua foi i ai ia sui usufono mamalu, e na o se fautuaga a le nofoa.

Ae talu ai ua tatou toai taunuu i le tatou malologa masani, ia o le a faataatiaese ia galuega a le Fono Aoa mo lana malologa masani se i to foi le sela o le sui usufono mai Sisifo. O le a faataatiaese galuega a le Fono Aoa mo lana malologa masani.

Na faataatiaese Taulumaga a le Fono Aoa Faitulafono mo lana malologa masani i le itula e 10:41 i le taeao ma toe amatalia i le itula e 11:33 i le taeao.

FOFOGA FETALAI: Ou te faasilasila atu ua toe amatalia nei taulumaga ma galuega a le Fono Aoa Faitulafono. Ia ae le i tapa le sui usufono o Nuu Tu Taulaga i Sisifo e faaauu le saunoaga, ou te tapa lau Afioga i le Taitai o le Malo po o le Taitai o le Maota mo se lafo aua ia la tatou galuega.

18 IUNI 2019

LAFO MO LE SUIA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, malo foi i le taligasua i leni itula aua le faasiligamalos i le paia maualuga o sui usufono o le Maota. Ua tatou sagai atu nei le Maota mo lauga faalauaitetele, o le Tala Autu o le Tupe, ma ou te tulai atu ai ma le agaga faaaloalo e faatu le lafo mo le sua o tatou itula fono. O le a tatou malolo i le itula e 1:00 i le aoauli nei tulaga masani, ona fautuaina lea o le toe faaauau le tatou fonotaga i le ta o le 3:00 se ia aulia le itula e 7:00 i le afiafi. O le a toe i ai se isi fetuunaiga pe a maea ona pasia le tatou Tala Autu o le Tupe, ia faatasi ai ma isi Tulafono i le faagasologa o le tatou galuega i leni vaiaso.

O le agaga maualuga o le faatulagaga o nei itula galue lau Afioga i le Fofoga Fetalai, ona e tatau foi ona vave faamaonia le Tala Autu o le Tupe mo le faaogaina, aua ia tatou itumalo ma nai o tatou tagata o lo o taliga mai i nisi o atinae e tatau ona faatino loa lava, e faapei ona ootoo atu i totonu o le Tala o le Tupe.

O le lafo lea ma le agaga faaaloalo.

FOFOGA FETALAI: Malo faafetai, ua faatuina mai e le Afioga i le Palemia le lafo ina ia faamaeaina le tatou galuega i le itula e 1:00 i le aoauli nei, toe amatalia i le itula e 3:00 se ia paia le itula e 7:00 i le afiafi.

Faaluaina e le Minisita mo Galuega, Felauaiga ma Atinae Eseeese, Minisita mo Tina ma Tamaitai, Atinae o Nuu ma Afioga ma Agafesootai ma le Minisita o Tupe.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2018/2019 ma le Tulafono Tau Faaofi o le Faatatauina o Tupe 2019/2020.

FOFOGA FETALAI: Ou te tapa ma le faaaloalo lau Afioga i le sui usufono o le Itumalo o Nuu Tu Taulaga i Sisifo e tulai mai e faaauau le saunoaga, e toe 15 ou minute. Ia ma e fautua atu foi i tulaga o lo o i ai le tatou galuega, ia e faapena o lo o faatalia foi galuega a le Malo aua le tatou galuega ina ia pasia le tatou Tala Faatatau Autu o le Tupe e pei ona talanoaina nei.

Tulai mai le sui usufono mamalu.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Afioga FAUMUINA ASI PAULI WAYNE FONG: Faafetai atu i lau Afioga i le Fofoga o le Fono. Ia e muamua ona faafetai atu i le Ofisa o le Fono Aoao Faitulafono ona o le taumafataga ua uma ona tali foi le sua a lau Susuga i le Fofoga o le Fono, aemaise foi o se faasiligamalosi ia i le Afioga i le Palemia aemaise foi o sui usufono o le tatou Palemene.

Lau Afioga i le Fofoga Fetalai, ae le i faaauuina se faamatalaga, e ao lava ona avatu si mataupu lau Afioga i le Fofoga o le Fono e faamalamalama ai ia le tulaga lea. Ia mo le silafia e le atunuu ma tatou, o au nei o le sui usufono o le HRPP, o sui usufono uma lava ia o le tatou Vaega Faaupufai. A oo foi ina lauga sui usufono taitasi o le tatou Vaega, ia e i ai lava ia sui usufono foi o le tatou Vaega e fia lauga lava latou i mea e fia faalogo i ai le toeaina. Ia ae i ai foi isi sui usufono, ia e lauga lava i lou iloa ona....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o se mea e fia faasao.

FOFOGA FETALAI: Ia, malie le sui usufono...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: E le o taofia sui usufono e fia saunoa i se mea e finagalo i ai, o le aiatatau lena ma o le Vaega foi lenei o le Vaega e Puipuia Aia Tatau a Tagata. Ae o matou nei, e le o ni vale, lea e nonofo atu i totonu o le Kapeneta.

E amata mai loa le lauga e matou te faalogologo atu e i ai ni mea ia, ua e iloa le lauga e lauga e manino luga ae taavilivili lalo. Na amata mai lava le saunoaga a le sui usufono o faaoloataua. E pei e a foi e uu foi lele ma feato. E le o maua mai la e tua ae o lea ou te faitau lelei atu lau lauga, talanoa mo mea o paketi e le paleni. Talanoa i tupe gaugau. E alu le aso lenei, o ou talanoa atu i le mea lena, i le sese o au mataupu ia e aumai. Ae o lau matau, sa ou nofonofo lelei lava, ae ua fai lava sina matuia tele o lau mataupu lea na aumai.

O le mea la lea, e te fou mai i totonu o le Maota lenei. O le mea la lea, e le taofia saunoaga o lea ou te iloa e sao ma o lea foi e aumai i auala lelei ma aloaia. Ae a sau loa le ituaiga saunoaga lea e tatanu mai ai ma agaese ma mea faapena, o le mea la lena e le tuufilemuina e au.

E lelei nei fonotaga e le pei o fonotaga na fai 1982, 1983, 1984, 1985 i taimi faigata na, ao upu na oo i ai e matua maoae lava upu, a outou o ma vaavaai i faamauga o le Fono lenei, e matua maoae lava upu o felafolafoaiga na fai. E le i taitai oo i ai ia le tatou Fono.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le mea la lena, o upu ia ou te talanoa atu ai, a fuafua i upu na, e matua mama lava. Ae ono oo lava i ai le mamafa pe a le fautuaina sui usufono. Tusa lava po o sui usufono o le Vaega lenei, ae tatau ona ou faasaoina. O le vaega foi lenei e i ai lava tagata na o mai sao lava, o sui usufono o le HRPP. E i ai tagata na o mai o le fia sao mai, ae le o ni sui usufono e talitonuina le HRPP. O lea ou te matau lelei.

Lau Afioga i le Fofoga Fetalai ou te le i avea ma Taitai ananafi, e loloto lau vaai. Lau Afioga i le Fofoga Fetalai, ia o le fautuaga lena i le sui usufono, ae ou te tau atu ia te oe, e tele le taua o mataupu ia e te aumaia, ae i ai le upu foi lea o le pese, o le pese a le EFKS, *‘Aumai ma le matagofie ma le filemu, e toafilemu ai le loto’*. Ae a aumai loa i se auala foi lea e tauaaina ai le matagofie o mataupu, ia o le mea la lena o lea e tatou te i le Fono, o le Fono lenei e le milia faauu upu. E oo loa lava i le tulaga o le faasoasoina ma le lufilufiina o le oa a le atunuu lenei, e le mili faauuina upu. E tele lava le aoga. O le isi lena vaega o le mea lea o le grooming, o le tapenaina o Taitai o le Maota lenei mo le agai atu i le lumanai.

Ia lau Afioga i le Fofoga Fetalai, o le fesoasoani atu lena i le sui usufono.

FOFOGA FETALAI: Ia malo faafetai, ia atonu o la ua maua le fesoasoani i le saunoaga a le Taitai o le Malo, e tusa ai o le finagalo o le sui usufono. E pei foi lava ona o matou taumafai atu, ia aua foi le avea le naunauta, ma mea e afaina ai le tulaga o le faamanualia ai le finagalo o latou o e o lo o galulue. Aua e silasila foi, e le tasi se mafauaiga o lo o fausia ai ia fuafuaga a le Malo. E toatele ia i latou o lo o faapena ona.... silasila foi i luga o le nofoaga o malo ma e asiasi mai i le Palemene o lo o saofafai ai le fia sefulu, le fia sefulu o i latou o Ofisa Sili, o CEO ma ACEO o lo o faapena ona latou tapenaina ia lea vaega ma lea vaisua ia faapena ona fautuaina ai le Malo e tusa ai o faiga faavae, ia ma faatino ma galulue.

Ia ae o tatou, aua foi le faapea e fai se saunoaga ona ia manaia le faafofoga mai i tua, ia ae faapena ona faamanuaina ai le finagalo o i latou o e o lo o galulue i le agaga ma le faamaoni e saili manu aua le tapuaiga a le atunuu. O le matou fesoasoani atu lea, ae tulai mai le sui usufono, leai e manaia le see atu i se isi mea ia le saunoaga i le mea o lo o fia oo i ai, ia aua le faaleleia o le itumalo.

Afioga FAUMUINA ASI PAULI WAYNE FONG: Faafetai lava i lau Afioga i le Fofoga o le Fono, ia ua tau sola foi manatu lau Afioga i le Fofoga o le Fono. O lea lava sa faaali atu lava le manatu ia e uiga i le lauga, ia ae leaga e eseese le tilotilo a le Afioga i le Palemia, e ese foi le mea lea e taumafai atu i ai. Ae o le a toe faaauu atu lau Afioga i le Fofoga o le Fono, i le tulaga o lo o i ai ia le tatou....

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ona ou oo mai lea i le tatou vaalele, Samoa Air Ways. Ia lau Afioga foi i le Minisita, e tatalo atu lava i lau Afioga, ina ia vave ona maua ia se tatou vaa tumau, ina ia mafai ona faaauau ia faigamalaga foi a le tatou Kamupani vaalele, ia i le taimi lenei. Ia e silasila foi lea o lo o lisi ia le tatou vaalele, ma e toe fia fai ia se tatou lisi tumau, ina ia mafai ai ona maua ai se vaa tumau, ina ia mafai ona faaauau ai ia tatou galuega. Ia e fautuaina foi a lau Afioga i le Minisita, e lelei pe a tatou apply i le IATA, i le tulaga i le va i fafo ma le vaalele ina ia mafai ona o atu ia tatou pasese ma faaauau atu ai i isi atunuu. A o atu i Aukilani ia mafai ai ona faaauau atu ai ina ia mafai ona faatau ia le tatou ticket i isi kamupani vaalele e faaauau atu ai mo le lalolagi atoa. E taua tele aemaise foi ia le tatou cargo lau Afioga i le Minisita, ina ia mafai ona faaauau atu pea ia le tatou cargo i le vaalele ina ia mafai ona oo atu i tulaga i tua atu o Niu Sila ia ma Ausetalia. Ae taumafai atili lau Afioga, ia e manaia lava si vaalele lea o lo o i ai i le taimi nei, maimau e pe ana faapea o le tatou vaa lea. Ia na oo mai lea i...

Afioga Hon Lautafi Fio Selafi Purcell: Lau Afioga i le Fofoga Fetalai...

FOFOGA FETALAI: Ia, se i tulai mai le Minisita o Vaalele.

Afioga Hon Lautafi Fio Selafi Purcell: Leaga o lea ou te faalogologo atu lea ua lua sui usufono ia ua tulai mai, ia ua lua foi manatu lelei ua aumai ia aua le tatou vaalele. Ia faafetai atu foi i sui usufono mamalu i manatu foi ua tuuina mai. Ae sili lou tulai atu aua ou te lagona pe toatele lava foi nisi e fia saunoa mai i le mataupu lea i le tatou vaalele, i le faaleleiga o le tatou vaalele. E muamua lava ona faafetai atu i le lagolago a le atunuu ua faaalua i lenei taimi. O tulaga ua faaalua e sui usufono mamalu pau le faamatalaga e mafai ona fai atu i le taimi lenei, o tulaga uma lava na o lea e taumafai i ai le tatou Malo ina ia maua se tatou lisi tumau, maua foi ni tatou vaalele foi lea e mafai ona umi ona o tatou faaogaina, ae o lo o i ai nai faafitauli. A o lo o galulue lava le Matagaluega faapea foi o le Malo ina ia maua se tulaga foi lea e stabilize ai le tatou atinae lea i se taimi lata mai. O mea uma ia e saunoa i ai le sui i mea o uta ma le tulaga foi lea e faaauau atu malaga i isi atunuu. Ia o le tulaga lena o lo o tapena i ai, ae paga lea, e le faigofie foi tulaga ia, a o lo o galulue lava ina ia i ai se tulaga faapea, e pei ona silafia le tulaga o lo o aafia ai femalagaaiga a le lalolagi i le taimi lenei ona o le tulaga i le faalavelave na tulai mai, ua matua atili ai ona faigata ona faamautu se tatou vaa tumau, ona ua leai ni vaa avanoa. O le tala lava lena, ua leai ni vaa avanoa mo ni lisi uumi, ona o vaa ia sa tatou naunau i ai, o lea ua tapa i ai nuu e aumai, ona ua faaletonu le ituaiga lea o le MAX8 ma le MAX9 fleet, lea ua ground uma e le lalolagi.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ia, o tulaga na, ae o manatu uma lava e aumai, o mea uma a na o lea ua taumafai iai le tatou Malo ia lua ni tatou vaalele ia maua foi ni avanoa tatou te o atu ai foi lea ma faaauau atu ai lava i isi atunuu i le ticket e tasi le tatou faimalaga e le pei o le mea o i ai nei. Ia manatua foi na o le tasi lava si a tatou vaalele lea e taumafai, atonu i le agai i luma, o mea uma lava ia tatou te agai i ai.

O mea tau uta, o i ina lea e taumafai tatou vaalele ina ia tele ni tatou uta e ave aua e maua ai le tatou tupe maua. Ia o se faamalamalama atu lena lau Afioga ne i tei ua toe tutulai mai foi nisi, ae o manatu lelei ae sili ai le faamalamalama atu i le taimi lenei ona sefe ai foi lea o le taimi lau Afioga. Ma le faaloalo lau Afioga.

FOFOGA FETALAI: Malo. Ia o lea ua manino auofala i lea vaega. Malo faafetai. Ia, faaauau le saunoaga a le sui usufono.

Afioga FAUMUINA ASI PAULI WAYNE FONG: Faafetai lava i lau Afioga i le Minisita mo le faamalamalama. Ia taumafai atili ina ia mafai ona maua le tatou vaa.

Lau Afioga i le Fofoga Fetalai, i le tulaga lea i le Ofisa o Faiga Palota lau Afioga. Faafetai atu lava i le pulega o le Ofisa o Faiga Palota, ua mautu ma lelei uma le faataatiaga o faiga palota aemaise lava le tulaga i le resitalaina o tagata palota, o lea foi ua uma ona taatia uma tulafono e usitaia. Ae se i faamolemole lava, se i toe tagai ifo lava i le tuaoi o nuu e ala atu i le Matagaluega lea o Punaoa, se i toe tagai ane lava i le tuaoi o nuu ia e aafia ai, e pei o le nuu lea o matou i Tulaele ma Vailoa. E i ai lava le agaga o Tulaele e i le pito i sasae o le auala lea e i Tulaele, a o le pito i sisifo, ia o Vailoa lena i le mea o lo o i ai le aoga. A o lo o matauina e i ai isi e nonofo i Vailoa ae resitala i Tulaele, ae tuaoi ai Tulaele ma Vaiusu. E le mafai ona sau Tulaele tuaoi ma Vaiusu, e tatau lava ona tuaoi Tulaele ma Vailoa, Vailoa ma Vaiusu. A o le taimi nei, o lo o i ai isi o lo o resitala i le tulaga lea ina ia mafai ai ona faamalamalama le tulaga i tuaoi ia lau Afioga i le Minisita, e ala atu i le Afioga i le Minisita o le MNRE, aemaise foi le Afioga i le Komesina o Faiga Palota.

Ia, e i ai isi mataupu lau Afioga i le Fofoga Fetalai, ae ou te talitonu o le a gata ai ia i i, ua lava ia lea, leaga e fuafua atu foi, ia o le taumafai atu lava ina ia malamalama se mataupu ae foliga mai e le o sao ma uli foi le taumafaiga atu a lenei sui usufono aua foi ni manatu e taatia atu i ina, ae o le a o sao i le Minisita e patino i ai mataupu o le Fono i lenei aso.

E momoli atu ai foi le faafetai tele i lau Afioga i le Fofoga Fetalai mo le tauaveina o le tatou Fono i lenei aso. Ia manuia, faafetai.

FOFOGA FETALAI: Malo faafetai. Tulai mai lau Afioga i le Palemia.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai ne i te i ua galo i le sui usufono faatoa faamaui atu lona tootoo, e lua avanoa i totonu o le tatou Palemene e tulai ai le sui usufono, so o se sui usufono lava, o se mea e fia malamalama po o se mea e fia faasao. O le tulaga lena o lea e tulai atu ai au ma Minisita o le Kapeneta i se mataupu e fia faamalamalama atili ma se mataupu e fia faasao.

O mea ia e lua i lalo o le tatou Tulafono Tumau e masani ona auaoa i sui usufono e sausaunoa ae tutulai atu matou nei, e faafaigofie ma faamalamalama aua e leai se isi taimi e faasao ai. O upu lava masani, e tasi a le taimi e faasao ai se uamea pio o le taimi lea e vevela ai. E le faatali la matou se i uma a outou saunoaga ona faasao lea, e faasao atu ua le faalogologo mai isi tagata lea ua mauaa lo latou taofi i le faafogafoga mai i se saunoaga e moni le mea o lo o avatu e sui usufono. Ou te faamalulu atu foi i le sui usufono pe a matau mai i le tutulai atu o matou ona e oo loa i mataupu e ono atagia ai se faaiuga a le Malo po o faiga faavae a le Malo, e le mafai ona matou nofonono, matou te tutulai atu, e te malamalama foi i faiga faa-HRPP. A oo a ina tatou talanoa ae aumai se mataupu, e tali atu lava i taimi o tatou fonotaga. O le mea lena e taua ai lou auai i fonono, a o lea ua toetiiti atoa le fia masina ou te le i toe vaai lava ia te oe i fonono, o le ala lena e te le malamalama ai pea i mea. Ae ana e oo atu i fonono ona avatu ai lea o au fesili, e faigofie lava ona faamalamalamaina mea ia. Ou te faamalulu atu, e leai se isi taimi aua na o le pau lava lena o le taimi ou te tilotilo atu ai ia te oe pe a e le toe alu atu i fonono.

Lau Afioga i le Fofoga Fetalai, o le fesoasoani atu lea.

Afioga Faumuina Asi Pauli Wayne Fong: Lau Afioga i le Fofoga Fetalai, e leai e na ona faamalulu atu i le toeaina, i lona finagalo foi ua... e leai, a avanoa lava i fonono ua alu atu ae i ai foi tuatuaga faaleaiga e tataua ona oo atu i ai ua le saofia atu ai, a o faigamalaga isi mea lau Afioga. A o le mea ia, o le matuai ou fia fonono lava lau Afioga i le Fofoga Fetalai, aemaise foi le toeaina ia o le toe faamalamalama atu lea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le a ou taumafai ia ou te talitonu ma talia lau faatoesega. Ae pau lava le mea lena ia manatua, o le Malo e alu atu ai le upu faaiu i te i foi ua e toe tu ae mo le faaselau taimi, ae ou toe tu atu faaselaumaletasi. E leaga o i, e alu atu ai le upu faaiu i so o se finauga e fai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Malo faafetai. Ia o le agaga lena o lea sa taumafai atu ai le Nofoa, ina ia faapupula le vailiu lea e pei ona saunoa mai ai le Afioga i le Palemia, ua fai foi si pau i le Fofoga Fetalai ona tuuina atu le faanoi lea sa e faanoi mai ai ona o lau malaga i fafo i le le atoatoa o le malosi o le tino. Atonu o la e silafia e le Atua tulaga o avanoa faapea.

Mo le faapupulaga o mataupu nei, o lo o taoto i le tatou Tulafono Tumau le mea e fia faamalamalama ma le mea e fia faasao. So o se taimi lava e tulai mai ai le sui usufono e saunoa ae manatu le Malo e ao ona faamalamalama, e tulai ae le Malo e faauilavea i le faamalamalama ma le fia faasao. E maua foi e le sui usufono le avanoa e saunoa ai foi i le mea fia faamalamalama ma le mea fia faasao pe a saunoa foi le Minisita i le tulaga o le faamalamalamaina o se mataupu sa laga e le sui usufono mamalu. Ia ae manatua foi, o se faamalamalamaga o se mataupu o le saunoaga mulimuli a le Malo e faamalamalama ai se mataupu, o le saunoaga autu la lena e faautagia e le sui usufono mamalu.

Ae ona o le tatou galuega o lo o fai nei, e a le Malo e faamalamalama ma faamanino le faiga faavae o faataoto ai fuafuaga a le Malo ma faamanino i le sui usufono le mea sa laga, ae toe tulai mai foi le sui usufono e aumai foi lana faamalamalamaga. E pei o itu ia o lo o feluiai ai lea itu o le Maota, ia faatasi foi ma le Malo. Ona manatu lea e leai se tatou mea e maua ai i le faatautee ma le faatautu o finagalo, ae a tatou o lava i le tatou Tulafono Tumau, ona manino lava lea ma tofilemu le tulaga o le tauavega o le tatou galuega.

O le mea la lea e faamalulu atu ai foi i le sui usufono mamalu, ne i faapea mai le faafofoga a Samoa i le latou tapuaiga e ave avanoa i le Malo, ma o lo o tau taofiofi e le Fofoga Fetalai avanoa o sui usufono mamalu pe faapena foi ona taofiofi e le Malo mataupu e laga mai e sui usufono mamalu o le Maota. E leai e le o le itu lea, leaga e ao ona faasao e le Malo ma faamanino ma faamalamalama nisi o mea o lo o taua i le saunoaga a le sui usufono. Ae manatua e le sui usufono, o le saunoaga mulimuli e faamalamalama ai se mea o le saunoaga faaiu lena a le Malo. Ia ma le faaaloalo ina ia manino ai taualumaga o le tatou galuega aemaise foi o le faamaninoga i le tapuai mai a Samoa, ne i avesese e le atunuu le tatou galuega a mea o lo o taofiofi avanoa o sui usufono mamalu ae tafili saunoa le Malo i latou avanoa. Ia ona o lou lava finagalo lea ua faaiu ai lau saunoaga, ae faaiu lau saunoaga e toe sefulu ou minute. Ia ai ona o lou manatu e maua ou avanoa tailua foi lenei tai 15 minute ona maua ai lea o le 30 minute ona maua ai foi lea o le isi ou afa itula. O le mea la lea, tulai mai se isi sui usufono e fia saunoa.

Ia, e matau atu i le sui usufono mo Gagaemauga Nu.2, tulaʻi maia, tasi lea sui usufono tamaitai o le Maota.

Afioga Faaulusau Rosa Duffy Stowers (Gagaifomauga Nu.3): Lau Afioga o Gagaifomauga Nu.3.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: O Gagaifomauga Nu.3 faamolemole. Ua tau galo foi i le Nofoa ua faalelei foi le tioata.

Afioga FAAULUSAU ROSA DUFFY STOWERS: Faafetai lava i lau Afioga mo le avanoa. Na pau lava lea o le itumalo e lua sui usufono i totonu o le Palemene, ma o le matautia foi lena o le itumalo lenei o Gagaifomauga Nu.3.

Ae faatalofa atu i lau Afioga faapea le Afioga i le Palemia ma le mamalu o le Kapeneta ma Minisita Lagolago faapea sui usufono mamalu o le Palemene, Ofisa Sili o Pulega o Matagaluega faapea foi Faalapotopotoga Tumaoti a le Malo, faapea foi Samoa ua potopoto. I le faafogafoga tapuai mai foi a Samoa i ona tulaga faalupeina, ae ou te fia tautala foi i le Tulafono Tau Faaofi e pei ona opea i le Maota. Ma ou te amata atu i le sini autu o le Tala Faatatau o le Tupe e pei ona saunoa i ai le Afioga i le Minisita o Tupe, o le avanoa tutusa ma le talafeagai. E muamua la ona ou faapea atu, ou te lagolagoina uma le Tala o le Tupe.

A o le i oo atu la i isi faamatalaga, e ao lava ona ou momoli le faamalo ma le faafetai, ona o lea e atagia mai i totonu o le tatou Tala o le Tupe o Annual Reports a Ministry ma Faalapotopotoga Tumaoti a le Malo o lo o atagia mai ai i ina le alualu i luma o le taumafaiga a si o tatou Malo i ana atinae eseese. Ma e momoli atu ai le faamalo ma le faafetai i lau Afioga i le Palemia, le Kapeneta ma Minisita Lagolago, aemaise lava i latou o lo o aao i ai i le faatinoga o le galuega, i Ofisa Sili o Pulega o Matagaluega ma Faalapotopotoga Tumaoti. E ala ona fai lau tala lea, ona o lea sa matamata atu i le tuufaatasiga o le aotelega o le faagasologa o tupe a le Malo, o lo o atagia mai ai o lo o siitia a tatou tupe maua, actuals. E moni e le o ausia le tala faatatau na fuafuaina a o la e siitia le tupe lea e sau i totonu, ona oo atu ai foi lea i le tupe faaalu o lo o atagia mai ai o lo o faasaoina a tatou tupe i tupe faaalu, ma o i ina o lo o iloa mai ai o la e o lo o galulue le aufaigaluega, faamalo faafetai mo le atinaega ma le taumafaiga o si o tatou atunuu i atinae eseese o lo o faatinoina i le taimi lenei. E pei o se tala lena e avatu foi lea e faafiafia atu ai, e momoli atu ai foi lau faafetai i le quarterly report lea e aumai lava e le Matagaluega o Tupe i kuata taitasi. O i ina lea e aumai ai lava le current information lea e sau i totonu o le Palemene e iloa ai e sui usufono mamalu po o fea lea e agai i ai le tamaoaiga o le tatou atunuu. Ma o lea foi ua ou talitonu ai, o lea e agai lava ina lelei le tamaoaiga o le atunuu. O a foi ni mea o lo o fesouai ai le upega tafailagi, oka oka e ou te le iloa po o fea le mea e sau ai faavae ia. A o lea ou te talanoa au ia ona o lea e matamata i ai i tala ia e aumai i totonu o lea e faapepa mai ma fai mai e le Okika mea uma faapena. Ia, ae o nai motugaafa la ia e avatu i ina e matimati ai le tatou sa. Aua foi ne i tulai mai se Minisita po o le Afioga i le Palemia e faalavelave mai a o avatu nai motugaafa ia, aua e le o faapea o avatu ona o se isi itu, e avatu lava ina ia faaleleia atili ai lo tatou sa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E pei o le sini o le Tala o le Tupe, o le agavaa tutusa ma talafeagai, o i ina lea e faavae ai se manatu i le tulaga lea o le minimum salary, po o le totogi mauualalo lava lea e i ai i totonu o le tatou Malo. Pe i ai lava se auala e mafai ai ma tau siisii ae i luga le tatou minimum rate lea e i ai i le taimi nei. Ia maitaulia foi la o le tatou atunuu, o le tele ia o latou e moomia le fesoasoani i mea nei tau nonogatupe, ae na o le pau foi lena o se auala e mafai ai ona maua se atinae o se aiga, pe a faapea lena e leai ni o latou aiga i fafo po o tagata o lo o i seasonal workers. Na pau lea o auala e maua ai nai nonogatupe foi nei e o ai po o ni faalavelave po o ni mea faapena. O le mea la lea e agai i ai se faamatalaga, se faamolemole lava se i tagai ifo lava i interest rates ia ma fees ia e ta charge e lending institution mo financing institution ia laiti, aua ou te talitonu e leai ma se isi o i totonu o le Maota lenei e alu i ai i Ofisa ia e nono mai ai se tupe, na o tagata e mauualalo o latou totogi e agai i ai, faamolemole se i tagai ifo a i ai i le itu lena, pe mafai ona tuuitiitia pe faatulafonoina foi a latou fees o lo o charge i le mamalu o le atunuu.

Lau Afioga i le Minisita mo Aoga, matuai seki a lau mea lea na fai nei o le issue o le laisene e teach ai se isi e fia faiaoga, matua manaia lava. Po o fea le mea na sau ai lau paketi lena e fai ai au laisene? O le mea lea ou te tatalo atu ai i le taimi lenei, o le Minisita lea o Leoleo. O lona uiga o le Palemia la, pe mafai ona avatu se vaega o le paketi lea a le Minisita o Aoga, e avatu i ina i lau Afioga se i fai ai lava ni laisene foi nei avepasi ma ave taxi, tagata ia e faigaluega laupasese. Aua o le mea lea ua iloa nei, o lea ua faatolu nei ona ou lauga atu i le tulaga lea o taavale ia lau pasese, o la e lava e iloa mai le danger lea e i ai, a o le mea lava lea o le fesili atu a e fai mai e leaga taofi o pasi. E pei ona outou silafia le faalavelave tele foi lea na tupu mai Savaii o le matua matautia lava, a o le tala foi lena lea na aumai, e augani atu ai le sui faamolemole, fai se aoga ina ia mafai ona ave uma i ai avepasi nei atoa ai ma avetaxi, taumafai ai ona aoao i ai, o le commonsense lava la e le o i ai, e pei o lota ita lena malamalama faa-avetaavale, e ui ina leaga lau vaai. Ia, faamolemole lava lau Afioga semanu lea ta te i i lau Afioga i le Minisita o Aoga, o lata malae taalo lava la e....

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua oo tonu mai lava i le mea e tatau ona avatu ai se matou fesoasoani ne i te i ua toe auala mai ai nisi... E le o i ai se aoga e study ai nisi i le mea o le commonsense, le faaaogaina o le commonsense, ae masalo ana i ai se kolisi e faaaogaa ai tagata i le tomai lea, masalo ailoga e ofi. Ae o lo o i ai mea o Tulafono o lea e vaai i ai i le taimi lenei, ua uma foi ona i ai le faamoemoe ou te faatalatalanoa i le au tusi tulafono, o le mea lea e tupu i i e agai tonu a ia i latou e umia pasi ma le au avepasi, o i ina tonu lava le mea e tatau ona silasila totoa i ai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ma e tasi lava le auala lea e tatau ona tilotilo i ai, o le faasalaga ia mamafa faatasi ai ma le silasila totoa o le Matagaluega o Leoleo e faaoga out post ia e i tua. O le tele ia o a tatou pou e i tua, ae ou te le o iloa po o a mea a leoleo na o lea e fai. Ae tasi ia latou mea e tatau ona fai, o le o ane e tutu i le aualatele aemaise lava mea o pasi ia... Ia o le pasi lea na lavea nei e tolusefulu le pasese ae onosefulu tagata na ave ai. O le mea lena o lea e tupu, o le mea o le le faamaoni o mea o avepasi, e faigofie lava le mafuaaga, aua foi e aluatu ona ave lea o le 20 ma le tagata e ana le pasi ae tuu ma ia le pasese o le isi 40. O le mea lena o lea e tupu, o le mea o le faaososoga foi lea e mafua i le tupe. O lea la ua aumai sao lava lau fautuaga, o lea la ua ou toe apoina lau fautuaga ina ia atili faatau e le Komesina lea e nofonofo mai i ou tua, le Komesina o Leoleo, aua a ou le toe tu atu e toe polili lau mataupu ia taua, e masalo e le manatua e le Komesina pe a uma le tatou Fono.

O le ala lena e ala ai ona aua foi e te toatamai pe a tutulai atu Minisita, e ala ona tutulai atu o le toe polili atili o le taua o lau mataupu.

FOFOGA FETALAI: Malo faafetai. Ia e uso lava ma le saunoaga foi lea a le Palemia i tatou tama taaalo e o i le malae ae tuu i fafo le faiai, le commonsense. E faapena foi avepasi, e o e avepasi ae tuu i le aiga le faiai, le commonsense.

Ia tulai mai le sui usufono e faaauau le saunoaga.

Afioga FAAULUSAU ROSA DUFFY STOWERS: Faafetai lava i lau Afioga, aua o lau Afioga foi e i ai foi lau fale pasi. Ae o le saunoaga a le Afioga i le Palemia, leai o faauilavea lelei faauilavea ia, o mea o polili mai le positive notes.

Ia, lau Afioga i le Minisita mo le Soifua Maloloina, na ona tuu atu lava i ina pe talafeagai ai ona maua sina centre foi lea mo Aopo pe a talafeagai ai e afifio i ai, aemaise lava le aumatutua ona e taumamao mai i Sataua, ma i i Safotu.

Ia, ona ou oo atu lea i le tulaga o mea ia o le quality o products po o mea ia e faatau i totonu o faleoloa. O lo o matauina lava e lou sui usufono, e pei o le mea lea e tele i ai ituaiga oloa ia, e le o atu e kiliva foi ia e o agai i tua, e pei e te le maua tele i luga o le shelf o le faleoloa ae maua i kiliva ia e o atu i tua, ae ai la o le alu atu loa e kiliva alu i le faleoloa e le umi lava ona tuu i luga i le faleoloa ae alu aua o la e taugofie. Ae o lau tatalo atu i lau Afioga i le Minisita mo le Soifua Maloloina faapea foi le Minisita mo Pisinisi, Alamanuia ma Leipa, po o le a se faiga e siaki ai vaega, ia o le quality o oloa ia e faatauina aemaise lava la i le motu i Salafai i nuu i tua, ma nuu i tua iinei foi i Upolu, ona o nisi o oloa ua expire, a o na i nuu la e i tua e faaleiloa lelei le igoa o le expire ma tulaga faapena ina ia mafai ona i ai se malosiaga e mafai ai ona puipuia lelei oloa ia e faaogaina e le mamalu o le atunuu lea e nonofo i tua.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le isi mea lea na ou fia talanoa i ai, e i ai le aso na ou alu atu ai faatau lau sikareti, ae ou alu atu ua maua le sikareti foi lea e \$4. Faapea lava au o lea na pasia i totonu o le Maota le afa sikareti na siitia ai le tau i le \$6+ a o le taimi lenei, ua mafai ona faatau e le tagata pepa sikareti tai afa e lua i le \$10. Ae ou te manatu na ala ona fai le Tulafono lea ina ia discourage ai i latou mai le ulaula, a o lea ua maua e tagata le pepa sikareti afa i le \$5. Pe mafai ona toe silasila i ai lau Afioga i le Minisita i le vaega lea po o talafeagai tulaga ia ae pe le o solia ai foi se tulafono i le mafai ona faatau se sikareti i lalo o le tau lea e \$6+.

Ia na pau na o nai au motugaafa ia e i ai, a o se upu faaiu, ou te encourage atu i le Malo pe faamalosi atu i lau Afioga i le Palemia ma le mamalu o le Aiga Kapeneta ma le paia o le aufaigaluega a le Malo, ia toaaga pea e tau le taua, ona ua matua moomia lava nisi tatou atinae ona o lea ou te talitonu e i ai nisi atinae tetele lea e loma mai. O le atinae foi la lona o lea e i ai le matou uafu lea e i Asau. A tino mai atinae ia, oka, o le matua mea malosi lona pe a tino mai... ma le atinae lea i Asau i le faaleleiga o le uafu i Asau. Aua o lea e matauina o la e saunoa mai le Palemia, o la e i ai le metotia la e i ai e mafai ai ona talepe papatu la e i lalo o le sami e mafai ai ona ofi ai i totonu ma lelei ai loa le ava mai totonu o le uafu lea i Asau.

O le tatalo atu lona i lau Afioga i le Palemia ma le mamalu o le Aiga Kapeneta. Aua foi ne i faapea a fai atinae ona tele atu lea i Upolu, fai atinae ma se i tau manatua atu si o matou motu i Salafai, ae manaia lava le amata mai i ina i le uafu.

Faafetai tele lava i lau Afioga i le Fofoga Fetalai mo lou avanoa, faafetai atu foi i le tapuaiga a si o matou itumalo o Gagaifomauga Nu.3 mai Aopo, Letui, Sasina ma Fagaee mai ona tulaga faalupelupeina, malo le tapuai faafetai lava le tatalo mai.

E faapea foi ona ou momoli le faafetai tele i le aufaigaluega totofi a le Atua o lo o faapena ona galulue ai i le itumalo. Soifua ma ia manuia le Fonousu a Samoa.

FOFOGA FETALAI: Malo faafetai. Malo saunoa i lau Afioga i le sui usufono mamalu. Ia, ua maua foi lenei avanoa e tulai mai ai se isi sui usufono e saunoa.

Ia, tulai mai le sui usufono o Siumu. Malo faafetai.

Afioga FAALOGO IOSEFA SOPI (Siumu): Faafetai i lau Afioga mo le avanoa. E muamua ona faatalofa atu i lau Afioga i lenei itu o le aso i le faatautaiga o le Fono a Samoa i lenei itula, faafetai foi i le Ofisa o le Fono mo le faatinoina o tiute eseese aua le tautuaina o lau Afioga.

E faatalofa atu foi i lona Itu, i le afio o lau Afioga i le Taitai, le mamalu o le Kapeneta ma Minisita Lagolago o lo o afio mai i lona Itu. E faatalofa foi i lenei Itu i le afio o Taitaifono o Komiti eseese faapea sui usufono uma o le Palemene i lenei itula.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E faatalofa atu foi i Ofisa Sili o Pulega o Matagaluega ma Faalapotopotoga a le Malo o lo o tatou faatasi. E faatalofa atu foi i lea itu o le atunuu ua mafai ona afaatasi mai tatou te faatasi i le tatou Fonotaga i lenei itula.

Ia, e avea foi lenei itula e faatalofa atu ai ia Samoa atoa o lo o faafogafoga mai i lenei itula i le Fonotaga a lau Palemene, i le afio o Lana Afioga Mamalu O Le Ao o le Malo ma le Masiofo, le Sui Ao ma le Masiofo, ae faapea le lasilasi o Samoa o lo o faafogafoga mai i lenei itula.

Lau Afioga i le Fofoga Fetalai, e fia avea foi lenei itula e faatalofa atu ai i si ou itumalo o Siumu o lo o faafogafoga mai i lenei itula mai Siufaga seia paia Faletele. Nuunuu atu outou paia ma outou mamalu, ae o le a taumafai la outou sui usufono i se tatou sao aua le Tala o le Tupe o lo o i lumamea nei.

Lau Afioga i le Fofoga Fetalai, e muamua ona fia faamauina le faafetai i le Afioga i le Minisita o Tupe ma le Matagaluega o Tupe mo le tuufaatasia o lenei Tala Autu o le Tupe 2019/2020, faapea foi ma le Tala Faaopoopo o le Tupe Lona Lua o lo o i lumamea nei. E le faigofie la outou galuega, ae faafetai i le vaai mamao o lau Afioga, o lea ua tulai mai ai lenei Tala o le Tupe i lenei vaitau. E tagai atu i Tala o Tupe i tausaga ua mavae, e eseese lava sini autu sa faamoemoe agai i ai, e oo foi la i lenei Tala o le Tupe, ia faafetai mo le vaai mamao ma le faatautaiga a lau Afioga ua mafai ai ona tulai mai lenei Tala o le Tupe.

Lau Afioga i le Fofoga Fetalai, e fia avatu se fautuaga i le Minsita o Tupe. Se faamolemole, i se isi Tala o le Tupe o i le lumanai po o se Tala Autu o Tupe, se i ave lava se faamuamua i auala. E i ai le popolega o lenei sui usufono ona le tulaga ua i ai auala e iu ina te i ua le lava le tupe e faatinoina ai. Sa ou talosaga foi i le Minisita ae fai mai e avatu le talosaga i lau Afioga. O lea la ua avatu ai le talosaga, se i tagai lava i le Tala o le Tupe i le lumanai, se i ave se faamuamua i le tua o auala ona o le tulaga lea i le tagai ai a lenei sui usufono i le tulaga faigata ua i ai auala i lenei taimi. O le tele o auala, ua oo i le tulaga e iu ina toe fausia po o le reconstruct, ua oo i le tulaga ua le toe mafai ai ona toe maintain ona o le tala i le tau, o tatou e timu lava le tele o taimi ma le tuai foi o maintenance contract o lo o faatinoina lea matafaioi o le vaaiga o auala ma tulaga uma faapea. E pei o se talosaga lena e tuu atu i lau Afioga ina ia tagai ai i se isi Tala o le Tupe o muamua atu nei.

Lau Afioga, o le a amata atu nai manaoga o lenei itumalo i Afioga i Minisita. Ae le i avatua, e muamua lava ona faamalo i a outou Afioga i galuega fai o le tausaga faaletupe o le a uma atu nei, ae avatu ai ma se tuualalo, ia tatou toe taumafai i le isi Tala o le Tupe o lo o i lumamea nei aua le tautuaina o si o tatou atunuu.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E muamua lava i le Afioga i le Minisita o Galuega ma Auala Tetele. Ia o lenei lauga sa lauga mai lava i le amataga o lenei Paeaiga, ua oo mai lava i le taimi lenei, o lo o tuu atu lava talosaga nei i auala o si o matou itumalo, e pei ona avatu se faamatalaga muamua, ua tele ina oo i se tulaga ua le toe mafai ai ona toe maintain auala ia, ua tatau lava ona toe fausia auala agai i tai i le aai o si ou itumalo faapea le agai i le Coconut Resort. O auala ia ua matua oo i se tulaga faaletonu i lenei vaitau. E tatalo atu ai i lau Afioga se i tagai ane i ai. O auala galue latou, ua tauau ina le toe oo taavale a le aufaifaatoaga i uta ona ua le toe gafatia tulaga leaga o le auala ua i ai nei. E tatalo atu ai i lau Afioga, se i tagai ae i tulaga ia. Sa ou talosaga foi i le fall i si ou afioaga, ia o lo o faatalitali pea pe ono fausia lea fall ona o le tulaga a oo ina pa mai le vai, e le tafe soo le vai, ae a oo i le taimi e tafe tetele mai ai, ona afaina uma lea o aiga i autafa. O le mafuaaga, e fai si laitiiti o le paipa o lo o i ai e faaalua ai le vai, o le mafuaaga lena e sau ai le vai oso i luga ma faaleagaina ai le tele o aiga ma a latou meatotino i autafa o le auala. Ia, se i tagai ane foi i moli auala faamolemole. Faafetai mo le suavai o lo o lelei lava le suavai ma tulaga uma faapena.

Lau Afioga i le Tamaitai Minisita mo le Soifua Maloloina, faafetai i lou tulai mai i le Matagaluega fou, a o nai talosaga vaivai e tuuina atu, se i tagai ae i le taimi e fai ai au polokalame mo health centres foi ia, lena sa tuuina muamua atu le talosaga i le Minisita ua mavae atu i se health centre o le matou itumalo. O lo o i ai lava nofoaga ma le fale tuai o lo o i ai, pau lava le mea e toe fai o le toe faatunuuina pe a loto i ai lau Afioga.

E pau se tala e avatu i le paketi lea ua i lumamea nei, sa i ai se vaegatupe i lalo o paketi ua mavae atu sa faamoemoe lea mo le faamai oti po o le AIDS, ae ua ou vaai atu i le paketi fou lea ua i ai nei, ua leai se allocation o toe i ai. Ia e faafesili atu la po o le mea ua le toe i ai nisi o mamai i lea faamai pe leai ua ala ai ona le toe tulai mai se vaegatupe faaagaga mo lea vaega.

Lau Afioga i le Minisita mo Pisinisi ma Alamanuia, e fia faamauina lava le faafetai i le tatou vaalele o lo o faaaogaina i femalagaaiga i lenei vaitau. Mo le silafia e tatou, e le faapea e fai loa le vaalele maua le tupe maua, ou te iloa e sili atu i le lima i le sefulu tausaga ona faatoa tilotilo lea o tatou i se tupe maua e maua mai i lea tulaga.

Na o le tatalo lava ma le tuualalo, a maua se isi vaalele e faalua ai ua manaia tele, talosaga i le Malo, fai se talosaga i le Malo pe fai se loan i se mea aua se isi a tatou vaalele. Ia faafetai foi mo le quota scheme o lo o avatu ai tagata faigaluega i fafo mo galuega masani, ae pau si fautuaga e avatu, mo i latou ia e i ai trade foi ia lea e o i galuega faakamuta ma isi galuega i Niu Sila ma Ausetalia, se i tagai lava lau Afioga i totogi o le vaega lea ina ia i ai se totogi e ono fetauti ma ia trades people a tatou o le a faigaluega i galuega foi pei o Christchurch ma vaega i Niu Sila ina ne i te i ua faaaogaina e falefaigaluega ae le vaaia lelei totogi o si vaega lea.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Lau Afioga i le Minisita o Faiga Palota, e momoli atu le faafetai tele i le faiga fou lea ua faafoe ai nei faiga palota, o se faiga lelei tele lea sa lauga ai foi se isi o sui usufono, ia atonu o le a uma ai le tele o isi mau faafitauli na tulai mai i le lumanai, i le sau lava sili mai o ae oo mai i i ua toe pau i lalo.

Lau Afioga i le Minisita mo Faatoaga ma Faigafaiva, ia faafetai mo galuega uma mo lenei itumalo, o lo o lelei mea uma. Faafetai mo le pole foi lea mamao, ae pau lava se talosaga po o afea e faatino ai le pole lata mai lea i le aloalo leaga e toatele le aufaifaiva a matou i paopao ma nai vaa foi ia e mafai ona oo i ai i vaega ia.

Lau Afioga i le Minisita mo Aoga, na ona fia faamauina lava o le faafetai i taumafaiga o lo o i ai nei aua taaloga a le Pasefika o loma nei, faamalo i galuega i aoga eseese e amata mai lava i primary seia oo i luga i kolisi, manaia tele faiga o lo o fai ai nei ma tulaga faapena. Ia sa ofa atu lava lau fesoasoani pe a manaomia, o lea lava e avanoa lava pe a manaomia i se galuega aua le faatinoina o ou tiute i taaloga o lo o i lumamea nei.

Ia, lau Afioga i le Fofoga Fetalai, ou te manatu na o le pau ia o folasaga a lenei itumalo, ae lagolagoina tele e lenei sui usufono le Tala Faaopoopo Lona Lua o le Tupe o i ai nei ma le Tala Autu o le Tupe o lo o i lumamea nei.

Ae toe oo atu ai i si ou itumalo, ia, tapuai maia, atonu o le a fai o tatou auala ma fai uma mea o tou mananao ai i lenei tausaga faaletupe, aua tou te popole. Ia pei o le sao lena o lenei itumalo. Faafetai tele i lau Afioga mo le avanoa.

FOFOGA FETALAI: Malo saunoa faatoe-Ulutaia o le Maota e sau lava e leai se isi e faalavelave na o le faamau lava i lalo e le Kapeneta ina ia faatino le tulaga o galuega ma atinae. Malo faafetai lava i le sui usufono o le Maota. Ia o lea foi ua avanoa le Maota mo se isi foi sui usufono e fia saunoa. O le sui usufono mo Aana Alofi ea la e tau tulai mai pe leai?

Ia, o le manaia o le lauga nei aua e mafai foi ona toe lauga ai taeao i le amataga. Ia...

Afioga Tapulesatele Mauteni Tamasona Metuli II Esera (Vaisigano Nu.2): Lau Afioga, leaga ua ou tu atu ae le i saunoa mai lau Afioga. O lea lava e tauanau au e le vaega lea ou te tu ia i luga ae o lea e te le i saunoa mai. E a, a ou toe nofo i lalo?

FOFOGA FETALAI: Malo lava faafetai. Ia tulai mai le sui usufono mo Vaisigano Nu.1.

Afioga Tapulesatele Mauteni Tamasona Metuli II Esera: Se e faamalulu atu o le Vaisigano Nu.2. Ou te iloa lau Afioga o lena a e silafia ae pei o le tau galogalo, tulou le faamatalaga.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Tulai maia oe le Aiga o Mavaega, faapena foi Lealuga ma le falefa o Sataua.

Afioga TAPULESATELE MAUTENI TAMASONE METULI II ESERA:
E faafeiloai atu i lau Afioga i le Fofoga Fetalai, faafetai i lau faatautaiga o le Fono Aoa ma le Palemene o Samoa, e faatalofa atu i lena Itu i lau Afioga i le Palemia ma le Kapeneta faapea foi Minisita Lagolago. I lenei foi Itu o le Maota i le mamalu i alii ma tamaitai faipule. E faatalofa atu i le Afioga i le Faamasino Sili ma le mamalu o le Faamasinoga, le Failautusi ma le Ofisa o le Fono Aoa Faitulafono.

E faatalofa atu i Ofisa Sili o Pulega o Matagaluega ma Faalapotopotoga a le Malo tainane le mamalu o lo o sasao nei. Tulouna le faafofogaaga a Lana Afioga Mamalu O Le Ao o le Malo ma lana Masiofo, Sui o le Fono a Sui Tofia ma le Masiofo, tulouna le tapuaiga a Samoa i ona paia ma mamalu, e tumau e faavavau ae tainane le faafofogaaga a le Motu i Sasae. Le tapuaiga a le aufaigaluega paia a le Atua o lo o faanonomanu aua Samoa ae tainane lau faatofalaiga le Fono Aoa Faitulafono aua se manuia mo Samoa ma ona tagata. Le tapuaiga a si ou itumalo o Vaisigano Nu.2 i nai ou nuu o Papa, Sataua ma Fagasa.

Lau Afioga i le Fofoga Fetalai, na o nai manatu laiti lava ma le agaga faafetai e fia faaalua i lenei Tala Faatatau Autu o le Tupe 2019/2020, ma e lagolagoina e lou nei sui usufono lenei Tala Faatatau Autu o lo o i lumamea nei. Ae o le a agai muamua se faamatalaga e uiga i atinae e pei ona fuafua ma faatinoina i le tatou nuu ma le itumalo ma si o tatou atunuu. Lau Afioga i le Fofoga Fetalai, e fia faamauina le agaga faafetai ona o nisi o atinae po o galuega fesoasoani a le Malo sa faatalosagaina mo si o matou itumalo, ua talia ma ua faatinoina. I le tulaga i aoaoga, e momoli atu le faafetai i le Afioga i le Minisita o Aoga Taaloga ma Aganuu, le Minisita Lagolago, le Ofisa Sili o le Pulega ma le aufaigaluega. Na o nai manaoga o nai a matou aoga tulagalua, o si a matou aoga i Papa ma le aoga i Sataua e falelua ai ma Folasas. Ua maea faatino nei, ona o le lagolago mai. E pei lava ona silafia e lau Afioga i le Minisita le faatupeina o le faleaoga i Papa, auuala mai i le fesoasoani a le JICA. Ma e toe faafetaia ai le Malo o Iapani mo le silafia, i tulaga ua i ai lenei galuega. Ua faamaeaina nei le fausiaina o le faleaoga fou. O le tulaga i le faleaoga e valu ia potuaoga mo vasega taitasi. O le tausaga muamua se ia oo i le tausaga valu. Ona i ai lea o le potu mo tusi aoga ma aoaoga faakomepiuta, ma le potu mo faiaoga, e sefulu ai potu o le faleaoga fou.

Ae avea ai au nei e fai ma sui o si o matou nuu i Papa, i alii ma faipule, itupa o tina, le malosia o le nuu faapea le fanau, o le aufaigaluega paia a le Atua, e faaleo ai le agaga fiafia ona o lenei galuega taua.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E momoli foi lau faamalo i si o matou nuu o Papa, ona o le faatinoga o lenei galuega e pei ona gapatia ai. Ua maea faatino lava i le tulaga e pei ona i ai fuafuaga, e taumafai galuega ia uma i totonu o le sefulu i le sefululua vaiaso. A o se tala fiafia lena, ona e matauina foi lou sagisagi mai o lau Afioga i taimi uma foi e taumafai atu ai. E avatu ai le faafetai i lau Afioga ma si o tatou Malo.

E faafetai atu foi ona o le taliaina o le tatalo atu pea mo le faamautuina o le aofai moomia o faiaoga mo galuega, i nai a matou aoga ia e lua o Papa ma Sataua aemaise ai o le faaauuina o le tofiga o le Puleaoga e pei ona talosaga atu ai mo Sataua.

Ae avea ia lenei avanoa e faafetaia ai le alofa o le Atua soifua, ona ua ia alofagia nai fanau o le Kolisi o si o matou itumalo i Asau, ona o le faalavelave tau taavale na tulai mai, na manunua ai nisi o tamaiti aoga. E faafetai foi i e uma sa lagolago ma fesoasoani i taimi o puapuaga. O nai matua ma le faatautaia foi o le Matagaluega, ma le vasega o faiaoga ae faapea foi i le tapuaiga a auuuna a le Atua. Ma e tatalo pea ia toe maua le soifua maloloina ma le malosi i e uma sa aafia i le faalavelave.

Lau Afioga i le Fofoga Fetalai, i le tulaga i le Matagaluega o le Soifua Maloloina. Avea lenei avanoa e faafeiloai atu ai i le Afioga i le Minisita ma le Minisita Lagolago, i lo oulua tulai mai. E talosia foi le paaga ua tuanai atu, i o la tofiga fou ua galulue ai. O lea ua maea faataunuu fuafuaga a le Malo, ma ua tuu faatasia le Matagaluega o le Soifua Maloloina ma le Auunaga Faasoifua Maloloina. Ma e momoli atu ai le faamalo i Afioga i Minisita ma Minisita Lagolago i lenei fesuiaiga ma lenei tuu faatasiga. E faapea foi i alii ma tamaitai fomai, alii ma tamaitai tausii soifua, ma aufaigaluega uma o lenei tuu faatasiga. Ma o le tatalo atu a lenei sui usufono, ia sagai ane laia e faatino lo outou tautua, i le tomai ma le agavaa ma le faamaoni tou te masani ai, e galulue faatasi ma le felagolagomai aua le tausii ma le puipua o le soifua maloloina o nai o tatou tagata. E avea foi lenei avanoa e faafetaia ai fuafuaga a lau Afioga ma la outou Matagaluega, mo le i ai lea o fomai nofo mau, i falemai i tua. E molimauina foi le finagalo o le Pule Faatonu i lea tulaga, ona o se mataupu e taua tele i le mea o lo o i ai nei, e le mafai ona faatali se mai. Afai lava o le Aso Faraile lea e tuu i ai, e le mafai ona faatali se mai se i oo i le aso Faraile, afai lava o le Aso Gafua e ma'i i le Aso Gafua. I le tulaga i lea vaega, talosia ia, ia mafai ona faatino lea fuafuaga i lea tausaga, ia i ai ni tatou fomai nofo mau. Ae molimauina foi ma le faafetai le tulaga lelei ua i ai nei i le i ai lea o tausii soifua i.....e faafetai atu ai i lau Afioga ma le Matagaluega. O le isi manaoga lau Afioga i le Minisita, e faamanatu atu pea le tulaga i le faafaigofieina o le maua pea o a tatou fualaa ma vailaa mo gasegase, ona o le tau mamao tele i tua o nisi o falemai, e i ai le falemai i Sataua, e tatalo atu ai pea i lea tulaga i lau afioga.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le tulaga i le taavale laveai (ambulance) e taua tele ona moomia lea tulaga ona o le mafuaaga lava lea e tasi, e tau mamao tele matou. E tatalo atu pea e faaauau pea lea auunaga, o lo o i ai lava le taavale i tua i Sataua. Lau Afioga i le Fofoga Fetalai, avea foi lenei avanoa e momoli atu ai le faafetai i le Minisita o Galuega, Felauaiga ma Atinae Eseeese, Minisita Lagolago ma le Ofisa Sili o Pulega ma le Pulega o Felauaiga ma le Laueleele. E fiafia lava e faailoa atu, o lea ua faagasolo nei le teuina ma le faatatau o le auala e pei ona i ai foi fuafuaga a le Malo. E talosaga atu mo Fagasa, o se tasi foi o nuu o le itumalo. O lenei auala e nofoia lava e le toatele, o lo o i ai foi se falesa, talosia ia o le a faamaeaina e tusa ma fuafuaga i se taimi e le o toe mamao, mo le sologa lelei o felauaiga ma le fegasoloaiga o le nuu ma tagata uma.

E fia faamauina foi lau Afioga i le Minisita le faafetai, aemaise le Minisita Lagolago le Ofisa Sili ma le Pulega o Suavai, ona o le galuega tele ua faamaeaina nei. O le viliina o le suavai taumafai i Sataua, ma le taiina o paipa vai mo le suavai taumafa mo nisi o nuu o le itumalo. O lenei suavai taumafa ua matauina le magalo ma le mama. Ma o se tulaga moomia tele lea, aua le faatumauina pea o le soifua manuia o nai o tatou tagata, e ala lea i le taumafaina o vai taumafa magalo ma le mama. Lau Afioga i le Minisita, e faaleoina le faafetai tele mo nei atinae aoga ma le manaomia, e pei ona tali mai ai i talosaga sa tuuina atu. Ae taatia atu pea i sou finagalo faasoasoa, aua isi o matou aualagalua i Sataua ma Papa. Ae faafetai mo le tulaga foi e pei ona maua, atonu o le a maua le avanoa e isi auala i Papa, lea e faasolo atu i lenei Tala Faatatau Autu o le Tupe.

Ona faapea lea o se faamatalaga lau Afioga i le Fofoga Fetalai, e momoli atu le faamalo ona o galuega maeaea a lau Afioga i le Minisita o Tupe, le Minisita Lagolago, le Ofisa Sili o Pulega ma le Matagaluega, e faapea foi ona faaleo atu le faamalo i Pulega taitasi ma e uma na galulue, ma faatinoina manaoga manaomia mo lenei Tala Faatatau Autu o le Tupe 2019/2020. Ma e faafetaia foi le galuega taua a le Matagaluega o Tupe Maua. Lau Afioga i le Fofoga Fetalai, e faafetaia e lou nei sui usufono le tulaga e pei ona faailoa mai i lenei Tala Faatatau Autu o le Tupe, ua manino le aotelega o le tupe maua masani o lo o fuafuaina. O le a faatupulaia i le \$18.4miliona po o le 2.9%. Ua matauina foi le faamoemoe o le a tuutiitia tupe alu a le Malo mo atinae i le 3.3% e tusa lea ma le \$914.1miliona. O lea tulaga ona ua fuafua e faamaeaina nisi o atinae tetele, o lo o faatupe mai i le lagolago mai a na i a tatou paaga. E manatu foi e faailoa atu le loto faafetai i lenei galuega lelei, ona ua manino ma ua faailoa mai e lenei Tala Faatatau Autu o le Tupe, le lagolagoina lea e le Faalapotopotoga a le IMF o faiga faavae o galuega ma fuafuaga mautu a lo tatou Malo, aua lo tatou galulue ma taumafai ai i le atinaeina o lo tatou tamaoaiga.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E faafetai foi paaga uma a lo tatou Malo, o lo o lagolago malosi mai mo le faatupeina o le atinaeina o si o tatou atunuu. Ma e faamalo foi i Matagaluega ma Faalapotopotoga uma a le Malo, o Faalapotopotoga taitasi o lo o faagaoioia nei polokalame atinae.

Lau Afioga i le Fofoga Fetalai, e faamauina le agaga faafetai tele o lenei sui usufono, mo le finagalo o le Malo mo le fesoasoani mo ni nonogatupe mo fanau e le lava le faasoa a nai matua i le totogiina o aoaoga mo Iunivesite.

FOFOGA FETALAI: Toe lima minute o le sui usufono.

Afioga TAPULESATELE MAUTENI TAMASONE METULI II ESERA: Ma e lagolagoina foi, ia ave lea avanoa ia aofia ai ma aoga faamatata. O le isi tulaga o le fuafuaga a le Malo mo le toe faaleleia mo le fausiaina o le auala i Vaiaata. E amata atu i Fusi Safotulafai Sasae se ia aulia Patamea i Sisifo, se ia fesootai atu ma le auala laupapa i Samalaeulu o lo o fausiaina nei i le taimi nei. E faafetaia ai le Malo ona o lea auala, ua o se galuega i lou talitonuga ua leva ona tatau ona faatino. Ma e i ai le manatu o le avanoa lelei foi lea e silasila ai le Malo i le faaleleia o auala galue o nuu nei i le talafatai e fesootai atu ai, le auala lea i Vaiaata ona o lenei auala e le o i se tulaga lelei ma le atoatoa.

Lau Afioga e momoli atu foi le faafetai i lo tatou Malo i tulaga aloaia Faava-o-Malo. Aua e matauina lava le avea pea o si o tatou atunuu ma nofoaga e taulai mai i ai le vaai a atunuu ma faalapotopotoga a le lalolagi, mo le usuia mai ai o Fonotaga ma faatasiga eseese, faapea foi taaloga Faava-o-Malo e pei ona tapena nei. O le isi fesoasoani tele lea mo le siitia ai o lo tatou tamaoaga.

Ona o lea ua matau atu ua toeitiiti uma le taimi foi e pei ona finagalo i ai lau Afioga i le Fofoga Fetalai. Ou te toe faapea atu, e lagolagoina e lenei sui usufono le Tala Faatatau Autu o le Tupe 2019/2020. Ma e toe faafetai atu ai i le galuega maeaea a le Minisita ma le Matagaluega o Tupe.

Lau Afioga a o le i faauma atu le tautalaga, avea ia lenei avanoa e momoli atu ai faamanuiaga ma se faamalosiiau i le Palemia, i le avea ai ma sui o le autaaalo a Samoa. E moni lava e....ae matau lava lou naunau, lou taumafai e fai foi lea faagatama e siitia ai le tatou fua. Talosia o le pine auro o lo o e tausinio i ai. Talosia foi le tatou autaaalo uma ia maua ni nai pine e faafiafia uma ai. Ona faapea atu ai lea, ia manuia tele le tapuaiga a Samoa. Faafetai i lau Afioga i le Fofoga Fetalai. Soifua.

FOFOGA FETALAI: Malo, ua maea le saunoaga a le sui mamalu o Vaisigano Nu 2, ae o lo o maua lava le avanoa i se isi sui usufono e tulai mai e fia saunoa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le manaia o le taimi lenei ta te fia lauga ai lava, e lua avanoa e lauga nei toe lauga nanei. Ae ui i lea, leaga o lea ua tatou toai taunuu i le tatou malologa. Ona i ai lea o le manatu o le a faataatiaese galuega mo lenei taimi, tatou toe amatalia i le itula e 3 i le 7 i le afiafi.

Na faataatiaese Taulumaga a le Fono Aoaofaitulafono i le itula 12:52 i le aoauli.

Na toe faaauau Taulumaga a le Fono Aoaofaitulafono i le itula e 3:11 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2018/2019 ma le Tulafono Tau Faaofi o le Faatatauina o Tupe 2019/2020.

FOFOGA FETALAI: E faasilasila atu ua toe amatalia nei Taulumaga ma Galuega a le Fono Aoaofaitulafono.

Ou te manatu o le a faagasolo le tatou galuega. Ia tulai maia le sui usufono mamalu mai Salega i Sisifo. Ou te tapa lau Afioga i le sui usufono mamalu e tulai mai e saunoa.

Afioga TOOMATA AKI TUIPEA (Salega Sisifo): Faafetai i lau Afioga i le Fofoga Fetalai mo le avanoa, sa faatuatuai ona o au o se tasi o sui o le Komiti o Tupe. Ae ua matau atu ua tau faatauina gata le Maota. O lea o le a taumafai atu ai se sao o lenei itumalo e uiga i le Tala o le Tupe 2019/2020 ua i luma o le laulauafono i lenei aso.

A o le i faia sau faamatalaga, e muamua ona ou faafetai i le Atua, i lona alofa ma lona agalelei, ua taitai saogalemu mai lo outou soifua ma so matou ola, ua mafai ai ona faataunuuna galuega ua valaauina ai i tatou, tatou te faatino mo le lumanai o Samoa. O tulaga faalupe o le Maota o le a le oo i ai se faamatalaga, aua o mamalu ma paia e tumau e oo i le faavavau. O paia foi ma mamalu o Samoa o lo o faafogafoga mai, i nuu ma afioaga o le a nuunuu atu ia faatini o tausala. O le paia o Tama ma Aiga, Aiga ma Tama, Usoga a Tumua ma Pule, Itua ma Alataua, Aiga i le Tai ma le Vaa o Fonoti, tulou.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

A o lenei itula e le umi sau faamatalaga i le Tala o le Tupe leaga o le matou Komiti lea e ona le lipoti. Ae ou te fia faamauina le agaga faafetai o lenei itumalo i le Afioga i le Minisita o Tupe aemaise le Ofisa o Tupe, le Ofisa Sili ma le Pulega ia ma Ofisa Sili o Pulega uma o Matagaluega ma Faalapotopotoga a le Malo sa tofu sao i le faatulagaina o lenei Tala o le Tupe. I le vaai a lenei sui usufono, o le matagofie ia o le Tala o le Tupe ua faatulai mai. E le gata ua maioi lelei mai ai auala o lo o maua mai ai tupe, a o fuafuaga mamao foi, mo le faatinoina o galuega, e Matagaluega ma Faalapotopotoga a le Malo, aua lava le tautuaina o Samoa ma ona tagata. E le faigofie aua a tatou faatusatusa Samoa i le tele o atunuu o le lalolagi, o Samoa o se tasi o atunuu e utiuti lana faasoia, e le lava sona tamaoaiga aua e leai ni oa faalenatura, e pei ona i ai le tele o atunuu o le lalolagi. O lo o tatou faalagolago lava i tupe e maua mai i tiute, o lafoga aemaise o nai seleni o lo o maua mai i Matagaluega ma Faalapotopotoga a le Malo, e faatino ai le auaunaga a le Malo, i ona tagatanuu.

O lea e momoli atu ai le faafetai i le Afioga i le Taitai o le Malo, le Kapeneta aemaise o Minisita Lagolago ona o le lufilufi lima lelei ua mafai ai ona faatino. E le gata i galuega a Matagaluega aemaise foi nisi o atinae tetele ua outou molimauina. A faatusatusa lo tatou atunuu i atunuu tetele aemaise Venezuela, o lo o tafe ai le suauu, ma isi atunuu e tele oa faalenatura o lo o maua ai. A o Samoa lava ia, o le tatalo lava i le Atua ma le faafetai ma le faatuatua. A tatou faatusatusa i na atunuu e pei o Venezuela o lo o vaai pea le vevesi, a o lo o faulai lo latou tamaoaiga, ae ona o le valetuulima. O le mea la lea, e faafetai ai ona o le tapenaina o lenei Tala o le Tupe, e ui ina utiuti le faasoia, a o lo o taumafai e faamalie itu uma.

E moni lava o lo o fuafua atinae i tupe tatou te maua. O le mea e sili ia te au i le vaai atu i le faataatiaga o le Tala o le Tupe, o le tele o le vaega o le tupe, o lo o alu i totogi o le aufaigaluega. O lo o faaauu pea ia le vaega lona lua o le siitaga a le Malo e atagia ai le amanaia e le Malo o ona tagata, aua o tagata e tua i ai aiga i a latou galuega, aua lava le tapueina o fanau e tuuina atu i aoaoga, o le lumanai o Samoa aemaise o lana auaunaga, i so o se Matagaluega. O le mea la lea e momoli atu ai le faamalo ma le faafetai, i le taumafaiga e tapena lenei Tala o le Tupe, ua mafai ai ona faatino fuafuaga uma, e le gata i lana auaunaga faifaipea, aemaise o poloketi o lo o taumafai ina ia maua ai ni galuega a tatou fanau, aua o lo o faatupulaia pea tamaiti o lo o o i aoga ma iu mai, ae o lo o tau sue ni a latou galuega.

E le gata i lea, ua vaai foi le toatele o i latou ua le faaauuina a latou aoga, ona o le lava o le faasoia, vaivai le tamaoaiga a nai matua e totogi ai pili ae faafetai o lo o i ai foi le fesoasoani a le Malo, e fesoasoani ai i le totogiina o latou pili.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Faafetai foi i fuafuaga mo le auina atu o tatou tagata faigaluega i Ausetalia ma Niu Sila, ua vaai le tele o le tamaoiga e fesoasoani ai i aiga mo le atinaeina o le olaga faaleaso. Aua e moi lava i o tatou faatoaga, ae le maua mai ai ni tupe i aso uma. E le faapea e guarantee le maua mai o le tupe e tausii ai le aiga, e faigata foi le galueina, ae a maua mai foi tupe, e le lava le faaso. E oo foi i oloa o lo o aveina atu i fafo, e tele foi aiaiga o lo o tuuina mai e isi atunuu, ina ia faamalieina ai, ona faapena lea ona faaletonu le auina atu o fua o faatoaga i Niu Sila ma Ausetalia. Ae faafetai foi i ia taumafaiga a le Malo, o lo o auina atu ai tama fanau i latou o lo o gapatia i le tautuaina o aiga ma nuu, e le o mafai ona maua ni a latou galuega, i Ofisa, Kamupani ma le Malo e faapena ona faatino ai le latou auunaga ma le tautua i aiga, o nuu ma Ekalesia faapea le Malo.

O le lagona lea o le sui usufono o Salega, e momoli atu ai le faafetai tele i fuafuaga uma ua faataatitia ma ua tino mai, a o lo o taumafai pea ina ia faatino nisi o atinae mo le lelei auiluma o Samoa ma ona tagata. Faafetai foi i le vaavaai atu i le Tala o le Tupe, i auala o lo o taumafai ai ina ia siitia pea tupe maua, taumafaiga a le Ofisa o Tupe ma le Ofisa o Tupe Maua, o lo o taumafai ai i se poloketi, ina ia mafai ona maua uma tupe o lafoga o lo o mafai ona maua e Kamupani, ma Pisinisi Tumaoti ma le Malo foi, ina ia faapena ona fesoasoani i le utiuti o le faaso. Atonu la i le vaavaai atu i le Tala o le Tupe i le faatulagaga o tupe maua, o lo o faasoaso e faatino ai ana galuega, e 3% le vaegatupe o lo o faalagolago i nonogatupe mai fafo, e na o le 3%. Ia ae o le tele o tupe o lo o maua, e maua mai lava i auunaga i totonu o le lotoifale ma meaalofa mai ia tatou paaga mai fafo, o lo o limamafola mai i lo tatou vaivai. E moni o fesoasoani mai fafo, e le faapea na ona tafe mai ma tuulima mai, ae ua ala ona mafua ona faigofie le maua o nei fesoasoani, ona ua talitonuina le Malo ma ana pulega, ua mafai ai ona faigofie ona maua o nei fesoasoani. Semanu tatou te le maua, pe ana faapea e le faatuatuaina le faigamalo, le taitaiga a lau Afioga, ma le mamalu o lenei faigamalo ua mafua ai lea, faafetai.

Pau lava o lea, ia faaauuina ma faateleina pea, i le lumanai e fesoasoani mai ai i lo tatou lima vaivai ma faigofie ai ona faatino atinae mo le lumanai manuia o tatou fanau, aemaise tupulaga o lalovaoa. I le vaavaai atu i le Tala o le Tupe, faafetai mo vaegatupe ua fuafuaina mo le atinaeina o aualatetele ma aualagalua i le motu tele i Salafai, aua e le po se lilo o le tele o nei vaegatupe ua fuafuaina, i totonu o le Tala o le Tupe, o totonu lava o Upolu nei. Ae le fesiligia lea tulaga, aua o le tele o atinae ma auunaga o lo o faatino i totonu o le motu nei o Upolu, o lo o i ai le taulaga. Ae pau lava o lea, o le tagi lava a le Pumate lau Afioga i le Taitai o le Malo, le Kapeneta e auala atu i lau Afioga i le Fofoga Fetalai, faamolemole se i silasila i le atinaeina o le motu tele i Salafai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ua 57 tausaga talu ona tutoatasi lo tatou Malo, matou te talitonu o lo o taumafai le mea e mafai e le Malo, ina ia atinae le motu tele i Salafai, aua e masani lava ona ou faalogoina le upu, o le mea e lelei i Upolu e faapena foi ona lelei ma suamalie i Savaii ma nuu i tua. O le ala foi lea o le toe faalatalata atu, 57 tausaga talu ona tutoatasi le Malo o Samoa, pe le i alagatatau ea ona silasila lau Afioga po o le a se auala e vave ai le atinae o Savaii, ona o lo o tele ma faatupulaia pea tupulaga ma i latou o Savaii o lo o autovaa mai lava i Apia nei mo aoaoga. E le gata i lea o galuega ona avea lea ma mafuaaga ua pei o le a leiloa ai lo matou faasinomaga, aua foi ua seasea foi oo i Savaii. Ia ae faafefea ona o iinei o lo o tafe ai le meli ma le susu. A matou nonofo la i Savaii ae o fea mea o le a maua ai mea matou te tua i ai? Ae na ona faataatia atu i ou tafatafa lau Afioga e, faaauuala atu i le Afioga i le Fofoga Fetalai, se i silasila totoa i lea tulaga.

O lo o i ai le uafu i Asau, masalo ua faafia ona ou faalogo i aso ia ae ou te le i sau i le Palemene, o le a fai ai le faleia, o le a fai ai ia isi atinae, ae faafetai sa e saunoa, e mafai ona tui le papa lea, auala atu ai vaatetele i totonu o lea taulaga, e maua ai galuega ma fai ai nisi fale gaosi oloa. Afai foi e faigata Asau, o lo o i ai foi Salelologa atonu e faigofie, o lo o tatou faipaaga ma Saina ae talosaga i ai, atonu o le aoga lea o le auina o matou i Saina matou te tilotilo i atinae tetele o lea Malo, e sau lava le auala laupapa i le isi motu alu atu i le isi motu, alu atu i le isi motu. Lau Afioga faamolemole se i taatia ane i tafatafa o le Malo, ia vave ona atinae si o matou motu, e foia ai lo outou tusitusilima ia te i matou.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o se mea e fia faamalamalama.

FOFOGA FETALAI: Malie le saunoaga a le sui usufono, tulai mai le faauilavea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: O le lua ai lea o sui usufono mai Savaii ua saunoa i le mataupu lenei. Ma e taua tele le faafogoga mai a lo tatou Maota faapea foi le mamalu o Samoa o faafogafoga mai i la tatou Fonotaga lenei. Ona e le o toe na ma le laina le agaga o lo o uunaia malosi ai e lo tatou Malo le faaleleia o uafu uma nei a tatou. Aemaise lava ia uafu ia i Salelologa faapea foi ma Asau aemaise Vaiusu, o Aleipata faapea foi ma Mulifanua. Ua fai si tele o faatalanoaga ua fai, ma e i ai le faamoemoe po o le tausaga nei e tataua ona faamaea ai le final feasibility study, o suesuega ia ua mautinoa ai le tulaga i le faatupeina.

18 IUNI 2019

**Tulafono Tau Faaofi o le Faatatauina o Tupe Faaopopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ae ua ou taua le tulaga lenei ona o lo o toatele lava isi e le gata o lo tatou atunuu iinei, ae faapea foi ma nisi i Ausetalia ma Niu Sila, o lo o latou taumafai e ave ni faaupuga sese e faalauaitete. Ina ia faaleaga ai atinae tetele nei a lo tatou atunuu. Ou te manatu o la e iloa lelei lava e i latou nei e faia nei faasalalauga taufaavalea. O atinae nei a lelei uafu nei, e matua tele lava le tuputupu ae o le tamaoiga, aemaise lava le anoano o le mau vaa fagota o le a mafai ona afea ia afioaga nei, aua o le tatou ogasami e laititi, ae ono faaoga e fuavaa nei, i le o atu lea fagogota i ogasami ia e tu tuaoi ma tatou. E maua gofie ai le ia ma aumai faagaioi i Samoa nei, ia le tapenaina mo le faatauina atu i fafo. O la la e fai lava ma le iloa e nisi o lo o taulamua i le taumafai lava ina ia ave se feau sese, e ese le agaga lea e faaoga i ai uafu nei. Ona te'i lava lea ua tau ai, fai mai o le a o mai i ai fuavaa a Saina. O le a le mea o le a o mai mamao ai i Samoa, na o se atunuu faavalevlea faapea e filifili Samoa e o mai i ai. O le a o i fea, e taula i si nei tamai motu mamao ese mai ma mea e feoai ai vaa tetele.

Lau Afioga i le Fofoga Fetalai, o le malosia o saunoaga nei a outou mai Salafai, o le a fesoasoani tele lava e uunaia ai le mataupu lenei o lo o taumafai i ai lo tatou Malo. Ona e malolosi tele ia fefinauiga ia e fai, a malo tetele e pei o le a faaoga ai tamai malo laiti, ina ia avea o se mataupu e taula i ai a latou finauga ia e fai nei, cure political interest a malo tetele, ao lea o le a tauau ina faaoga atu ai a tatou tamai malo. Ae ua tau manatu ai ma isi ai e moni ia mea. O tatou tagata, o le mea lea ou te faafetai ai i le tofa mamao, lea o lo o agiga i le Maota lenei. Aua e alu mea nei i luga o faasalalauga, upega tafailagi, ma avatu ai i fafo le taua o atinae tetele nei. O Savaii e tataua ona faatau le atinae o Savaii, leaga o le motu pito sili lea ona tele, tele le eleele e tua i ai le atunuu i le lumanai. Lau Afioga i le Fofoga Fetalai, o lou tulai atu lea e momoli atu le faamalo. O ituaiga lauga ia e moomia e fesoasoani i lo tatou Malo i taumafaiga o lo o fai nei.

FOFOGA FETALAI: Tulai mai le sui usufono mo Salega Sisifo.

Afioga TOOMATA AKI TUIPEA: Faafetai i lau Afioga i le Palemia. E le lavea ai la ma matou i tagata na e faaleaga lo tatou atunuu, faamalulu atu. O le agaga lava ia lau Afioga ma lau taitaiga, matou te manaomia ia tulai mai ni mea ao e afio i ina. Aua tatou te le iloa po o le a le finagalo o le Atua, a ia tutupu mai nei mea, o tatou feola ma lou faaloalo lava.

Lau Afioga i le Fofoga Fetalai, ua matua lagona e lou nei sui usufono, le taua o atinae ua faatutuina mai ma faatulaga i totonu o le Tala o le Tupe. E pei lava ona ou fai atu, ona o au o le sui o le Komiti o Tupe, o le a le tele ai sau faamatalaga i tulaga o lo o i ai....sau se taimi saunoa le Taitaifono, ae na ona ou faailo atu.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O lena ua i lumamea le aano moni ma atugaluga o matou sui aemaise o lou nei sui usufono i le tulaga o lo o i ai pea Savaii i le taimi nei. O lea lava e matauina e le o nofonofo le Malo, e ui lava ina tele faafitauli tele luitau o lo o tulai mai, ae faafetai o lo o lava le tofa ma le faautautaga. E tele luitau, tele foi faitioga ua vaaia, ae faafetai e te le o amanaia. E pau lava le fautuaga a Salega, aua e te faamamafaina, aua le faamamafaina. Loloto lau tofa, tumau i le Atua, faatuatua i le Alii ona manuia lea o mea uma.

Pau lava o lea lau Afioga i le Fofoga Fetalai, ou te fia tautala i nai mea laiti o lo o i totonu o le Tala o le Tupe. O lo o vaaia se vaega tupe ua fuafuaina mo le faatulagaina o se poloketi mo le aoina mai o lafoga ina ia fesoasoani i le tatou lima vaivai. E faamalo le tofa mamao ma le faautautaga i le Matagaluega o Tupe ma le Matagaluega o Tupe Maua o lo o galulue faatasi ina ia tapue mai ai nai seleni ina ia oo atu i lea tausaga i le tala o le tupe, atonu o le a le tulai mai se 3% faalagolago i nonogatupe, ae o le a pau i le 1% po o le leai foi, pe afai e lava lava a tatou seleni o lo o mafai ona aoina mai auunaga i Matagaluega, ma tulaga uma faapena. Ae momoli atu ai le faamalo, ona i le vaavaai atu o lo o laititi lava se vaega tupe o lo o tatou faalagolago i ai i nonogatupe. Ao le tele o le vaega o le tala o le tupe, o lo o faatupeina lava i o tatou lava tupe o lo o maua i o tatou lima, ma fesoasoani mai tatou paaga mai fafo.

E toe faaluaina foi se faafetai ona o auala galue, faafetai i lau uo le Afioga i le Minisita o Galuega, o lea ua toeitiiti lava, faata le auala i Fagafau, o lena foi ua i ai talosaga ua uma ona tuuina atu, mo isi nuu. Ia oo atu i le taimi o le Palota ua uma ona auala ia, o auala laiti e le tetele, e le tele se tupe e alu ai.

Ae talosaga atu ma lou faaaloalo, ou te toe oo atu foi i lou ofisa, ou te tootuli atu, ina ia to mai sau pule faatasi ai ma se faatagaga a le Kapeneta. O lona lua, i le Matagaluega o Faamasinoga.....

FOFOGA FETALAI: Faaiu mai le saunoaga a le sui usufono ua maea....

Afioga TOOMATA AKI TUIPEA: O lea o le a faauma, ua ou usitai. I le Matagaluega o Faamasinoga, ua leva ona pasia se vaegatupe mo le fausia o se fale i Salelologa e see atu i ai le ofisa lenei. O se Ofisa taua tele e autovaa i ai Savaii, aua e le gata i le mamao i le alu i Sisifo ae faapena foi le alu i Sasae, ae manaia le ia i totonu o Salelologa. Ina ia vave faatino ia fuafuaga ina ia aua nei malaga mamao mai nai toeaia ma nai loomatutua, aua lava mataupu o o latou nuu e fia faaulu i le Ofisa o Faamasinoga. E manaia le tu i totonu o le taulaga i Salelologa, na ona oso lava i le pasi alu i tua, oso i le vaa sau i Apia. Ia oso atu foi o lo o i ai le faleaiga e oso i ai. E faapena foi e pei ona i ai i Upolu nei. E le gata foi i lea, e i ai si au mataupu, e fia tuu atu i tafatafa o le Minisita o Faamasinoga. O le mataupu atonu pe tatau ea pe leai ona faaleo i ou luma, ae taatia ia sei ou oo atu i lou ofisa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: E pei e manaia lena...

Afioga TOOMATA AKI TUIPEA: Ae faauma atu ai lau tautalaga ou te matua lagolagoina, 100% le Tala o le Tupe ua i luma nei o le Laulau-a-Fono. O le Tala Faatatau Autu o le Tupe ma le Tala Faatatau Faaopoopo (Nu 2) 2018/2019 ma le Tala Autu Faatatau o le Tupe 2019/2020.

Faamalulu atu i lau Afioga i le Fofoga Fetalai, pe afai foi ua paopapa se faamatalaga, ona o le naunau lava ina nei nofonofu gugu lenei sui usufono, ona le mafai lea ona iloa mea o lo o taumafai e fia faatino. Atonu e i ai se isi taimi ona toe maua lea o se isi avanoa ma lou faaaloalo lava.

FOFOGA FETALAI: Malo faafetai saunoa i lau Afioga i le sui mamalu. Matau atu i le sui usuofno mo Falealii e pei e tauolioli mai. Pe tau faasese ea le sui usufono mo Falealili. Tulai maia le sui usufono mo Safata i Sisifo.

Afioga LEAANA RONNIE POSINI (Safata Sisifo): Lau Afioga i le Fofoga Fetalai, faafetai ua maua se avanoa e faaali ai foi se manatu o lenei itumalo i le Tala o le Tupe. E muamua foi ona faatalofa atu i lau Afioga i le Palemia, Kapeneta ma Minisita Lagolago. Faatalofa atu foi i le tapuaiga a Samoa, aemaise foi o lou itumalo o Safata i Sisifo po o Safata foi aua o Safata o le aiga. O le a agai tonu se manatu i le Tala o le Tupe.

E muamua ona faafetai i lau Afioga i le Minisita o Tupe, faafetai tele ona e matau e le faigofie ia le galuega a lau Afioga aemaise foi o le Ofisa Sili o Pulega ma le Matagaluega i le tapenaina o le Tala o le tupe, e faapuupuu ai so matou manatu, matou te lagolago atoa i le Tala o le Tupe ua faataatia nei. E momoli ai le agaga faafetai, faafetai i le tauivi ma le ola galulue aua le tautua o le tatou atunuu. E le gata foi i lea, a o le lufilufiina o tatou tupe, aua le manuia lautele o lo tatou atunuu.

E muamua ona avatu pea nai manaoga o lenei itumalo, ona mulimuli lea o sa matou tala i le auaunaga lautele i lo tatou atunuu. E muamua ona faafetai i polokalame ia o auala galue, aua ou te talitonu o i lea e tua i ai lo tatou atunuu. Aua a leai foi ni auala galue e leai se mea e tua i ai i faatoaga. Lea ou te faafetai tele i aualagalue, e pau lava lea o nuu ia o lo matou nuu, o le matou nuu lea o Saanapu, o le nuu lea o se nuu tele. Ou te masalo foi e maua faamaumauga i totonu o fuagafanua, e tasi lenei nuu tele i totonu o lo tatou atunuu. E taua la i lau matau ona o se nuu e manaomia ni auala galue, o lo o i ai le auala galue o i ai, a o lau tau matau, ai seiloga e toe fai nisi auala faaopoopo ona o le tele o le laueleele, ae fua foi sou manatu ona o le tele o le talo lea e sau ai i le matou nuu, masalo foi a sailiili i e o lo o faia le talo lea e ave i fafo, tasi lea nuu o lea e malosi ai le tatou talo. Ou te iloa la, e tatau lava ona ave foi i ai se faamuamua i mea ia o auala galue ia.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O eleele foi ia o le matou nuu, o lo o sau lava eleele ia mai le sami e tuaoi ma le falepuipui lea i Tanumalala, ae ou te talitonu o se avanoa lelei foi lea mo e o lo o solitulafono ma faaaogaina fanua o lenei nuu, se faamolemole se i tulai ese ma aua le soli faatulafonoina o matou eleele.

O le isi auala galue o le matou nuu o le nuu lea o Vaiee. Silasila foi lau Afioga, tasi lea nuu e tele foi lona tamaoia i mea tau faatoaga, silasila ifo i ai i le tulaga o le faaleleia o le auala lea. Faafetai i le Afioga i le Minisita o Galuega i le matou auala lea i Sataoa, o le auala lea e agai i le tele o aiga o lo o nonofo ai, ae faafetai o lea ua saunoa lau Afioga, se i faaleleia le auala lea i le matou nuu o Sataoa.

E faapea foi le auala lea o Salamumu leaga o lea ua pasia le Tulafono o lea ua toe vaevae itumalo, e tatau a ona oo ai sau tala i le auala lea o Salamumu. O le matou nuu lenei o Salamumu tusa e fa kilomita le alu i tai, a o la ua ou asiasi atu i ai, o la ua fai atu le auala, ae ou fesili atu i ai na o le tasi ma le afa kilomita la e faagata ai le faataina. E tatalo atu i lau Afioga i le Minisita, e a pe a toe tuutuu atu i tai le faataina o le auala lea. Manatua foi lau Afioga, o lo o i ai le faletalimalo i ina, le Samoana Resort, o le tele ia o turisi o lo o agai atu i ai, ae pei o le mea lea ua tau le agai i ai turisi ona o le lauleaga o le auala. O lea e tatalo atu ai i lau Afioga i le Minisita, pe mafai ona toe faaopoopo atu le faataina o le auala lea i le agai atu i tai i Salamumu.

Ona ou oo mai ai lea i le matou falemai. E momoli atu le agaga faafetai tele i lau Afioga i le Minisita o le Soifua Maloloina, aua ua leva lava ona taatia le falemai lea o lenei itumalo, ae o lea ua matau atu o lea o le a faatino le falemai lea o le itumalo i Saanapu. O lea e momoli atu ai le agaga faafetai tele i lau Afioga i le Minisita. Na pau lava lea, o lau matau i falemai uma lava ia faaitumalo, e pei e tutusa uma le fauina ma le fausaga ma le tetele o falemai, ae pei ua tau maua i a matou sailiiliga, e pei ua tau fai lava si laiti o falemai. O lea e tatalo atu ai i lau Afioga, a faatino le falemai lea i Saanapu, e a pe a toe i ai sina fausaga ese mai, toe tau faatele teisi atu lava lau Afioga i le Minisita, ae momoli atu le faafetai tele ona o lea ua faagasolo le polokalame i le fauina o le falemai lea o le matou itumalo.

Lau Afioga i le Minisita mo le Siosiomaga, ia, e amata lava lenei Paeaiga o ou talanoa atu i mea nei o taligalu i le matou nuu o Sataoa ma Saanapu. O le taligalu lea i le matou nuu lea o Sataoa, masalo o lea o le a 20 tausaga o faatalitali le taimi e faamaea ai, ae ou te talitonu e mafai lava ona matou tauologologo atu i le Afioga i le Minisita, se i silasila ifo ona e mafua le matou talosaga, o le tele o aiga o lo o nonofo i tai i Sataoa Tai.

I le polokalame lea sa fai e le Ofisa o Faatoaga i le alamea lea sa fai le latou polokalame i le aoina o le alamea, e pei e tau matau atu ua le toe faatinoina le polokalame lea.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E tatalo foi i lau Afioga i le Minisita, lea foi ua apaapa nuu o lenei itumalo i mea o koko ma popo i le toe totoina lea o le laueleele aemaise ai le fai lea sa ta talanoa i ai, na pau le mea o le agaga faafetai foi lele ua ou le mao atu e aumai ta fai foi nei na talosaga o le matou itumalo, ona o lea ua saunoa lau Afioga foi lele, ona o lea o le a toe foi tatou i le fai lea. Ae toe faapipii atu ai le matou talosaga i ni fai o nai o matou itumalo e toe toto ai.

O le isi a matou mataupu lau Afioga i le Fofoga Fetalai, o nai moli auala ia lau Afioga i le Minisita. E tele foi nai taimi na ou taua ai nai moli auala ia, se i e fesoasoani ifo i ai i le Matagaluega.

FOFOGA FETALAI: Ia, se i tulai mai le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese): Lau Afioga i le Fofoga Fetalai, ia, ona o lea ua toe laga mai e le sui usufono mamalu lea mea o moli auala lea sa laga foi i le Tala o le Tupe talu ai. Ia na faamalamalamaga lea o le process e aumai le talosaga a afioaga i le EPC ona fai lea o le survey ona faagasolo ai lea o le galuega pe a faapea e moomia ni moli auala, ae le mafai ona talosaga mai i, leaga o talosaga e ave i le EPC ona tuuina atu lea e le EPC e i ai le komiti foi lenei e iloiloa talosaga ma faatino galuega. Ne i mea ane foi ua toe lauga mai se isi sui usufono aua o le lua lea o lauga ua taua ai moli auala o le faiga faavae lea a le Malo. A i ai la ni talosaga i moli, ona avatu sao lea o le talosaga i le EPC, aua e laga mai lava i i, a o faiga faavae na ma le process lena. Ma lou faaaloalo lava.

FOFOGA FETALAI: Ia, o lena ua faapupula mai e le Minisita nisi itu.

Afioga LEAANA RONNIE POSINI: Faafetai i lau Afioga i le Minisita mo le tali malamalama. Masalo sa ou laga ma ou lauga ai i le tausaga lea na tea nei, ae ou te le i lauga i le fonotaga a le tatou Palemene a ua oo atu le talosaga, o le ala lea o lou toe laga lau Afioga. O lea la ua ova atu ma le tausaga le talosaga ae le i maua mai lava se tali i lau Afioga. O le toe faamaninoga lea o lea mataupu.

O le mataupu mulimuli a i si o matou foi itumalo, pe le silasila totoa ifo le tatou Malo pe le ono fai se uafu i le matou itumalo, ona e taua atinae nei. Ia manatua foi o le matou itumalo i le taimi lea na fai ai le auala maligi i le 1947, lea sa ui atu i ina i Safata i Lotofaga vaa ia o le Maligi lea sa avatu ai masini se i silasila totoa ifo i ai le tatou itumalo, e aoga foi aua ua silafia foi o le matou itumalo e tele faletalimalo la e i ai, a oo i le taimi e afea ai e meli foi nei, ia ua taulalata foi i la itu. Ae le gata foi i lea, e tele ai foi galuega a le itumalo.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ona oo mai lea o se faamatalaga i le auunaga lautele. E muamua ona ou oo i le Matagaluega lea o Tagata Tafafao Maimoa Mai Fafo. I lau matau i le Matagaluega lea o Tagata Tafafao Maimoa Mai Fafo, i le taimi lea e oo mai ai i le malae vaalele i Faleolo ona ou ulufale lea i totonu o le fale, ona ou vaavaai foi lea, pe le tatau i totonu o le tatou malae vaalele lea ona tele ni tatou poster foi ia, mataaga e faailoa ai le tatou atunuu. Aua a sau le turisi foi lea e tasi le mea e sau ai ona sau lea pei e tilotilo atoa foi lea i totonu o le malae vaalele, e tele falauiloa i le tatou atunuu, ona sau lea e tasi pe lua mea e oo mai i ai le turisi, ae uma ifo pei ua oo i le fa lima mataaga, ou te talitonu e tau fesilisili atu ae fai mai e taugata le mea lea o le faapiiiga foi lea i le tau o le airport authority i le malae vaalele. Ou te talitonu o mea ia e fesootai ai tatou Matagaluega. E le taua le tupe e totogi e le isi Matagaluega i le isi Matagaluega ae taua le tatou vaai lautele foi lea i le tamaoaga o le tatou atunuu i mea e tele mai ai tatou turisi, i lau lea matau, aua ua ou sau nei na o le laupapa tele a le Digicel ma le Blue Sky la e i ai, ae o le manaia foi lea o totonu o le malae vaalele e tele mea o tatou faalauiloa, o mataaga o tatou faletalimalo...

FOFOGA FETALAI: Ia, se i tulai mai le Minisita mo Tagata Tafafao Maimoa Mai Fafo.

Afioga Hon Sala Fata Lisati Pinati (Minisita mo Tagata Tafafao Maimoa Mai Fafo): Lau Afioga i le Fofoga Fetalai, faafetai atu i le uso a faipule, e moni le saunoaga. Faafetai le taulagalaga i mea lelei. O le agaga lea o le tatou Malo o le tatou faimea faatasi, tou faasoa mai ma faapena foi ona outou tatalo mai ia i matou ma faapena foi ona avatu se tali. O le agaga lava lea e i ai le galuega o le tatou soosootauau ma o tatou faasoa ina ia taunuu i se taunuuga lelei. O mea uma lava ua e saunoa i ai i lenei aso, aua te popole, leiloa pe oo atu i lea vaiaso ua tumu atoa le malae vaalele i ata o Samoa. Ma le faaaloalo lava.

Afioga LEANA RONNIE POSINI: Ia, faafetai tele i lau Afioga i le Minisita. Ua iloa foi o le matou pitolaau o le taulogologo, a aoga i lau Afioga, faafetai tele.

Ia, ona oo mai lea i tagata nei e apalai mai ia tatou avanoa foi ia, tagata mai fafo lea e apalai mai avanoa i totonu o le tatou atunuu, aua ou te talitonu lava o lea ua i ai le tatou Matagaluega o le SQA, afai e tau masalomia mea tau tusi pasi ma faailoga o tagata nei mai fafo ona ave lea e siaki mai i ina, aua e pei e foliga mai ua i ai mea ua tutupu, o le omai o tagata mai fafo apalai mai i tatou avanoa, omai a o ni tusi pasi ma ni faailoga e le o aloaia mai, a o le mea e tau faalogologo atu o le fomai le tagata lea na sau ma faailoga, ana tiute nei i le falemai, ou te iloa e tele ni tagata e maliliu i le sese o togafitiga o tatou tagata. O le mea lea e taua ai, a o i ai nisi o le mamalu e tau apalai mai avanoa o le tatou atunuu, se i tau sailiili lelei mea ia o tusi pasi ma faailoga taualoa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ona oo lea o sau faafesili faamolemole lau Afioga i le Fofoga Fetalai, aua o lea ou te tau matau atu e \$600,000 le tupe a le tatou Malo lea na ave e totogi ai le fale foi lea o le Medcen foi lea i Vailima, po o i ai se fuafuaga a le tatou Malo foi lea, ua tau matau foi ua tele lea tupe. Ia ae lelei foi le taumafai o le tatou Malo, po o le a se mea e mafai ona tau atinae ai lea fale na alu ai le tatou tupe lea, ma toe maua mai ai le tupe ua mafai ona faaaluina.

Ona ou oo mai lea i le Faalapotopotoga foi lea o le Housing Corporation, faafetai foi lea i le Malo ma le mafuaaga sa faatu ai le Faalapotopotoga lea ma ua ou vaai foi lea i lau matau ua fale lelei uma le tele o tatou tagata ona o le faalapotopotoga lea a le tatou Malo i le faamamaavega foi lea. Na pau lava lea o lau tuualalo foi lea i lau Afioga i le Fofoga Fetalai, aemaise lava o nonogatupe foi nei, lea e tau e tatou e leai ni aseta e faamau ai pe oo i le \$20,000 ae pei e lima tausaga e te totogia ai le \$20,000 lea e faaopoopo i ai le \$11,000 ona \$31,000 lea o le tupe e te totogia atoa foi lea. A oo la i le taimi po ua lua tausaga talu ona e totogia foi lea a emaua sina ou manuia mai lou aiga mai fafo foi lea, e te totogia atoa lava le tupe lea, tusa o le \$20,000 ma le \$11,000 lea ona \$31,000 lea. Pe leai se fetuunaiga laitiiti i lea ituaiga fuafuaga a le faalapotopotoga. O lau fesili foi i le faalapotopotoga, pe fia se pasene o nai tagata foi nei e le o mafai ona totogiina a latou aitalafu i ituaiga loan ia e oo i le tai \$20,000. Pe fia se pasene. Aua ou te talitonu au ia, e taua e i ai foi taimi e faatupu manatu ai pe tele ni pasene o tagata e le o totogia a latou aitalafu, po o le mea o la e sologa lelei uma ia mea. Ae pei o si au tuualalo lena i le faalapotopotoga.

Ona ou oo mai lea i le Faalapotopotoga a le EPC, masalo na ou lauga ai le tausaga na tea nei na famamafa i lau lauga le mea lea o le saogalemu. E talitonu lava lau Afioga i le Minisita o lea foi ua ou matau ua i ai konekarate ia e ese mai le EPC ou te iloa ua galulue aemaise lava ia galuega i luga o le pou moli. Sa ou faamamafa i lau lauga i le tausaga na tea nei mo le saogalemu. A o lea la ua toe faamatu i tua galuega ia e faaogaina, pe e le o i ai se tulaga foi lea a le Matagaluega e faia ai ni aoaoga aemaise lava i le saogalemu, e le gata i le saogalemu a o le tagata ua matua foi o le soifua, leaga ou te talitonu lava e i ai le mea lea o le faatamala e tupu ai, ae o le apoapoi ma le tuualalo foi lea ia galue tagata i luga o poumoli ma tulaga faapena, o lea ua silafia e faigofie lava ona aafia i faalavelae ma mea e tutupu ai. O lau tuualalo, fai ni aoaoga a konekarate nei, a le pasia atu foi lele i faiaoga o lo o i ai le agavaa, aua le ave e faafaigaluega i luga o galuega ia, faamautu le ola saogalemu o tatou tagata i mea e ono tutupu mai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ua ou toe taua foi le mea lea o moli sulu o mea ia i taavale. Lau Afioga, i lau matau i le taimi lenei, e le o faaitiitia mea ia o moli sulu i taavale. Na pau lava le agaga faafetai o lea ua maoti i lalo o le Matagaluega a Leoleo le leoina ma le siakiina o taavale, aemaise le po, aua e le iloa i le ao, a o le po lea e feoai ai. O le tele la o isi taavale ua i ai moli sulu i tua, a oomi taofi foi nei, ae mumu mai moli sulu i tua foi nei. O le matua matautia lava mo le taavale lea e mulimuli atu ai i tua e ono tutupu ai faalavelave. Na ona ou toe tuualalo atu i lau Afioga i le Minisita, faafetai aua o le Ofisa o Leoleo lea ua 24 itula e galulue ai, aua pei o le LTA ia lea sa gata a i le 5 i le afiafi. Ae pei o le po lea sa faatino ai ua matua sa ai moli ia ona aumai i totonu o le tatou atunuu.

Lau Afioga i le Fofoga Fetalai, pe le o tau ane se finagalo o le Matagaluega o Leoleo, masalo po o le vaiaso lea na pasi atu lau taavale i le tuneva o le po, o mea o fale kalapu lea e taape i le 12 i le po. Pe le o i ai se avanoa i ina, pe le tatau ona fai ni poloka a leoleo i le taimi lenei, leaga ou te matau foi lele i le mea o le avetaavale onana lea e i ai. O le mamafa o lou manatu, o le saogalemu o le tatou atunuu aua e foi mai loa i totonu o le fale kalapu e onana ma feoai i le taimi lea, o le taimi lea e tapuni ai tatou fale kalapu o le taimi o le 12 i le po. Pe le o tau ifo i ai le finagalo o le Matagaluega pe le ona fai ai ni tatou poloka i le taimi lea. Aua o le isi taimi lea ta te maitau ta te sau i le taeao o nuti atu mea o atigifagu i luga o le auala, o lona uiga o le au onana ia, e onana lava ma velo fagupia i luga o le auala. O lona uiga o le au onana ia e onana lava ma velo atigifagu i luga o le auala ma afaina ai le feoai o taavale. O lea foi sa taua le tulaga lea o mea ia o taavale ambulance, o le taua ia i lau faitau aua e i ai le mai na tupu mai tua i Poutasi, e leai se taavale a le falemai, na faatalitali le alu atu o le taavale i Apia e alu agai i Falealili, e tele le taimi na alu ai ma faatalitali ai. Ou te iloa foi ua tele le afaina o le gasegase lea i le umi ona faatali, talu foi la e le faapea na o le falemai i Poutasi ma falemai, ae ua taumafai i falemai uma o itumalo e taumafai ai le tatou Malo ma lau Afioga i le Minisita ua seei mai nei, se i e silasila totoa ifo i taavale nei o ambulance faamolemole.

Ou te faafetai i le tatou Malo i le auala lea i le Loto Samasoni, le auala lea ua ou vaai atu ua faatino atu le alu atu i Maagao, ou te talitonu, manaia lau Afioga i le Minisita pe a faaauau atu le auala lea i Maagao alu atu i Faatoia ona alu atu lea i Vaiala Uta ma Moataa Uta e tau i Moataa, e mafai ona sau sao ai le tagata e agai mai Malifa ma agai mai loa i le falemai. Faafetai tele lava o lea ua matau atu o lea ua tau amata le tatou galuega lea, ou te iloa o lea ua saunoa lau Afioga e ono tatala le auala lea e le i amata taaloga a le Pasefika aua le tumutumu o le mamalu o le tatou atunuu.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le isi mataupu lau Afioga i le Fofoga Fetalai, se i toe silasila lava le tatou Malo i mea ia o faasalaga o tagata solitulafono. O lau matau foi i luga o le social media ma mea faapena, ta te faalogo atu lava pei e mea ota taliga i tala ma tuuaiga faapena ma mea e fai e le gata i lea mo isi lava mau solitulafono. Pe le toe silasila le tatou Malo i mea ia o solitulafono ma latou faasalaga e tataua ona fai i ai leaga o lea ou te talitonu foi, e tau malosi lava le aumai o mea mai fafo foi lea, a o le tatou e tatou te puipui lava tatou i le tatou tulafono. E le gata i lea, o le pulega a alii ma faipule o tatou afioaga e silasila totoa i mea faapea, aua e iloagofie lava tagata o le latou nuu lea e aumaia faasalalauaga le talafeagai ma le mafaufau i le faafogafoga a le tatou atunuu.

Ona oo mai lea lau Afioga i le Minisita o Pisinisi, Alamanuia ma Leipa, faafetai tele lava na ou sailia atua, e i ai le vaega foi lea mai fafo e omai e aumai le latou... le foreign investors foi lea, na ou sailia atua le mea lea o le FIC lea e issue e le tou Matagaluega, e i ai isi foreign investors e tai luasefulu lava tausaga o lea ua i totonu o le atunuu ae le i faatinoa lava ni mea i atinae na omai e fai. Ae faafetai o lea ua i ai le tou polokalame lea pe lua tausaga ma toe faafou ma toe sailiili i lou lea talitonuga e taua tele lea vaega i le sailiili a le tou Matagaluega i le tulaga faapena.

O le aoga lea a le Maritime a le NUS ma le Maritime lea a le Samoa Shipping Corporation lea na ou taua foi lau Afioga i le Minisita, pe le o fuafua lau Afioga e mafai ona tuufaatasi aoga ia e lua, aua e pei ua faatino lava e le isi aoga ma le isi aoga, o lea ua i ai le tatou aoga lea i le Iunivesite i le Maritime, e fai uma ai aoga ia. E tele foi tupe a le tatou Malo ma le Matagaluega e alu i le aoga lea a le Maritime a le Shipping Corporation.

FOFOGA FETALAI: Malo. Ua toe lua minute o le sui usufono.

Afioga LEAANA RONNIE POSINI: Ia, e le o toe umi o lea ua uma atu foi lau Afioga i le Fofoga Fetalai. O le isi mea lea ua ou matau lau afioga o kamupani lea e omai i inei, o le tele ia o masini foi nei o equipments ia e aumai i totonu o le tatou atunuu, ua faatau foi la e tagata e fai ai a latou gaoioiga i le faatinoga o latou galuega. A o le mea lea ua ou matau foi lele, e mafai ona latou aumaia ae sue atu parts foi ia, le maintenance o parts o masini nei, ae o mea o basic parts foi ia le maintenance. Se i silasila ifo i ai le Afioga i le Minisita i le mea lea o le aumai o masini ae leai ni parts pe a oo i le taimi e leaga ai parts. Afai o le pisinisi lea e fai ai ae tolu masini e taatia ai le masini lea, ua le mafai lava ona toe faagaoioi le pisinisi lea.

18 IUNI 2019

Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua

Ia, ona muliai atu lea o se manatu i le vaega lea o le Ofisa o le Vai, le Water Authority ona o lea ua matau foi lea i le fesiitaiga o le tau o le vai, ae manatua foi lau Afioga i le Fofoga Fetalai, o pili vai ia e avatu i aoga, aemaise lava i aoga tulaga lua ma aoga ia a Kolisi, pili vai ia e ave a le Aupaipisinisi e faaoga i ai le vai. A o lau tatalo i lau Afioga i le Fofoga Fetalai ma le Minisita, pe le toe fetuunai le tofa i lau Afioga i le Minisita pe le toe tuu pili ia aua o tatou aoga ia e le o ni pisinisi mo aoga a alo ma fanau, toe tuu i lalo i le isi vaega lea, e tuu i ai pili a tatou aoga ia pili vai a aoga tulaga lua ma kolisi aua e le o ni pisinisi.

Ia ona faaiu atu ai lea i lau Afioga i le Fofoga Fetalai, e toe tuuina atu ai le faafetai tele i le Afioga i le Palemia. O a foi ni o matou manatu e lafo atu i le tatou Kapeneta, ia o le matou taulogologo lea ma le matou faamanatu lea afai foi e aoga ma taua i a outou Afioga, faafetai tele e faaoga ai so matou foi manatu ma le taulogologo atu i a outou Afioga. Ia, ia manuia tele lau Afioga i le Fofoga Fetalai, manuia foi le tapuaiga a le matou itumalo. Ia manuia le Fono.

FOFOGA FETALAI: Malo faafetai saunoa i sui usufono mamalu mo Safata, le Aiga Malosi. Ma ua avanoa foi se isi sui usufono e tulai mai e saunoa.

Ia, malo, o le tala masani lava e masani ai foi le Palemene i le Tala Faaopoopo ma le Tala Autu o Tupe, o lea foi ua amata ona saunoa sui o le Komiti o Tupe, ae tapenapena pea lau Afioga i le Taitaifono o le Komiti, a tuai se avanoa e tulai mai ai se sui usufono ona tapa loa lea o lau Afioga mo sau saunoaga lafo loa i le Malo e tele foi galuega ma tiute e faagasolo ai le tatou Palemene.

Ia, se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le a sou finagalo ae amata loa ona matou tali atu nei, a tali tali foi ua toe maua nisi manatu ona toe faaauau mai lea o le la itu. Na o se tuualalo pe a e finagalo i ai ona matou amata atu loa lea.

FOFOGA FETALAI: Ia, e mafai lava ona tumau faavae ae sui faiga aua o le tatou Maota fou lea tatou te i ai, ia e mafai ona tatou amata ai faapena foi, ae o se isi e tulai mai e faaauau le..

Ia, tulai mai le sui usufono mamalu mo Salega Sasae. Malo. Se o le sui usufono lenei e alofa mai i le galuega a le Fofoga Fetalai o taumafai nei.

Tulai mai lau Afioga i le sui usufono mo Salega Sasae.

Tofa OLO FITI AFOA VAAI (Salega): Faafetai i lau Afioga i le Fofoga Fetalai ua maua so matou avanoa. Sa ta faatuatuai lava ona o le faaaloalo lava i nai a tatou sui usufono, ae le afaina, ua iloa foi a uma atu lava maua ma le Afioga ia Laauli ua uma foi.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ou te manatu lau Afioga i le Fofoga Fetalai o lea ua maea ona e sisi le atu mua o le taeao ua sola tatou te faafoi ai le faafetai i le Atua, aua o le Atua, o le Atua o Atua, o le Alii o le filemu, o le Faipule. E talitonu foi lau Afioga i le Fofoga Fetalai, o lea ua faalepa i fanua le foe o le aiga tautai i le afio o lau Afioga i le Fofoga Fetalai faapea foi le mamalu o sui usufono o le Palemene na faia mai le fuifui. I le ee mai foi o lau Afioga i le Palemia ma le Aiga Kapeneta faapea foi sui mamalu o le Palemene. Ia afifio foi Ofisa Sili o Pulega o Matagaluega ma Faalapotopotoga a lo tatou Malo, le mamalu foi o le au tusitala o lo o tatou faatasi ai aua foi le logologo puialii o taualumaga o a tatou galuega faa-Palemene. E faapea foi le tapuaiga mamalu a Samoa i ona itu taulagi ma ona itu faalupe. Ua faamalo le folau.

Lau Afioga i le Fofoga Fetalai, i lenei foi avanoa e avatu ai le faamalo i lau Afioga i le Minisita o Tupe faapea foi le Afioga i le Ofisa Sili o Pulega ma le Matagaluega atoa mo le tapenaina o lenei Tala o le Tupe, lea ua taoto mai i sona taotoga manino. Faamalo atu foi i lau Afioga i le Taitaifono ma le Sui Taitaifono ma le Komiti mamalu o Tupe a le Palemene, o lea foi ua aumai lo outou finagalo e ala i la outou Lipoti. Faafetai.

Ia e faapea foi ona ou faafetai atu i Matagaluega ma Faalapotopotoga a le Malo mo lo outou sao taua i la outou foi pitolaau e fesoasoani ai i le pueina ma le atinaeina o le tamaoaiga o si o tatou atunuu.

E faapea foi ona ou faafetai atu i pisinisi tumaoti o le tatou atunuu i lo outou foi sao taua i lo outou timuia ma laina ona o la outou lagolago mai i le tatou Malo ma le taumafai atu i se tamaoaiga lelei o si o tatou atunuu. E faafetai atu foi i atunuu uma, faapea foi faletupe o le lalolagi sa fesoasoani mai i tupe faameaalofa po o grants, o le matala mai foi o faitotoa e mafai ai ona tatou sulu atu i nonogatupe e faatino ai a tatou atinae ma le anoano o isi mau meaalofa eseese e le o mafai ona faitaulia.

E faafetai atu foi i tupu ma ee o Samoa uma o lo o papaaa o ma afifio i atunuu mamao i lo outou tautua aitaumalele ma lo outou sao taua i le tamaoaiga o Samoa. O le upu moni lava e tumatila la outou tautua, ae faamalo atu le fesoasoani mai, faafetai le alolofa.

Ae faapitoa lava lau faafetai i si ou itumalo o Salega Sasae i la outou tapuaiga leleoa, a o seu foi la outou auauna mo so tatou sao ia Manuvao aemaise le tau agaia o le tatou faigamalo malosi a le HRPP e 46 sui usufono. E le se tamai malosi le malosi lea e i ai, ae faafetai mo talosaga, faafetai foi mo la outou faamalosiiau.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Lau Afioga i le Fofoga Fetalai, ou te talitonu ua le o toe po se lilo i le faafogafoga a si o tatou atunuu i lana tapuaiga i lenei faamoemoe i le Fonotaga taua lenei a le tatou Palemene, lea ua tatou aleaga faatasi ai nei aloalo ma se i o tatou fesiitau atu o faiva aua ua ae manuia le alofaga. Talu ai ou te fiafia tele foi e faitau le Tusi Paia, ou te fia faaaogaina ai foi le taimi na aleaga ai Iesu ma ona soo. Fetalai Iesu i lana upu faamalosi i ona soo, òOu te faia outou ma faifaiva i tagata. E le i fetalai Iesu ou te faia outou tou te taumamafa i faiva o tagata, manino. Ia, e pei o se faamalosi lena lau Afioga i le Fofoga Fetalai i le tatou Palemene.

Ona ou oo mai lea lau Afioga i le Fofoga Fetalai i le Tala o le Tupe. O le a taotaota lava se vaivaiga o Salega i Sasae i le Tala Faaopoopo o Tupe ma le Tala Faatatau Autu, o lo o faaali mai ai ni mafaufauga ma ni a tatou matematega i le lumanai i mea e ono tutupu mo le isi 12 masina ma ni mea foi e le ono tutupu. Aua o ia mafaufauga e fua lava lau Afioga i le Fofoga Fetalai i le tatou faatino pe mafai ona ausia pe le mafai foi. Ae o le a agai tonu lava se matou tala lau Afioga i le Fofoga Fetalai i le taunuuga o ni mafaufauga i tausaga ua tuanai, pe sa mafai ona tatou faatino i le tausaga faaletupe lea na tea nei seia oo mai i le aso, aua o mea moni la na, pe sa faapei i se taunuuga o ni sini autu sa taulai i ai le faamoemoe o le tatou Malo aua se lelei o le tatou atunuu.

Lau Afioga i le Fofoga Fetalai, i le tausaga faaletupe 2016/2017, o le sini autu sa taulai i ai se vaai mamao a lo tatou Malo, o le fua o tatou manaoga i seleni e mafai ona tatou maua. Lau Afioga i le Fofoga Fetalai o se autu matagofie i le faalogologo ma le faafogafoga a le tatou atunuu, o se autu e atagia ai se tofa loloto ma se silasila mamao, atagia ai le alofa moni i le atunuu lenei. O le sini autu lena. Ona oo mai loa lea i le 2017/2018, e le i atoa se lima tausaga, ae toe suia loa le sini autu, fai mai ia faamalosi faiga faavae o le faamalosi o Tulafono. O i ina lau Afioga i le Fofoga Fetalai na ou iite ai, pei lava e i ai se mea ua tupu, atonu ua tatou soli le sini autu muamua e ala i le fua o le manao i seleni ua tatou maua. Masalo ua ou tau iloa i le taimi lena ua tau le mafai ona faatonutonu aitalafu. Ona sau loa lea i le 2018/2019 ua filifili ma le toa. Fai faaiuga ma le toa aua le toe popole i se isi mea po o a faamatalaga, fai. O le isi taimi ua ou vaai atu, ua le faia i le toa, a ua fai i le fia toa. Ia, e uma atu le fia toa.... a o la e pei ua tau....

FOFOGA FETALAI: Malie le sui usufono se i tulai mai lava le sui usufono mo Faleata i Sisifo.

Tofa Lealailepule Rimoni Aiafi (Faleata i Sisifo): Lau Afioga i le Fofoga Fetalai, masalo po ua toalua ai i i sui usufono ua lauga i le sini autu lea o le filifiliga ma le toa, leai o le sao o le faaupuga lau Afioga, o le filifiliga ma le toa, lena e atagia i le faapapalagi. Ma le faaaloalo lava. Faafetai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Malo faafetai. Ia o la e la ua fesoasoani mai le sui usufono mo Faleata i Sisifo. Se i tulai mai le sui usufono mo Salega Sasae.

Tofa OLO FITI AFOA VAAI: Lau Afioga i le Fofoga Fetalai, e ala ona matou fai atu o le toa, leaga na saunoa le Minisita o le toa, e le o se toa. O lea la ma te taumulimuli atu ai aua o saunoaga a le Minisita e taua tele i le Palemene aemaise foi o faamaumauga o le tatou Fonotaga.

FOFOGA FETALAI: Se i tulai mai lava le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e i ai le komaliliu i luma o le a, masalo na misi ia oe le komaliliu ona suia atoa ai lea o le mea lena mai le toa i le toa. Ae afai ua misi ia te oe le faa-Samoa, ona e toe liliu lea i le faa-Peretania, aua o tatou Tulafono i totonu o le Maota lenei, a alu alu alu ua e le malamalama i le faa-Samoa aemaise a pe afai e te le i aoga lelei i le pi tautau lea e amata i le A, E, I, O, U, ae sa e aoga i le isi pi tautau o le Fa, Fe, Fi, Lo, Lua, e ono misi ia te oe le komaliliu.

Lau Afioga i le Fofoga Fetalai, o i la e faaoga i ai le mea foi lele o le commonsense mo le potu masani. E leai la se faleaoga e aoao ai le mea lena o le potu masani, ae e i ai le mea e te maua ai, e te maua mai i le faigaluega ma e aoao lelei ai i au mea sese sa fai, aua a tele au mea sese sa fai, ia, o i ina e te le toe faia ai ona ua maua lou potu masani, defined as experienced is learning by mistakes. E fai la si taugata o le mea lena, aua e le mauagofie e tataua la ona e silafia lelei ai, e ese a le toa o le to komaliliu a, ese le toa, o le toa. Ia o le fesoasoani atu lea i le sui usufono leaga ou te matau e le i lelei lana simile o le pi tautau, e le o le pi koso a o le pi tautau.

FOFOGA FETALAI: Ia, se i tulai mai le sui usufono.

Tofa OLO FITI AFOA VAAI: Lau Afioga i le Fofoga Fetalai o le mea fia faamalamalama ma fia faasao le Palemia. O le matou nuu, e tolu mea o Ekalesia eseese, e leai ma se Ekalesia e te le oo atu o la e saofai mai le faletua o le faifeau ma lana pi tautau e aoao ai tamaiti. E tolu la pi tautau la e i o i le matou nuu ou te faitau ai lava i aso uma. A o le mea lea o le toa ma le toa, a e toa e te toa. Ae a e le toa e te palaai. E leai lava la se eseese o mea na e lua.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e tele lava le eseega, a o le faalavelave, e pei lava e te le i soifua mai, e pei lava e ese le mea sa e soifua ai, faatoa e alu atu nei lava ananafi i o. Ua laki o lou sao mai, ua laki ona ua e sao mai ona ua le alu le toaina le la ua sau alu i Maa, ae ana alu, ua tupu le faalavelave ia te oe e te le sao mai.

FOFOGA FETALAI: Ia se i see ese maia.

Tofa OLO FITI AFOA VAAI: Lau Afioga i le Fofoga Fetalai, na o le tele o ana tala ae na te le mafaia mea ou te faia, aua ana ou matai i o i Lepa, e afu foi ia te au pe a ou alu i ai.

Lau Afioga i le Fofoga Fetalai...

FOFOGA FETALAI: Ia see ese mai le sui usufono mai le toa ma le toa.

Tofa OLO FITI AFOA VAAI: Lau Afioga i le Fofoga Fetalai, o le fautuaga lena a Salega lau Afioga i le Palemia ma le tatou faigamalo, taumafai e tau taofiofi mai i lalo a tatou aitalafu, o aitalafu a ia ou te fia talanoa i ai. E moni e fai aitalafu, ae se i tau tuutuu mai i lalo. O le upu a a le potu, oE sili si mea magumagu a o maua i le filemuö, e soifua fiafia o tatou tagata, mautinoa le umia e Samoa o lona saolotoga.

FOFOGA FETALAI: Malie le sui usufono se i tulai mai le faauilavea a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mataupu lenei ua ou talanoa soo ai, na aumai foi le tatou Tala o le Tupe talu ai, e tele lava le faasiliga ina ua uma ona totogi aitalafu. O le mea lena e te vaavaai i ai o le malosi e totogi aitalafu. E le taua le tele o aitalafu, aua o le tele o galuega ia e faatino, o galuega a na tau le atinae e maua ai galuega a fanau ma toe totogi ai aitalafu ia. Mo se faataitaiga; o le tatou malae vaalele lena sa fausia nei le fale faatali pasese i le nonogatupe mai le Malo o Saina. Faafetai i le Malo o Saina o lea ua faagasolo ona aoga le faaaogaina o le malae vaalele a o lea e le i taitai le taimi e totogi ai le aitalafu. Lau Afioga i le Fofoga Fetalai, o mea faapena, se o le faigofie ia. A o lea foi ua uma ona faasalalau atu i le fonotaga sa faia a le Vaega lenei, na o nai sene ia e alu mai tala taitasi e totogi ai tatou nonogatupe. O lea foi ua uma ona faataoto le Tala o le Tupe lea sa tufa atu ia te outou, uma ona aveese le vaega e totogi ai tatou aitalafu. Lua, uma ona faataatia ese le vaega e faagaioi ai le Malo.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Tolu, uma ona faataatia ese le vaega e faatino ai a tatou atinae. Ia se i silasila i le tele o le vaegatupe lea e totoe e faatino ai tatou atinae, a o lea foi e faagasolo lava a tatou atinae ia e faatupe mai tatou nonogatupe faifaipea i le tulaga o atinae e faaauu pea mo le tolu, fa, lima, tausaga, ina ia malamalama le sui usufono, ua fia nei tausaga talu ona fai le atinae la e i tai o le auala laupapa? E le i faia i se tausaga se tasi, o lea ua agai atu i le tausaga lona lua a o la e lava e fai, a o lea o lo o taatia le vaegatupe o le meaalofa mai Iapani e le o se nonogatupe o faatino ai.

Lau Afioga i le Fofoga Fetalai, e leai se Malo e aumaia se vaegatupe tele faapea faafoai pe afai ua latou iloa ua tele tele a tatou aitalafu ua le mafai ona totogi. O le ituaiga talaiga lea e te faia pea, e atagia ai lou le malamalama i mea tau tupe. Lau Afioga i le Fofoga Fetalai, o le tulaga lena.

FOFOGA FETALAI: Malo. Ou te fautuaina le sui usufono mamalu ina ia aua ne i tulai mai se faafinauga leaga o le faamalamalama mulimuli o le faamalamalama lena a le Malo, o le sui usufono foi ua leva ona i le Komiti o Tupe ua faapena foi ona lava lona silafia i le faagasologa o galuega ma le tatou Tulafono Tumau. O le mea la lea, malie le sui usufono see atu ia i se isi vaega o lea ua uma ona faamalamalama e le Malo le tulaga lea.

Tofa OLO FITI AFOA VAAI (Salega Sasae): Faafetai, faafetai i lau Afioga i le Fofoga Fetalai. E leai lava se ma faafinauga ma le Afioga i le Palemia. O le mea e faifaimalie, o le mea foi lea o le le malamalama i le faiga o tupe ma se faiga o.. se e tutusa lava ma le faiga o lau sefe panikeke la e fai i Savaii. E \$1,000.00 lau loan na fai ai lau sefe panikeke. Ia ae o le tamaoiga lea e talanoa i miliona, e pau lava lena o lona eseeseega, o le eseeseega i amounts, ae mo mea o sikaili lava e tasi lea e fai ai, e ta te malamalama lelei lava i ai.

Ae lau Afioga i le Fofoga Fetalai, o le mea lava lea ou te fautua atu lava, leaga e le na o au o lea ou te tilotilo i totonu i mea ia o aitalafu. Ae fai ia se poloketi ma se atinae, e talafeagai. Ia silasila la lau Afioga i le poloketi lea e aumai nei i le uafu i Vaiusu. E fai o le a le vaa e taula ai? Na o le faatasi ona sau le vaa i le lua vaiaso i tai o le a faaopoopo le isi piliona i luga o le isi piliona, e le fetai lea aitalafu..

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o lea e le i oo ina...

FOFOGA FETALAI: Se i onosai mai se i tulai mai se i saunoa le Palemia, onosai se i tulai mai le faauilavea.

18 IUNI 2019

Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
 – felafolafoaiga i luga o le faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: E le i maea le tulaga i tapenaga uma, silasila la i ai. O le tasi la lea tagata o lea e avea upu sese, leaga e faaipoipo le tatou atinae lea ma le atinae la e i Asau, ae o le Savaii.

O le mea lena e teena ai lea i i Vaiusu, ona faapea o Savaii la o le a faatu ai ia se uafu e o mai i ai vaatau ia. E faapefea ona ofi mai se vaatau i se tamai ava e fai mo tatou vaafagota. Lau Afioga i le Fofoga Fetalai, tasi la lea Savaii, o lea e galue mo le taofia o atinae taua lenei mo le atunuu. Na ona ou faapena atu, e lelei ona faalautele ia le faatofalaiga i lau Afioga. O lenei ua ou leiloa po ua agai i le fa ia au nofoaiga. E leai lava se mea lelei e te saunoa i ai. E na o mea leaga, mea leaga, mea leaga, ana faaoga tataou lou taimi i totonu o le Palemene lenei, masalo ua tele ni mea e tulai mai mo lou itumalo, ae na o le pau lea o mea e te sau fai. E na o le tete, tete, tete.

FOFOGA FETALAI: Ia, e faamalulu atu i le sui usufono, ua ou fautua atu, ia o le manatu lava ina ia mafai ona tauave ia le tatou galuega, ona e manatu e aua ne i tulai mai ia se tatou faafinauga. E pei lava ona e masani ai, o le faamalamalamaga mulimuli, ia po o le faamalamalamaga foi a le Malo ia o le final lena, faamolemole. Ia see atu ia i se isi vaega aua e tele lau tapenaga, ia ae o lea ua faamalamalama e le Palemia le tulaga lena, aua la le atugalua le sui usufono, aua le atugalua o lea e i ai Mose ma le Au-Perofeta. Ia ae silaisla i le toatele o le Kapeneta e toa 13 le Kapeneta. Ioe silasila i Ofisa Sili o Matagalua ma Faalapotopotoga a le Malo o i latou o laua, ioe lea latou te fautuaina le Kapeneta ma le Taitai o le Malo, i faiga ia ma taualumaga ia. Na o le sui usufono lava o Salega lea e saunoa i lou lava lea finagalo, ia ae malie, ia see atu ia i se isi tulaga lau saunoaga. E le o toe umi foi lou taimi.

Tofa OLO FITI AFOA VAAI: Faafetai i lau Afioga i le Fofoga Fetalai, leai e le na o au i le taimi lenei, o maua ma le Atua lea ma te au i le taimi lenei. E leai lava la ni mea sese i mea ia e avatu, o lau fautuaga lea e avatu i le tatou aitalafu, o le fautuaga foi lena a le IMF o lea e faatonutonu ai le Palemia ma lana Kapeneta, ina ia toe foi Samoa i lona tamaoaiga lelei. O le tele ia o le faaletonu lea e i ai, ae o le a ou le talanoa tele i le mea lea.

Na ou oo mai lea lau Afioga i le Fofoga Fetalai i taiala, i taiala tonu lava ia sa faatulaga mai i le vaitaimi ia e puipui ai ia lo tatou atunuu ma faatonutonu folau ai mea a lo tatou Malo. Na ou taunuu mai i le 2006 i totonu, e 40% o le tamaoaiga e faagata ai aitalafu, sau ai sau ai i le 2007, 2008 2009 e oo mai i le taimi nei, silasila ua ova ma le afa o le tamaoaiga lea ua faagata ai ia aitalafu, 53%. O le mea tonu lava lea e atugalua ai le IMF e fesoasoani mai ai i le Malo ua tu i le vanu o le ata o le oti ia le mea lea ua i ai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

FOFOGA FETALAI: Ia se i onosai mai le sui usufono, onosai mai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Se i ou fesili atu lava i le sui usufono, o e malamalama ea i le tamaoaiga lea e te talanoa i ai? Se i saunoa mai, o e malamalama?

Tofa OLO FITI AFOA VAAI: Ia, ou te malamalama lelei.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Se i saunoa mai. E fia miliona lea ua i ai le tamaoaiga?

Tofa OLO FITI AFOA VAAI: Ia e 2.2 lau Afioga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: 2.2 a? Pilonia? 2.2 a? Pili, piliona. Ia ua vaai la i ai, ia se i vaai la i ai lea ua 2.2 piliona.

Tofa OLO FITI AFOA VAAI: 1.1 piliona

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O le a le tulaga lea ua i ai Samoa? Lea ua siitia, siitia mai i le Malo mativa elo. E tatau ona ou taua atua upu na. Le Malo mativa elo na i ai, i tua atu o le tausaga e 2014. Lea ua oo mai i le 2014, ua siitia. E ai? Malo Afaatasi. Ua matua fai lava le lafo a le Malo Afaatasi, e le toe mafai ona toe taofia Samoa i lalo o faatulagaga o Malo mativa elo. Leaga o lea ua oo le tamaoaiga o Samoa, i le \$2.2 piliona.

Ia o le mea lena o lea ou te taua atua, e te fiu lava e gaga le tamai moa, ae i i ae lava. Lau Afioga i le Fofoga Fetalai, o le tulaga lena. E te fiu lava e te saunoa i mea ia, e le mafai lava ona nofonono le Malo e faasao ia ituaiga manatu sese ia e te aveva. Ia ae sau pea, ou te fiafia e sau pea ina ia silafia ai e le atunuu lou matua vaivai ma lou le malamalama i mea ia e te talanoa i ai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Ia malie le sui usufono, malie le sui usufono mo Salega. O le sui usufono foi o le sui usufono sinia. O lau Afioga foi o se sui usufono sinia o le Maota, ia aemaise foi o le leva ona e auai i le Komiti o Tupe ma le tele o Komiti o le Palemene. Ua lava foi lou silafia, ae e i ai lona eseeseega, ae i ai lona eseeseega e pei lava ona silafia.

O lea ua saunua le Palemia i upu tuusao, aua le faafofoga tapuai mai o le atunuu, aua o lea ua tatou see ese ma le vailiu lea na saunua ai le Palemia. O le mativa masaesae i se isi gagana lata mai. Ae o lou finagalo le sui usufono o Salega, o lou lava lea finagalo. O lo o mamafa ia oe lena tulaga, ae aua e te popole. Aua e te popole, lafo mai ia lou faatuatuaga i le Kapeneta ia ma le vasega o lauia la e afiio mai i o, o Ofisa Sili o Matagaluega ma Faalapotopotoga a le Malo, o lo o latou faia le sailiiliga ma aumaia le fautuaga, i le Taitai o le Malo ma le Kapeneta.

O le mea la lea, malie le sui usufono, ua ou musu e faamuta lou taimi ne i tuuaina au, ia e a oulua e felafolai ma le Palemia, ia ae tuuaina ai au i le tausiga o le tatou Fono. Ia ae manatua foi, e i ai le aiatatau a le Fofoga Fetalai e taofia ai se eseeseega e tulai mai po o se faafinauga e tulai mai i totonu o le Maota. O le mea la lea, malie e toe tasi lava le avanoa lea o le a ou tuu atua, ia ona faamuta lea o avanoa. Ioe, e faapena, ia ua iloa foi tatou e leai se tuaoi i totonu o le Palemene e lava a tatou kegi i fafo, a oo mai loa i totonu, fausia loa lea, malie e see atu i se isi tulaga.

Tofa OLO FITI AFOA VAAI: Lau Afioga i le Fofoga Fetalai, ia o lena e te maitaua mai, leai lava ni faapea ua ma vevesi tele po o a ni mea foi ia e... leai o lea e vevesi lava i luga o mafauauga i mea ia. Ia o lea foi na saunua mai le Afioga i le Palemia, ua fia le tamaoaiga ou tali atu 2.2 piliona.

FOFOGA FETALAI: Lau Afioga i le sui usufono mamalu, o lea ou te vaai atu o lena e eueu oe e Laauli, e pei e foliga o lena e te lua nonofo ma faaita le toeaina. Aua e te lua faaita le toeaina vaeatu le faafofoga a Samoa.

Tofa OLO FITI AFOA VAAI: O le manaia o le numera e 2.2 piliona le tamaoaiga, 1.1 piliona.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai, o le mea e fia faamalamalama, o le mea lena ua ou fiafia ai, o lou fesili atu ma tali mai. O lona uiga, o lea e fai malamalama lava lana mataupu. Ae tiga lava ona malamalama i mea ia, ae o lea e taumafai e aumai se mau e tuu ai i lalo taumafaiga lelei a le Malo. Ia o le mea la lea, taumafai pea, aua le taofia. Aua o le tetele o lou sau, o le tele foi lena o faamalamalama i le atunuu, ma iloa ai lava lou vaavaa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Tofa OLO FITI AFOA VAAI: Lau Afioga i le Fofoga Fetalai, o le 2.2 piliona lea i le tamaoaiga, na fufulu e aseta. 2.2 piliona po o le 1.1, o tupe uma lava mea na.

FOFOGA FETALAI: Malie le sui usufono, o lena faatoa sao mai lau tali, ae o lea na fesili atu le toeaina, ae sese lau tali. Malie le sui usufono, se i toe tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O le tasi lena mea e fai ma galo i le sui usufono, a tulai atu matou nei ona nonofo lea i lalo. Ae faalogo mai, o lea se i faamatala atu mataupu ia, lea ua atili aliali i i, ia le vaivai. Aua foi o aitalafu nei, e eseese taimi e totogi ai, o isi e faatoa totogi aua o uiga ia e aumai e 30 tausaga fia sefulu tausaga e totogi ai i le lumanai. E totogi atu mea na, ua leva ona fua mai ia atinae, ma toe soloia ai aitalafu nei.

Tatou te o mai i le Palemene i le tausaga 1982, e le o tele ni aitalafu. Ia ae o a mea na tatou o mai maua mai, ia na o patuamoa. Na o patuamoa ma le anoano o mau vaa e taunuu mai loa lava, taufao, aua foi ua gaogaoii ia fata o faleoloa, leai ni mea. A sau e fiu se toeaina mai tua e sue se taga araisa, se tasi se tagaaraisa, pe sue se pusaapa se tasi e ave e tau faatau i se faleoloa i Savaii.

Lau Afioga i le Fofoga Fetalai, o le eseese lena o mea. O le tatou atunuu lena i ola, ua ola le atunuu. Ma o atunuu uma lava o le lalolagi e oo ia Amerika, ia o le mea foi lena o lea e ola ai, e leai lava se atunuu o le lalolagi, e faalagolago i ana seleni. E le lava tatou seleni e fai ai, a lava seleni e fai atu i isi e totogi ia latou lafoga ae faasea mai.

Lau Afioga i le Fofoga Fetalai o le tulaga lena e faalagolago le atunuu lena i lafoga ma tiute o oloa. O lafoga foi le igoa o mea na. E le mafai la ona faalagolago tatou. Aisea? Aua a fua loa i mea ia ae o lea e tutupu ae, tutupu ae fanau, toe oo atu foi i le isi a tatou faiga palota ua toatele fanau a le atunuu ua 5 tausaga, 4 tausaga, 3 tausaga, 2 tausaga, tai tausaga ma pepe faatoa fananau mai. O a mea e tataua ona fai i fanau na? E tataua ona faaaoga, ae o le mea lea e te agaga i ai, na o aitalafu, aitalafu ae aua ne i aumaia ni mea, aua le faia ni atinae. E le faapena na fai ni Malo.

FOFOGA FETALAI: Malo faafetai, se i tulai mai le Minisita o Tupe. Malie lava le sui usufono o Salega se i tulai mai le Minisita o Tupe.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Afioga Hon Sili Epa Tuiofi: Faafetai lau Afioga mo le avanoa, o le tulaga ina ia faasao ia tatou faamaumauga i le tatou debt, tatou aitalafu i le faaiuga o le masina o Tesema 2018, e na o le 1.06 piliona, e tusa lena na o le 49% o le tatou GDP, a tagai foi la i le tulaga o le tatou tupe ia na faaalu i tausaga taitasi e pei o le faaiuga o Tesema i le totogiina o latou aitalafu, e tusa e 71.70 miliona pe tusa lena o le tupe lena o lo o tatou te totogia i tausaga taitasi i le tatou aitalafu. Ia e pei foi ona silafia o le vaega lea o lo o ave i ai le faamuamua i lalo o tupe faaalu faaletulafono o tatou aitalafu ia faapea ia tulaga o tatou statutory expenditures. O le vaegatupe tatou te faaaluina e totogi ai ia tatou aitalafu e tusa lena o le 11.5 % o tatou tupe ia e maua e i tatou i totonu o le tatou atunuu, lea e aoina e lo tatou atunuu. A fua foi i tatou foreign reserves, e tusa e na o le 16.1% o tatou foreign reserves a Samoa lava ia o lo o alu i le totogiina o tatou aitalafu. A fua foi i le tulaga o a tatou tupe foi ia e faaagaga mo le faatauina o tatou oloa e avatu i fafo ma le faatau mai i totonu e na o le 8.9% tatou te faaaluina i le totogiina o aitalafu.

O lona uiga o lo o lava ma totoe le tatou vaegatupe, o lo o mafai ona tatou totogiina ai a tatou aitalafu. O le tulaga foi ua tulai mai, o lea ua agai i lalo a tatou aitalafu. O le vaai i ai ua faagasolo mai i lalo ua le o toe i luga i le 50%, o lea ua faasolosolo agai i lalo i le 47% 45% le agai i luma. O lona uiga o lo o matauina pea lava e le Malo ma le faaeteete ia le tulaga o tatou nonogatupe. E tatau foi ona silafia e sui usufono o le Palemene, na ala ona maualuga a tatou aitalafu, o le tulaga o taimi foi lea sa afatia ai tatou, ma manaomia ai le toe faaleleia o tulaga o atinae tetele, aemaise lava i auala ma tulaga faapena.

O tulaga i le fesoasoani mai o tatou tupe ia e aumai i faletupe tetele. E pitosili ona tele a tatou aitalafu pe a tuufaatasi le ADB ma le World Bank. E maualalo ai le pasene o le tupe o lo o tatou nono mai ai i le Malo o Saina. E faaopoopo foi i ai ma tatou nonogatupe mai le Malo o Iapani ma nisi o atunuu ma Faalapotopotoga Alapi, e pei o le open fund lea sa maua mai ai a tatou tupe ia sa toe faatele ai le tatou tane suauu e faapena ona i ai...o lona uiga o lo o...i le agai ai ma toe vaai foi i le agai i luma, o lo o agai i lalo le tatou aitalafu ma o lo o ave i ai le faamuamua.

Ae pei foi ona ou taua ia le tulaga o tatou tupe o lo o faaaluina i le totogiina o le tatou aitalafu pe a fua i ai, e le o...e leai se popolega o i ai i lea itu. O le toe tulai atu lea e faamalamalama ina ia manino ia faamaumauga i le tulaga o lo o i ai le aitalafu a le Malo. I le mafai ona tatou totogia ma o lo o i ai foi a tatou foreign exchange e mafai ona fesoasoani i le totogiina, ma e leai se mea e popole ai. Faafetai.

FOFOGA FETALAI: Malo faafetai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr, Sailele Malielegaoi: Lau Afioga i le Fofoga Fetalai, o lea ua auiliili mai e le Minisita o Tupe, ae talu ai o lea sa talanoa i pasene. O le a ou avatua fuainumera atoatoa e faigofie ai. O tatou tupe lea e maua i lenei tausaga e \$826miliona, ona totogi loa lea o le \$70miliona lea na tau mai e alu ia tatou aitalafu, ona totoe ai lea o le \$750+miliona. O lea la e faagaoioi ai le Malo. Ua uma nei le vaegatupe e faagaoioi ai le Malo, ova ai le \$80miliona e faatino ai a tatou atinae. E taua tele le taumafai o le Malo, ia lava seleni e faatino ai atinae, ona o le atinae lea e maua ai galuega, ma faatino ai mea ia e manaomia e a outou itumalo. O lea la ua uma ona totogi aitalafu uma ona faagaoioi ia vaegatupe e faagaoioi ai le Malo ona maua ai lea o le \$80miliona e fesoasoani e fai ai mea ia tou te mananao i ai mo outou itumalo.

A o le atinae lea e alu nei, e \$166miliona o lona uiga e toe faaopoopo le isi \$80miliona, o fea e aumai ai? E aumai i tatou mea ia e faagasolo pea, aua o lea e faagaoioi pea atinae o lea e fesoasoani mai ai Malo i fafo. Lau Afioga i le Fofoga Fetalai, o le mea lenei o lea na saunoa mai ai le Minisita sa talanoa i pasene. Ae o lea la ua ou talanoa atu i fuainumera atoatoa e faigofie ona maua mai. Ae i ai le itu taua lea sa ia tau mai 11.5% lea e alu e totogi ai a tatou nonogatupe. O tupe uma lava ia e maua mai ia tatou tupe maua, na o le 11sene.5 lea e alu ese mai le \$1, tupe maua uma lava e 11sene ma le afa sene lea e alu.....11sene mai \$1 taitasi. Ao la e totoe le 80+sene mai \$1 taitasi. O le totoega la lenei, o lea e taoto mai i i, pe a faaliu loa i tupe atoatoa e \$750miliona, o lea la e totoe mai ina ua uma ona totogi a tatou aitalafu. O le mea la lea, o le a tau au ina e tino vale i lou popole i aitalafu. A lea ua uma ona faamanino atu, ua uma ona totogi aitalafu mo lenei tausaga. A o lea e ova ai lava seleni mo le faagaoioiga o le Malo. A uma foi ona aveese le vaegatupe mo le faagaoioiga o le Malo ona ova ai lava lea o le \$80miliona mai a tatou lava tupe mo le atinae.

Lau Afioga i le Fofoga Fetalai, faafetai o lea ua faamanino mai e le Minisita o Tupe aua o lana matafaioi lea. Se i ou fesoasoani atu e faamalamalama atili. Pei lava ua oo mai le taimi o le ti.

FOFOGA FETALAI: Malo faafetai. Ou te faamalulu atu i le sui usufono mo Salega. E leai se agaga o le Fofoga Fetalai, e taofia lau saunoaga. E manatu lava e te saunoa se i taunuu i le taimi o le tatou malologa. Ona o lea ua tatou toai taunuu i le tatou malologa. Ua ou manatu ua faamuta ua uma ai foi lou taimi, i le tulaga o la tatou galuega. O le mea la lea..... a o le agaga lava o le Nofoa ou te musu e faamuta se saunoaga, ae o lea ua faamuta ona o le tatou malologa, ia ua maea ai foi le taimi o le sui usufono.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Tofa OLO FITI AFOA VAAI: Lau Afioga i le Fofoga Fetalai, e le i avea sau faamalo ma sau faafetai i lou itumalo. Toe tuu mai se avanoa pe afai.... aua o lea ou te vaai atu e le i taitai oo i le tatou....

FOFOGA FETALAI: O le a maua ou avanoa tai sefululima minute i mea taitasi. Ae ou te faasilasila atu, ona o lea ua tatou toai taunuu i la tatou malologa masani, o le a faataatiaese galuega a le Fono Aoa mo lana malologa.

Na faataatiaese Taulumaga a le Fono Aoa Faitulafono mo lana malologa masani i le itula e 4:49 i le afiafi ma toe amatalia i le itula e 5:27 i le afiafi.

FOFOGA FETALAI: Ou te faasilasila atu ua toe amatalia Taulumaga ma galuega a le Fono Aoa Faitulafono. Ua i ai le manatu, ua maua le faasiligamalosi i le paia o le Palemene, lau Afioga i le Palemia ma le mamalu o le Kapeneta faapea foi le maualuga o le Taitai o le atunuu, ua maua se isi malosi faaopoopo e faaauau ai la tatou galuega. Manatu foi ua faapea ona maua le malosi faafouina i Ofisa Sili o Pulega o Matagaluega ma Faalapotopotoga a le Malo.

E faia la tatou malologa o faapena ona faamalulu i le sui usufono mo Salega i Sasae, ua faamutaina lona tulaga o lo o i ai lona avanoa ma lona taimi. Ou te tapa se isi sui usufono e tulai mai e saunoa.

Tofa OLO FITI AFOA VAAI: Lau Afioga ma le agaga faaaloalo. Toe tasi lava le mataupuí

FOFOGA FETALAI: Tulai mai le sui usufono mo Salega i Sisifo. E i ai se isi mea....

Tofa OLO FITI AFOA VAAI: Toe lua lava minute uma loa se matou lauga Lau Afioga pe faauma atu se matou lua minute lea e totoe ma le agaga faaaloalo.

FOFOGA FETALAI: E ui lava ina ua maea ona fai lau faaiuga, ae manatu e alofa i le sui usufono. E malu lava le sui usufono ia outou Afioga. Ae faapuupu mai, ma faauma mai loa le saunoaga.

Tofa OLO FITI AFOA VAAI: Faafetai i lau Afioga i le Fofoga Fetalai, a o ni moomooga maumau e pe ana faapea e tele se taimi o totoe, po o se isi tolusefulu minute, ae faigata lava e faaaloalo lava le sui usufono lenei i lau Afioga i le Fofoga Fetalai ma lau faaiuga.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E pau lava lea o si mea e faaiu atu ai la matou tala lau Afioga i le Fofoga Fetalai. O le fautuaga, i le Afioga i le Palemia ma la tatou faigamalo, ia tatou aeaie sia manu ua ulu. Ia outou alolofa, tau fuafua a tatou aitalafu e le o se mea.....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr, Sailele Malielegaoui: Lau Afioga i le Fofoga Fetalai, ua uma ona soalaupule le Tala o le Tupe. E le toe fefoifoia i tatou mataupu. Ua uma foi ona tapa uma Matagaluega ma le.....mo le faatalanoaga mo le Tala o le Tupe ia e aumai, ua uma foi ona aumai i totonu o le Kapeneta lenei. E ala ona ou tulai atu, ona ua oo lava i ooooga o mea. E pei e foliga mai i le saunoaga a le sui usufono, e le i lelei ona soalaupule. Se i vaai ia te oe lava e toatasi, ia te oe lava e toatasi, e te le i faigaluega i totonu o le Malo, i mea e lotea ai mea tau tupe a le Matagaluega, ao lea e te faafiufiu. Ou te le o fai atu e taofi lau faafiufiu, ae ou te fai alofa atu ia te oe, ona o faiai uma nei malolosi o le atunuu na sikolasipi i fafo. O lea latou te tapenaina mai Matagaluega uma, ma Faalapotopotoga uma a lo tatou Malo, faatasi ai ma Minisita. O Minisita nei e le o ni Minisita e faaletonu, o nisi o i latou e i ai a latou tomai faapitoa, loia, o mataupu tau pisinisi. O i latou o atinae faapitoa, e le o ni mea faaletonu mea ia e aumai e le Malo. A ua e saunoa soo lava i le mataupu lea, e pei e foliga mai e le o tapenaina e le Malo lelei le tala o le tupe.

Lau Afioga i le Fofoga Fetalai, o mea ia e faatalanoaina pea e lo tatou Malo ma malo i fafo ma Faalapotopotoga i fafo. E silafia e le sui usufono, se o tagata atamamai uma ia e faulai i fafo. I totonu o malo nei e aumai ai fesoasoani nei. E le gata i Malo ae faapena foi Faalapotopotoga tau tupe. E i ai lava la latou tuualalo e aumai, ae o la latou te iloa lelei o lea e fai fuafua lelei ia fuafuaga a lo tatou Malo.

Sa i ai foi lo latou manatu, e le i lelei ona tapena le tatou fale faatali pasese lea na fai, ma feita ina ua fausia i le malosi o le finau a le Malo. Na taofi ai ia vaegatupe e foai mai, o le latou manatu e sese le faaiuga a le Malo. O lea ou te manatu nei pe a ma le valu i le sefulu masina, na faatoa tilotilo lelei ai i tapenaga o itu lelei o le poloketi lenei. Ona toe aumai ai lea o le latou faalalolaloga ma toe tatala mai tupe a latou mo le faaauauina pea o galuega a lo tatou Malo.

Lau Afioga i le Fofoga Fetalai, ou te musu e talau atu mea ia, ona ua le tasi pe lua ae ua tupu tele mea ia o feutagaiga i le va o lo tatou Malo, Faalapotopotoga tupe i fafo. E tele foi o i latou nei e galulue i le Malo, o lo o i tulaga o mea tau tupe, ma sa galulue i fafo, galulue i faletupe i faaputugatupe i Uosigitone, a le lalolagi. Galulue i faletupe tetele o le lalolagi. Galulue i faletupe o Asia, o lea la ua foi mai, ma le malamalama ua lava taoso. Lau Afioga i le Fofoga Fetalai, e faigofie lava ona e tilotilo atu i fuainumera nei ma le le malamalama, ona tupu ae lea o le ituaiga manatu la ia. Ae e te nofo ma taumafai e te malamalama i faamatalaga nei e avatu.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ua fia nei tausaga talu ona tauave e le HRPP le faigamalo? O toe maua mea ia na maua i aso la? E na o se fesili foi lele e avatu i sui usufono. O toe tauafao ni taga araisa? O toe tauafao ni suka? O sioki mo le ono masina ni sikaleti? O le tulaga lena lau afioga le Fofoga Fetalai. E fiu lava e tau faapogisa mai le Malo ae le mafai o lea e matamata tetele le mea na tatou o mai ai. O le mea na tatou o mai ai ma faigamalo ua tuana'i.

Ia o le fesoasoani atu lena lau Afioga, leaga o lea e taumafai lava le sui usufono, e aumai lona manatu lea ina ia taumafai e manumalo le mea la e sau ai. Ae o lea ua tau atu e le Malo, o iinei e avatu ai le lauga faaiu o le mataupu lenei.

FOFOGA FETALAI: Malo, ou te muai ta vaiafei faapoi laau tuvanu le paia i le finagalo o le Taitai o le Malo, ia ona o se fetuunaiga o le fetuunaiga o le faaiuga a le nofoa. Ia o le manatu lava ia aua foi le tuuaina e le faafofoga tapuai mai a le atunuu, o latou e le o malamalama tele i le tatou galuega o lo o faia nei. Ia ae o itu ia o lea e popole ai, e popole ai le taofi, aua e le uma lava le tulai mai o le sui usufono ma toe foi lava i le mea o i ai lona lava finagalo, avea ma mea e le mafai ona nofoai le Malo, e ao ona tulai e faamalamalama ia ma faamanino futia ua sola, aua o le sui usufono foi tulou i sala le gagana, ia sa ta lavea ai i le taimi lea o le suega taga araisa ma le suega pusaapa eleni.

E moi ai le saunoaga a le Palemia, o mea sa tutupu i aso ua mavae ma futia ua sola, ui i lea ua le toe tupu i lenei vaitau. Ia ae i ai le manatu lau Afioga e i le sui usufono mamalu o Salega Sasae, ia malie ia lou finagalo, ia tuuaina foi le Fofoga Fetalai, e lea itu o le Maota ona o lou saga tuu atu le avanoa, ia ae o itu ia o lo o popole i ai le taofi. Ui i lea, na e saunoa i upu faale-Tusi Paia i le amataga na fetalai Iesu i ona soo, *‘ia outou o atu e fai outou ma faifaiva i tagata’*. O le mea la lea, taoto ai faapea le mataupu ae tulai mai se isi sui usufono e saunoa, e faamalulu atu i lau Afioga i le sui usufono o Salega Sasae.

E masalo e... tulai mai le sui usufono o Aana Alofi Numera II. E ui lava ona o se tasi o sui o le Komiti o Tupe ia e leai, e saunoa lava i mea aua manaoga o le itumalo.

Tofa ILI SETEFANO TAATEO TAAFILI (Aana Alofi Nu.2): Ia e faafetai atu lava i lau Afioga i le Fofoga Fetalai mo lou avanoa. E manatu foi o lea ua matutu fau, maea foi ona tali le sua i le paia ma le mamalu o sasao nei. Faatulou i le paia o le Maota Fono o Samoa, ma le maualuga o lenei foi aso, le Fonousu ma le Fonotoa a Samoa.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Le afio i lau Afioga i le Palemia faapea le Kapeneta, Minisita Lagolago, faapea foi lenei Itu i le afio o Taitaifono, o Komiti Faapalemene taitasi, sui usufono o le Maota o Samoa. Faatalofa atu foi i lenei itula, tatou faatasi ai ma Ofisa Sili o Pulega o Matagaluega taitasi o le Malo, o i latou o le malosi galue ma le malosi faatino o le Malo. Matou manatu foi ua alu foi lenei aso ua faapena ona nopiai ma faaaaogagase le paia ma le mamalu o sui a usufono ona o le lauliuina o le Tala Fuafua Faatatau o le Tupe 2019/2020.

A o le i amatalia sa matou faamatalaga, ma fai atu so matou lagona e uiga i le Tala o le Tupe, e le faagaloina le tapuaiga a Samoa o lo o faapea ona tapuai mai, lau Afioga i le Ao Mamalu o le Malo ma lau masiofo, faapea foi lau Afioga i le Sui o le Fono a Sui Tofia ma lau masiofo, Susuga i le Faamasino Sili ma le Ofisa o Faamasinoga, i le mamalu o Samoa, i aiga o tupu ma aiga o Papa, le aufuelolola ma le autulatoa, ae a le tapuaiga a le itupasa o le aufaitatalo, o lo o faanono manu aua Samoa ma lona Malo. Malo le tapuai, malo le faitatalo.

A o lenei itula, matou tulai ma le agaga faaaloalo, e tusa ai o le mataupu ua opea i lumamea, le laulauafono i le Maota Fono o Samoa. Ae matou te ioe ma talitonu o le Laulau-a-Fono foi lenei, e avatu ai se lagona a o se manatu, i lau Afioga i le Palemia ma le Kapeneta, e tusa ai foi o le la tausaga ua tuanai, ma le tatou savaliga sa tatou auvasa mai ai, ia aua Samoa ma lona atinae. E le gata o galuega fou, galuega faaauau ia ae o galuega faaleleia foi. O lenei la ua tatou toai taunuu i lenei tausaga ma lona faaiuga i le Tala o le Tupe, ae ua toe afuafua foi le isi tausaga faaletupe.

Matou momoli le agaga o le faafetai ona o galuega tetele ma galuega faaauau sa faapea ona fitaituga ai lau Afioga i le Taitai ma le Malo. Afai foi sa i ai se faaletonu, ia o upu lava ia e masani ai le atunuu e le atoa ni ia i se vaa o se tautai. Ae o le matou tapuai ma le matou tuualalo atu, ia o le upu moni lava ia, ia ua tuu tasi lava faiva o Piliø i lau Afioga ma le aiga Kapeneta. Ua taunuu ai le upu e fai i le seuga, ia se togi le seuga na lagatila ma faapulou le tualima, ua malo le fai o le faivaø

Ia o lona ua momoli le agaga o le faafetai i lenei ituaso ia aua le savaliga i lona tausaga faaletupe ua tuanai atu, ia ae o lenei itula, ia tau ia ona faailo so matou lagona e uiga i nai moomooga foi e taoto atu i lau Afioga i le Palemia ma le Kapeneta, ia aua lava le atinae o mea nei o atinae o nuu ma afioaga. Ia o le upu moni lava ia e le muta le manao, ia ae fua foi le manao i le tamaoaiga, e fua foi le manao i le tatau ma onomea mai lea taimi i lea taimi.

Lau Afioga i le Minisita mo Galuega Tetele a le Malo, e momoli le faafetai, ua matagofie le auala o lo o kolosi mai Leulumoega mai tai agai i uta, ua manaia lona toe faalauleleina, ua talafeagai tonu lava ma lenei vaitau a o lo o galueaina le auala o lo o ui atu i gatai e agai i Faleolo, aua ua fai le vaega lea ma alofaga e le gata i Aiga i le Tai ma matou foi o lo o alo mai i le vevesi o le taeao i le felauaiga o alo ma fanau. Faafetai i lau Afioga mo lenei galuega matagofie.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Na pau lava le matou tatalo, e pogisa lava lenei auala i le po, ua maea foi ona faaoo atu le talosaga i le Pulega o le Malosiaga Faaeletise, ia mo ni nai moli e faamalamalamaina ai, ia aua le femalagaai o le atunuu i le vaitau o le pogisa ma le po. O lena le talosaga atu lau Afioga i le Minisita.

O le isi manao e faataoto atu o si ou nuu o Nofoalii, e i ai le auala taloto e oso i totonu o le aai e fesootai ai le auala lea e ui mai le Aoga foi lea a le Tulagalua a lo matou nuu ma Nuuausala. Ia o le auala lena e agai atu ai ia alo foi ma fanau agai i le Kolisi o Nuuausala, ma o lo o i ai foi i ina le Aoga Amata a si o matou nuu. O tulaga faaletonu lava aua a oo i le vaitau o mugala, ia ua pefu faasoloatoa. Ua aafia ai nai aiga o lo o nonofo latalata ane i ai. Ia a oo foi i le vaitau o timuga, ia ua palapala faasoloatoa i le soli e taavale. Lau Afioga e pei lava ona matou fai atu, ia a faatauina o se tu ma se aga le migao, ia ae taatia atu i ou tafatafa.

Lau Afioga i le Minisita o le MNRE, ia e ui lava ina e le o nofoia le nofoa o Tavita, ia ae matau atu o lo o alala ma afio mai le Minisita Lagolago, tau lava ina tuu atu i ou tafatafa aua o lau Afioga lava ia o le Minisita lena, taligalu o si ou nuu o Vaialua, ua autausaga foi ma tatalo atu pea ma faaoololomaau ia ae paga lea o lo o faapena lava ona tumau i le mea e tasi.

Ona oo mai lea o sa matou faamatalaga i le Minisita mo Aoga, o le tatalo ma le agaga maualalo, pe ni a fa au i lau Afioga ma le Matagaluega, pe le maua sina siitaga po o se seleni faaopoopo ia mo nai aoga amata. E faigata lava le taumafaiga o aoga a nai fanau, aua o le tele lava o taimi, ia e tua lava i le nuu le totogiina o faiaoga. Ia ae o le isi taimi ua leai se tupe a le nuu, ia ona aumai lea o le ato talo, tulou lava le paia o le maota e totogi ai faiaoga. Se i silasila ane lau Afioga i le Minisita, pe le toe maua se siitaga ae o se faaopoopoga o seleni o maua atu mo Aoga Amata.

Ia lau Afioga i le Minisita mo le Soifua Maloloina, matou manatu lava e te fou i le Matagaluega, ia ae le fou lau Afioga i le feagai ai ma mea nei o galuega fai. E leai se taavale e feaveai mai i le tatou Falemai i Leulumoega, a oo lava ina i ai ia se mai tigaina, ia e lua lava ia faiga e fai ai, o le omai o le aiga e aumai ia la latou mai i Motootua, ia po o le faatalitali seia oo atu le taavale a le falemai. Sa ou tatalo foi i le Minisita sa i ai muamua, ia ae peitai ane e leai lava se mea ua tupu.

O le isi mea lau Afioga i le Minisita, o la e i ai le fomai tumau. Ia ae o le molimau a tagata, ia tulou lava e le tau maualaloina, o le Filipino le fomai tamaitai o lo o i ai. Ia ae o le molimau lava ia a tagata, e tulaga faaletonu lava le auaunaga i nisi o taimi, ia a oo ina ote i mai, ia e pei lava o la e otegia lana fanau. Se i silasila ifo lau Afioga i le Minisita, i lea vaega ma lou agaga faaaloalo.

Matou manatu lea ia ua maea atu ia ni nai manaoga ae o ni moomooga, taatia atu i lau Afioga i le Taitai o le Malo ma le Kapeneta ia aua le lufilufi limalelei ma lau polo faasoa ia taga tasi uma tagata e pei ona i ai le mau e masani ai lo tatou Malo.

18 IUNI 2019

Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020 – felafolafoaiga i luga o le faitauga faalua

Ia a o lenei itula e momoli atu le matou agaga faafetai i si ou itumalo pele o Aana Alofi Nu.2. Le tapuaiga a le Aufaitatalo, le nofo a faafeagaiga, ia Leulumoega ma Nofolii, ua malo le tatalo, o a outou talosaga ua talosia ai la outou sui usufono, ia a o faapea ona saili i le lumanai ma saili manuia, aua le tatou itumalo ma Samoa.

Faamalo atu foi i si ou nuu o Nofolii, le Susu o le Alii Matua, ia faapea le Aiga Sa-Tanuvasa i ona matafale e fia, Afio foi le Aiga Satuala o le Aiga Faalagilagi, Afio Taimalieutu o le Fofoga o Satuala, le Mamalu o le nofo Ituaiga ia te oe le Faleaana, ia ae tainane foi le Faleaana i Gagae, ma oulua Tapaau ia Tauti ma Malaitai.

Liliu mai i si ou nuu o Leulumoega, le Alalatai o le Faleiva o le Faletuiaana, faapea le Matuanatogi, o oe na tofofi e tausii Paia ma mamalu o le tatou Itumalo, ia ae tainane Samoa. Ae o lenei itula, ia e le tele se faamatalaga, e uiga i le Tala Faatatau Autu o le Tupe 2019/2020. O le upu moni lava ua atoa le lua vaiaso, o sagai atu lenei Komiti e iloilo le Tala Faatatau o le Tupe sa faapea ona afifio atu ai le paia o Pulega taitasi. Ia ae talofa i lau faasoa le lava, lau faasoa le auau e tauposiposi lava ma tau faasoa mai lea taimi i lea taimi, ae o le agaga faafetai i le Atua ma Lana foai ia i tatou o lo o maua ai nei seleni aua lo tatou Malo o Samoa. Na pau lava o lea le tatalo i le Atua o faamanuiaga, aua ne i afea Samoa i se mala faalenatura, aua o i ina o le a afaina ai lo tatou tamaoaiga. Ae tatou te le loto vaivai ae tatou te tatalo pea i le Atua e faamanuia Samoa ma lona Malo.

Lau Afioga i le Fofoga Fetalai, o oe o lau afioga o le pao ma le vavao o le Maota, malo lava le onosai, o nisi foi o taimi ua lualuta le tai i le folauga a le Palemene. Ae ua e tu lava i matagaiolo e tau faafoefoe le sa o Samoa, ina ia lagomau ma ia mamalu lo tatou Fonousu ma le Fonotoa. Alofagia e le Atua lou soifua tului ao lou soifua faafouina i lea aso ma lea aso, aua lou faafeagai ai ma le tofiga. O lea sa matou faamatalaga i lenei ituaso, manuia tele le Fonotoa ma le Fonousu a Samoa, ae ola le tamaloa mai Aana faafetai.

FOFOGA FETALAI: Malo faafetai saunoa i lau afioga i le sui mamalu o Aana Alofi Nu 2. O le avanoa lea ua maua foi mo se isi sui usufono. Tulai mai le sui usufono mo Falealii i Sisifo.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai, faafetai mo lou avanoa i lenei itula o le aso. Ua fetai fola i lenei taeao liugalua, ua sao foi le Maota nei, aua le talanoaina o le Tala Faatatau Autu o le Tupe mo le tausaga faaletupe 2019/2020 faatasi ai ma le Tala Faaopoopo Nu.2 2018/2019.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ae le i oo i ai se faamatalaga e faatatau i le Tala o le Tupe, e muamua lava ona ou faatalofa i lau Afioga i Le Ao mamalu o le Malo ma lau Masiofo. E faatalofa atu foi i le Afioga i le Sui o le Fono a Sui Tofia ma lou faletua. E faatalofa atu foi i lau Afioga i le Palemia ma lou faletua, le mamalu o Minisita o le Kapeneta. E faatalofa atu foi i le Afioga i le Sui Faamasino Sili ma le Matagaluega o Faamasinoga. E faatalofa atu foi i lau Afioga i le Fofoga Fetalai, faapea ia sui mamalu o le Palemene, tainane le paia tele mai mauga maualuluga o le Aufaigaluega paia a le Atua. E faatalofa atu foi i Ofisa Sili o Matagaluega ma Faalapopotoga Tumaoti a le Malo, ae le gata i lea o tatou paaga tumaoti faipisinisi a lo tatou atunuu i Samoa. E faatalofa atu foi i afioga i alii ma faipule o tatou nuu ma o tatou afioaga.

O paia ma mamalu o Samoa o le a le toe oo i ai se faamatalaga, o Samoa mai le vavau e oo i le faavavau. Ae le mafai ona faagaloina si o matou itumalo i tua, le paia i Alalagafa La lua nofo a Tulafale ma Tauagaeseese ia te oe Falealili. E momoli atu la matou faafetai ma le faamalo, faafetai tatalo, faafetai tapuai. Faafetai foi mo le lagolagoina o polokalame a le Malo i tausaga ua tuanai e oo mai lava i lenei aso.

O le sini autu o le tatou Tala o le Tupe, lea o lo o talanoaina nei i le aso, ia autasi mo se lumanai manuia o Samoa. E muamua lau faamatalaga i le Matagaluega o Tupe, lau Afioga i le Minisita, le Ofisa Sili o Pulega ma le aufaigaluega atoa, e momoli atu le agaga o le faafetai. Faafetai e tusa ai ma le tuufaatasia ai o lenei tala o le tupe. E le faigofie, o le ala e ala ai ona le faigofie, ua ave a tatou faamuamua i tatou taaloga lea o lo o talimalo ai si o tatou atunuu. Ae le gata i lea, o le faamatagofie o si o tatou lumafale nei, o le tatou Apia Waterfront lea ua tuuitiitia ai vaegatupe mo le atinae o Samoa. O lau tatalo ma lau tuualalo, o le tausaga o lumanai, ia outou alolofa ia toe siitia se isi \$100miliona, aua o galuega ia o atinae tetele, galuega ia o tatou auala galue, o auala tuloto, o tatou auala ia e faatatau o auala sima, (fords) e le gata i lea o auala laupapa, ina ia mafai ona faaogaina e o tatou tagata i aso uma o lenei tausaga.

I le Matagaluega o Pisinisi, Alamanuia ma Leipa, e momoli atu lau faafetai tele i lau Afioga i le Minisita ma le Matagaluega i galuega e tele o lo o outou faia. E pei o le galuega lava lea o lo o ave i ai le matou faamamafa o le auina atu lea o tatou tagata e faa-faigaluega i atunuu mamao e maua mai ai le alagaoa e faasoasoina aua le tausiga o aiga, i galuega tau apu i Niu Sila, galuega faavaitaimi i Ausetalia, ao lea foi ua oo lo tatou Malo le ave o avanoa i latou ia e matata eseese, galuega faakamuta. E ave ai lava le faataua a le Malo i galuega ia faamatata esese, aua i lou lava talitonuga, a lelei ma atinae tatou tagata ia o lo o i ai o latou tomai faapitoa o i ai matata eseese, e mafai ona toe foi mai i lo tatou atunuu e atiae. Ae aoga le o i fafo, e maua ai foi le isi tomai ma le isi agavaa faaauau ina ia mafai ona toe foi mai ai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E pau lava le vaega lea e tatau foi ona, o le matou tuualalo, o lea ua mautinoa e le o toe i ai se komiti ua taua o le price control board. E pei lava ona i ai i tausaga ua tuana'i, na pasia e le Malo faiga faatauvaga le tau o oloa. Ua tuuina i luga le pasene o le maualuga o le tau o oloa, ona taaalo lava lea faatauvaga po o ai e taugofie. E faapena foi ona gafatia e i latou e faaaogaina oloa. Na pau lava le matou talosaga ma la matou tuualalo, se i silasila ane lava i nisi o oloa e pei o tulaga ia o taavale ia e auina mai i atunuu i fafo, second vehicle ia o lo o faatauina i lo tatou atunuu. E le gata i le saogalemua ae o lo o matauina pea, pe leai se alafua e fua ai, ia le tulaga o le maualuga o le polofiti o lo o maua e i latou o lo o faatauina taavale. E le gata i lea o nisi o masini faatekonolosi o lo o faaaogaina i ona po nei, e pei o laptops ia o lo o fai ai ia faalauiloa i nisi o pisinisi. E tatau ona silasila i ai le komiti lea e pei ona tofia i lalo o le Tulafono fou.

O le Matagaluega o Faatoaga, e avatu la matou faamalo ma le faafetai i le Afioga i le Minisita ma le Matagaluega e tusa ai ma le poloketi o le manu ai niu, ina ia taumafai ina ia faaitiitia, ae faapena foi ona toe faamalosi le totoina o le niu. E faafetai atu foi mo le poloketi mo le totoina o le koko Samoa, o lea ua matauina ua tele le suiga o le fale e faaola ai koko i Afia. Aua foi le tufatufaina atu i le mamalu o le atunuu. Na o se tatalo ma le tuualalo i lau Afioga i le Minisita, tusa ma le pole fagota faaopoopo mo Falealii i Poutasi. Ae le gata i lea sa ou talosagaina i le Tala Faatatau o le Tupe ua tuana'i, tulaga o le uafu le tumau, ina ia faapena ona faaaogaina mo vaa fagota o lo matou itumalo.

I le Faalapotopotoga o Felauaiga i le Laualeele, e momoli atu le faafetai i lau Afioga i le Minisita e tusa ai foi ma galuega tetele sa fai i tausaga ua tuana'i. O le matou talitonuga, o le faiga faavae a le Malo, fetuutuunai ana matafaioi mai lea taimi i lea taimi, e fua i le gafatia. I lau vaai i ai, e tasi lenei o vaega e tatau foi ona tilotilo i ai le Malo, ma la matou tuualalo ia ave le faamuamua a le Faapotopotoga lenei o Felauaiga i le Laualeele ia tatou auala. O le uiga o lau faamatalaga ia ave le faamuamua ia tatou auala, e taua lea faatatau e tatau ona i ai ni a latou tagata asiasi e faaigoa o le roads compliance standards inspector, o latou ia e asiasia po o tausisia e latou o konekarate o lo o latou faia auala ia standards na faapena ona tauofo i ai, i le taimi na tuuofu ai galuega o auala. E le gata i le vaavaai po o lelei le suaina o le auala, po o fai ni alavai o le auala. Ae le gata i lea o le faatatau po o le a le mafiafia po o le pasene o le ta e faaaogaina i le auala. O le mea lea e talosaga atu ai mo le Faalapotopotoga o Felauaiga i le Laualeele.

Ua maea foi ona matou talatalanoa ma le Afioga i le Minisita o Galuega, e tusa ai ma nisi o auala, e i ai lava auala sima ia o lo o talosagaina. I le auala sima i le vai lea i Satalo, a oo ina sua le vai lea í e tutusa lelei lava le vai lea ma le vai lea na taua e se tasi o sui usufono mo Siumu, e seasea sua, ae a tetele loa le timu, ona po loa lea, le mafai ona feoi le mamalu o le atunuu, ae le gata i lea o taavale.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le isi auala sima e talosagaina o le auala sima lea i le matou pitonuu lea o Piu, lea o lo o faaaogaina e le Faalapotopotoga o le suavai. Atonu e alu se taimi, ona i ai se tupe a le Faalapotopotoga o le Suavai e fai ai le auala sima lea, ina ia mafai ona faaaogaina i taimi o lologa. I auala taloto i totonu o matou nuu taitasi, e amata atu i Saleilua, ua ou talosagaina lava le auala lea e alu i Iliiili, le nuu lea o Iliiili, e tagatagai agai i ai po o le a se faiga e fai i ai. O le auala i Poutasi, o le auala lea o lo o faaaogaina e le falemai, o lo o faaletonu lava le tulaga i le ta. I Vaovai i le auala lea e pito mai, na o atu konekarate i le sua le auala i le faaiuga o le tausaga na tea nei. E oo mai i le aso e lei toe o atu le vaega lea o le road maintenance e toe fai le auala, ae ua matua leaga faia lava le auala i le taimi lenei. O le auala lea a e uia, e te fesootai ai i le isi itu o Vaovai i le tuaoi ma le nuu lea o Matautu. E i ai foi le isi auala tuloto e oso atu i le isi itu, e alu atu tau i le faleaoga lea a le falelua i Matautu ma Vaovai, e faaletonu uma auala ia e lua, i le alu agai i tai. E faapena foi i le matou nuu lea i Matautu, e na o uta lava e alu atu ai le lelei, ae oo loa i le afa o le auala, e matua tulaga faaletonu lava. E talosaga atu ai ia i latou o lo o faaleleia po o fai a latou maintenance ina ia faapena ona fai i ai se fuafuaga mo le faaleleia.

O le Matagaluega o le Punaoa, ua matauina lava e lou nei sui usufono le tulaga o le konekarate o lo o latou moaina autafa o le auala a le Malo. E le gata i auala o le Malo i le main road lea e alu atu i Saleilua e tau i Salani ma Sapoe ma Utulaelae. Ae le gata i lea o uta atu i auala ia ua uma ona valitaina. E tuai ona oo atu i latou e moaina autafa o le auala, ae o le tuualalo pe le mafai ona silasila le Minisita ma le Matagaluega e fai se faiga faapaaga a nuu ma afioaga, e latou te moaina ai le vaega lea o le auala. O le lelei o le vaega lea, o le a mafai ona maua ai galuega mo tupulaga talavou ma faamatagofieina ai o tatou aai.

O le Matagaluega o Leoleo, e momoli atu le agaga faafetai, e tusa ai ma galuega lelei ua outou faia i le tatou pou i Poutasi. Ae le gata i lea o iinei i Apia. E faatai so matou leo, e lagolagoina e lenei itumalo le Tala Faaopoopo Nu.2 2018/2019 ma le Tala Faatautu Autu o le Tupe 2019/2020. Avea foi lenei avanoa, e faamanuia atu i lau Afioga i le Palemia aemaise o le autaaalo a Samoa i taaloga o le Pasefika. O outou mama na, ia manuia lo outou alofaiva. Le paia i Alalagafa ma le nofo i tulafale ma Tauagaeseese ia Falealili, o lo tatou sao lena, ia agalelei le Atua i si ou itumalo aemaise o le atunuu o Samoa.

Lau Afioga i le Fofoga Fetalai, manuia le Maota faafetai mo lou avanoa.

FOFOGA FETALAI: Malo faafetai. Tulai maia lau Afioga i le Gafatasi o se tasi o sui usufono matua o Falealili.

18 IUNI 2019

Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua

Afioga FUIMAONO TEO SAMUEL TEO (Falealili Sasae): Ua ou manatu ua lelei lou taimi, e soofau ma le uso a sui usufono o lou itumalo. O le ala lea o lou faamulimuli, a i ai ni mea na pau ia ia, ona ou toe faamanatu lea e faapuupuu ai lau lauga. E ao lava ona tutusa mea uma, talu ai ona o lea sa faaoga foi lana vaaiga, o lea ou te fia faataitai atu ai i le mea lea.

E manatu o lea ua faaifo lalago le folasa, ina ua tonusia lalago o uluai tui ina ua saafi avaloa le vaifanua o vea ma ululepapa. Ua logolai i vaigagase ma ua puloulou, ina ua sasama tua i au le fala faalelegasegaula a tupu aua aiga ma moepo o faleupolu, lea ua tatou feiloai i lagi susufi, ma le magalo o le tomaalii ina ua see i tufu ee ma tufu i le vailoloa, le ulupeau ma le malupeau.

Ua taoto le mana o le Atua i le Maota o Samoa i Tapueleele ma sa folau o tautai o le Maota. Ua matasugalu Tiafau nei o le Maota e utu ai tagi, e mamananu faatiti ai le tofamanino, e saili ai le faautautaga faapututoa aua se lumanai manuia o Samoa mo a taeao. A o la a Tavita, *'Vivii atu ia lou loto i le Atua, aua e lelei o Ia'*. Tumau i le Atua lona viiga e oo i le faavavau.

Tulou le afio o lau Afioga i le Fofoga Fetalai, tulou le afio o lau Afioga i le Palemia ma le mamalu o le Kapeneta, tulou le afio o sui usufono mamalu o le Maota o Samoa, tulou le faafofoga tapuai a le Sui Faamasino Sili ma Faamasino i Alii ma Tamaitai Faamasino o le Faamasinoga. Ae a e e tua i ai le galuega a le Malo, o lo o lima ma vae, i Alii ma Tamaitai e faauluulu i ai Matagaluega eseese o le Malo, faafetai tautua, malo galue.

E i ai upu e masani ai le atunuu, *'pe a outou papale i tiaseu, e le maeu lava le silatoa a tautai, aua o magaseuvale ia o faatamasoaliiga'*. E i ai le lagona lau Afioga i le Fofoga Fetalai, e le mafai ona tuua ia le tapuaiga mamalu, a le Ao o le Malo ma le masiofo, tainane foi le Fono a Sui Tofia, le Afioga i le Tapulesatele ma le faletua. Ia ae tainane foi, le faanonomanu o le sa folau o le Talalelei, i nofo a faafeagaiga i fata faitaulaga e fia, o lo o latou tatalo aua le ola faaleagaga o fuaga lalovaoa o Samoa. Ia ne i oo la matou tala pe laaloa sa matou upu, o lea ua uma ona afea e le sui usufono ia paia o le matou itumalo, i le Alala o Gafa, tainane le lua Nofo a Tulafale o le Tootoo o Lalogafuafua, ia aemaise le Tauaga eseese ia Falealili.

Ia e i ai lea o le lagona, Afioga i Minisita, ia alo maia e le tele ni manaoga o lenei itumalo, afai ua uma ona fofola atu, ia tau lava ina toe faamau ane, mo ni nai taimi e le itiiti ifo i le tolu pe faafa, ia o le faamanatu lena.

Se i ou amata mai i le Minisita mo le Soifua Maloloina, faafetai foi i le Afioga i le Minisita, sa tulai mai i le foe, masalo o le tatalo masani, ia se i alofa se i fai sina Health Centre i lou itumalo. Ua taumamao Poutasi e auala mai ai i latou. O lo o i ai le falemai tuai sa i Salesatele, o lo o i ai nei le tulaga o le fale ua leai se fale. Ae a mafai ona toe fauina sina mea laititi, e aveva lena ma nofoaga e sulufai i ai le toatele o le itumalo, ia aua ia auaunaga faigofie, ina ia mafai ai ona tali ia le latou tovaa mai, e fia manaomia se fesoasoani tau soifua maloloina.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ae manaia foi ae toe fafagu le Polokalame lea manu ane lea ua tuufaatasi, polokalame lea e mafai ai ona o i tua foma'i, i tatou Komiti foi ia e i tua i o tatou nuu, lea e masani ona fua ai le pepe ma fai ai le tui puipui. Atonu o se avanoa lelei lena, mo tatou tagata matutua ma i latou eseese e mafai ona tovaa ifo, i le aso e fai ai ia le fuagapepe lea, ia ona fua ai le suka fua ai ma le toto ma nisi vaega o auaunaga e mafai ona ofoina atu e lo tatou falemai. A o se tulaga lelei tele foi lena, pe a toe faaolaola lea vaega. O le faatuina o le Health Centre lea, o le a matua tele lava se fesoasoani mo le aumatutua foi o le matou itumalo, ia aua le feoaiga faafaigofie mo latou.

Ia e momoli le faafetai tele e tusa ai foi o auaunaga o lo o faatino i le falemai i Poutasi, e le toe afea i se faamatalaga se taavale ua uma ona saunoa i ai se tasi o sui usufono, le manaomia tele o se ambulance ina ia mafai ona station ai i i lo tatou falemai i Poutasi, ia aua ia gasegase faafuasei ma manaomia i se taimi vave.

Lau Afioga i le Minisita mo Pisinisi Alamanuia ma Leipa, ia malo faafetai. O le sailiiliga na fai, na maua ai ua siisii teisi ia le tatou tupe maua i le 3 masina talu ai i le tatou vaalele. Ae sa ou tausailiilia po o le a le isi vaega ua alu ai i luga le... Manaia ia o le polokalame lea ua faaalu i tua i nuu, o lo o i ai ia latou o lo o galulue i lalo o le maketi, o lo o i ai ma le alii lena ua faaoga o se sooupu e faalauiloa ai polokalame a le tatou vaalele. Lea ua oo lava i maliu ua alu i ai, o saofai ua alu i ai, o faalapopotoga foi lea o convention ua alu i ai, tuufaatasiga o aulotu o le manaia ia.

Aua foi o lea o le a target ai i i, o tatou tagata ia e tele ina feoi ai i i i la tatou vaalele. Ae o se tulaga manaia tele lea ua mei i ai ia lo tatou vaalele, i le faalauiloaina o le tatou vaalele. Malo faafetai, pau lava le mea ia aua ne i faatutusaia ia le tatou pasese ma le Air Niu Sila. Pe alu lava i luga le Air Niu Sila, ae tolotolo pea tatou i lalo ina ia faigofie ia le femalagai o le tatou atunuu.

Ia o le Minisita o Turisi, lau Afioga Sala, le toeaina fai mai e i ai lona fale sefulu. Faafetai, afai ua e musumusu ane i le Minisita mo Galuega e tusa ai ma tatou asiasiga e tele na faia, talosia ua oo i ai se musumusuga, fai auala o nai turisi o le itumalo. E le na ma le laina lau Afioga, a e tietie atu i se po, ona e iloa lea o le auala lea e alu agai i lalo o le turisi lea i Salani, Surf Resort, e leai se moli i ina i le magaala lena. Sa ou talosaga foi i se... ina ia faamalamalama, ae oo i le auala e alu i lalo, ua faata nei le auala lea e alu i luga, ua tiai atoa le auala ua alu i ai le vai se i tulou. Ia o lau saunoaga taatia atu, o le a fai i ai lau galuega, ou te talalo talosia ia fai i ai lau galuega lau Afioga i le Minisita.

Ia ona oo mai lea i lau Afioga i le Minisita o Galuega, ia e le tau faafetaia ia galuega e tele ua faataunuu, pau lava o le toe faamanatu, o nai auala foi ia e alu i tai i le nuu o Utulaelae, e lelei lava aua o lea ou te vaai e fai ma e fealuai e feafioai e siaki ia o tatou auala, ia ma se lagona fiafia talosia ia oo mai se tausaga e fai ai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le auala i Utulaelae ua matua faaletonu lava le auala la e alu i le nuu, matua leaga faia lava. Ua beyond maintenance, ou te leiloa la po o le a le mea e i tua atu o le beyond maintenance, pe uma loa le beyond maintenance uma loa. Ae o le tatalo, o se talosaga vaivai, toe tuu ane i ina, o lena ua taoto le talosaga, ia ae o le toe faamanatu, ma toe faamanatu i lau Afioga aua ou te iloa, e tele manaoga o tatou sui a usufono, ia ae laitiiti lau taga o lo o fealuai ma oe.

Ia ona oo mai lea i le ta auala lea i le pioga lea e amata mai le auala laupapa i Salani, o le auala lea, ua tuli tasi lava turisi e o i Aleipata, ae mo lou silafia lau Afioga i le Minisita, ua uma ona talosaga atu i le Matagaluega, ona o atu lea o latou tanu tanu, toe timu lea, e le i atoa se vaiaso toe pu pu foi se i tulou. Pe leai se isi vaega e fai atu i lo o le tanu tanu? Pe i ai se isi mea e tanu tanu ai ia umi lava ona malo? E faatalitali ai le taimi e ta ai. Ae o lau fautuaga, e le aoga ona toe tanu tanu. O le auala lea ua beyond maintenance foi. Ua matua manaomia le ta fou. Ou tietie mai e sau mai Fagalii Uta i Vaivase, o le manaia ia o le sosolo lelei o pau o le taavale i le ta manaia la e i ai. Maimau na o le moomooga faalupe o naumati maimau pe ana oo atu le ta lea i tua, semanu e le taitai toe manaomia le toe maintain o le auala lea e oo lava i le 10 tausaga. Ia aua o tatou auala lea e i ai nei pau lava le mea ia atoa le 3 tausaga pe 2 tausaga ae toe pu pu foi.

Ia o le tatalo lau Afioga, o le auala foi lea na ou talosaga ai e fai ma escaped road i le taimi o faalavelave faalenatura. O lo o i ai le auala o lo o sau i totonu o le nuu o Salesatele, e taloto mai e alu i uta i le main road. O le auala foi lena e fesootai ma le auala galue e alu i uta a le nuu, o lo o tele e o lo o papaaao ai. Sa ou talosaga pe mafai ona sua le auala lea pe tanu, tau lava ina ia tanu ina ia mafai ona o ai taavale, ma faaoga i taimi o faalavelave faalenatura, e sosola mai ai le fanau aoga ma i latou o i tai, ina ia maua se lafitaga i le pito i uta faamolemole lau Afioga.

Ia o le auala lea i Salani ua uma ona tanu, ae o le faalavelave o le tanuga o le auala lea, i tala ane o le falesa, ua mapuepue le tanu, ua alu atu ai le vai ma ua toa ai i i, ma tauau ai loa ina alu ese le auala lea faamolemole, manaomia ni nai paipa sima se i tulou le Maota, se lua na ona eli lava ma tuu ai i lalo, ia ona flow lelei lava lea o le alu o le vai. Ae tuu ai pea tusa lava pe le taina. Na o le tanu lava la ua manaia lava ma la ua feoi ai taavale ma o atu ai i le faleaoga, ia la ua ta auala mulimuli na i auala galue e pei ona talosaga ai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoti: Lau Afioga i le Fofoga Fetalai...

FOFOGA FETALAI: Ia se i tulai mai le Taitai o le Malo.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Ia faasaoina ia le toe oo ai ni sui usufono i le tulaga lea i le toe faalelei o auala ua faatalanoaina e le Kapeneta. Ma o le mea moni lava pe a matau, o le faagasologa sa sau ai o le taumafai lava ina ia faaleleia faasolosolo auala, ae lafo atu i Kamupani e tofu le kamupani ma vaega ala e vaai e latou le teuteu. O le mea la ua faatalanoaina e le Kapeneta ua le toe aoga lea faiga. Ua tupu soo foi le mea lea o le teuteu faatalapelolo e Kamupani fai auala e malamalama lelei i ai ia le sui usufono mo Siumu, le Pule o le SWELL. O le mea foi la sa saunoa manino ai i lana foi ia Kamupani.

O le fuafuaga la lea ua faatalanoa e le Kapeneta, ua sili ia ona taofi tupe ia ae o mai e fai faatasi faasolosolo auala, ae soia le toe ave e maumau i na kamupani. Ua fai soo fai soo i luga o le tulaga foi lea o le tuu atu o le avanoa i ai latou e faaleleia auala nei ma le mafaufauga ina ia faaoga tupe nei e o e faatau mai ai ia ni a latou masini e faaleleia atili ma faaleleia atili auala. Ae o le mea mautinoa, e le o iloa po o fea ua agai i ai tupe ae vaai atu lava ua palalu ifo i lalo ia latou masini ma faaletonu atu ai lava ia ma tatou auala.

Ua uma la ona talanoa le Kapeneta i le tulaga lea ma o lea e faafogafoga mai le Afioga i le Minisita, o le asiase i ai le Kapeneta i le faiga tuai lena e sili ona taofi ia na faiga. Ia ae afua le tulaga lena ona o le vaai pea vaai pea o mea la e fai i fafo afai e faaleleia le auala e matua sua ese ia le omo lea, faatele. Ia ae o le a le mea lea e tupu? Ia e oo lava i lou auala se i fai ma tilotilo mai o le Palemia, ia ou te alu atu ia na ona asu ane lava o palapala ma aumai lea o le pulumu, faatoa ou tau lea i se atunuu e faatino i pulumu foi ia e salu otaota, ae ua avane ta ta ai le auala.

E i ai le taimi na ou fautuaina ai le Minisita se i alu atu lava se i vaai aua ne i ou toe vaai i mea ia, ia sau loa le masini tumu i mea o... ou te alu atu o tumu i latou masini foi ia e ola loa, tetete atoa lao Fiti e alu i isi atunuu, e ola loa le mea lena e te vaai atu i le tino o le tagata na te uuina e lulu atoa faatasi ma le masini i le malosi i le tuiga i lalo, ae faatoa ou maua mulimuli le tala, e pepe uma a masini na e i luga o le loli, na ona aumai e faatitilo i ai le aufaigaluega a le LTA. O le mea foi la lena ua matua tilotilo lelei lava i le LTA, e tataua ona faamaoni foi latou na sa faauluulu i ai faatasi ai ma le Komiti lena, ua mao le tulaga i nei foi Komiti. O Komiti na e tataua ona latou o e vaai lelei mea ia, ae maua atu, ua o lava latou fai a latou mea e le logoina le Minisita. O le tulaga la lena o lea ua tilotilo totoa i ai le Kapeneta, ua saunoa foi le Minisita i lona taumafai, ua tele auala ia ua vaai ai i le faiga fou lea, e pei o le alu atu lea i uta i Aleisa, lea e silasila i ai i vaega uumi o le auala ua matua faaleleia atoa. O le mea la lena o lea e alu faasolosolo. O le mea la lena sa naunau ai le Afioga i le Minisita ina ia lava nai seleni e faatino ai fuafuaga ia aua leaga e sao le finagalo ia ua faaalua e tataua ona faaleleia tatou auala, a o lea ua amata, ae onosai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Ia, tulai mai le sui usufono e le o toe umi foi le taimi o le sui usufono.

Afioga FUIMAONO TEO SAMUELU TEO: Lau Afioga i le Fofoga Fetalai, malo faafetai i le faamalamalamaga manino. Talosia ma tatalo i lau Afioga i le Minisita o Galuega, ta te le fia vaai i masini ia e pepe ma avatu i tua i le matou itumalo. E manaomia ni masini e ola e tetete ae ola e tuitui lelei ai le ta auala.

Ona ou oo mai lea i le mea mulimuli faamolemole lau Afioga, o lou auala lea ua uma ona saina le konekarate e fai ai, ia o se tala fiafia ua alu atu le masini i le lua masina talu ai ma sua autafa ma le faamoemoe o le a tanu atu loa ma fai, ae faanoanoa e faasilasila atu, ua toe sosolo lava le vao i luga o le auala e le iloa le taimi e ta ai. E fia iloa foi le tuutuuga o konekarate nei po o le a le taimi faatulaga e tuu i ai, ae vili atu i le pule o le konekarate, ae fai mai o la e se i tau saili se mea e maua ai se maa e tanu ai le auala. Ona ou faapea lea, e faapefea ona malo i le tauofoga pe a faapea e le i tapenaina uma vaega ia e faatino ai le galuega? Ia na ona tuu atu i ou autafa lau Afioga, e le o se faitio ae na o se toe faamanatu ina ia mafai ona tau faanatinati ifo si auala lea i uta i Siuniu faamolemole.

Ia, o le manatu faaii lau Afioga i le Minisita o Tupe, malo faafetai mo le tapenaga o le tatou Tala o le Tupe. E leai lava se vaega...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga ou te le maua atu, o ai foi le nuu lea e te saunoa mai ai?

Afioga FUIMAONO TEO SAMUELU TEO: O le tamai nuu lea pei lava o Petelema na fanau ai Iesu o Siuniu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O ai?

Afioga FUIMAONO TEO SAMUELU TEO: O Siuniu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E ala ona ou fesili atu, o au e sau mai Atua, ae ou te le i faalogo a i se nuu e igoa ia Siniu.

Afioga FUIMAONO TEO SAMUELU TEO: O Siuniu, e ese mai le toa ma le toa lea na talanoaina.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Se faamolemole, o le nuu lea o Vavatau?

Afioga FUIMAONO TEO SAMUELU TEO: O le nuu lena e igoa o Piu. E ese Piu, ese Siuniu. O Piu la e tau faaletonu, a o Siuniu la e lelei. Ia e faaiu atu ai ma se manatu lau Afioga...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E faaataata lafoga ia a tatou talanoaga ae o le faafesili atu o le fia malamalama leaga ou te... o lea la ua maua atu o Siuniu. Ai ona o le tulaga o le po ua nini faatasi le i ma le n, e le o Siniu la, a o Siuniu a? O lea la ua malamalama, e ese a Siuniu ese Piu. O nuu la ia e tatau ona oo atu i ai le vaaiga ma o le a ou alu atu ou te vaai ai i ou auala ia, ou te alu atu lava i le faaiuga o le vaiaso se i ou alu atu lava se i ou vaai tino i ai, ona o le tulaga lena e le tuuititia ia matou. O auala uma lava ia e faamaumau i i, ou te alu atu foi ou te fia vaai i ai.

FOFOGA FETALAI: Malo. Faaiu maia le saunoaga a le sui usufono. Vaai pe le lavea le tou afioaga i le ituaiga mea foi lea o le uma ona o atu le aufaigaluega e faata toe o ifo salu le iliili e ave e tanu ai o latou fale.

Afioga FUIMAONO TEO SAMUELU TEO: Leai e le maua le mea lena na o Aana e maua ai le vaega lea. O le tulaga lea ne i te i ua afe muamua i Piu, e muamua tau i Piu e faafesagai ma Sapunaoa. O le nuu lea o Siuniu e faafesagai ma Salesatele mo le silafia. O le tulaga i le tatou Tala o le Tupe e fia fai ai se faamatalaga lau Afioga i le Minisita, malo faafetai. Sa ou matau ma le totoa i le semina masalo e le i mamao atu, a o le fesili foi lea na tele ina fesili ai sui usufono lea na faamanino e le Palemia aemaise o lau saunoaga lau Afioga i le Minisita, ina ua aumai e le Afioga i le Pule, e sefulu sene mai le tala. O lau tatalo la na ave i le alii Pule, o le a le mea e ala ai ona e popole e fai se isi aitalafu ae le matua aumai ni tupe aitalafu e fai ai atinae, aua a lelei atinae, lelei tupe maua ona toe totogi atoa ai lea o a tatou aitalafu. E le o se aitalafu la lea mea. Aua o lau tala na fai, afai e sefulu sene mai le tala....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai e faamalulu atu, e ala ona faamatala faapena mea ia, leaga o le gagana lena e talanoa i ai le au polofesa o mea tau tupe, e tatau lava la ona faaoga le gagana lena, ae aua e te popole i ai e le o ni mea foi nei e leai ni ola e le popole i ai se isi.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ae taatia mai pea o lea lava o lo o faatautai e le Minisita o Tupe vaega uma na, o le mea foi lena a e silasila mai ai, e leai lava se isi o matou o popole ona o le faatuatuaga ua tuuina atu, se i vagana le sui usufono lea ua le nofo mai i i na o ia lava lea e popole. Ae leai o lea lava matou te talitonu o lo o tuutasi lava le faiva o Pili ia Pili i le tulaga o le faagaioiga o tulaga tau tupe ma o le ala foi lena o lea matou te... a e silasila mai o lea lava matou te fiafia a ona e leai lava se mea o faaletonu.

FOFOGA FETALAI: Malo. Faaiu mai le saunoaga a le sui usufono.

Afioga FUIMAONO TEO SAMUELU TEO: O le faamatalaga mulimuli i lau Afioga i le Minisita, e lagolagoina e lenei itumalo le Tala o le Tupe, ma le agaga atoatoa ma le selau pasene faaopoopo i ai ma le tasi. Ia, o le tatalo i lau Afioga i le Fofoga Fetalai, ia faafualoa e le Atua lou soifua, ia foai le soifua manuia aua ou tiute i totonu o le Palemene. E tatalo foi ina ia maua le malosi o le Afioga i le Palemia faapea le Aiga Kapeneta i o outou faiva, aua o outou faiva matou te taputapu, matou popo le fala ma ula le mulila a o outou alofaiva i outou tiute aua e le faigofie. O outou, o tatou uma lava lena, a sese le taitaiga o le tatou sa i la outou taitaiga, o le sese atoa lena o tatou, ae matou te tatalo ia outou manuia, ia manuia outou faiva, ia manuia le nofo tapuai a sui usufono o le Palemene aemaise le loaloa o Ofisa Sili o Pulega o Matagaluega ma Faalapotopotoga o lo o fai ma vae ma lima i ai tiute ma feau a le Malo aemaise le nofo tapuai mai a Samoa o lo o faafogafoga mai, manuia le Fonousu a Samoa ae ola le leo faafetai.

FOFOGA FETALAI: Malo faafetai saunoa i lau Afioga i se tasi o sui usufono mamalu mo Falealili, o faafogafoga tapuai mai foi le itumalo aua le saunoaga matagofie. Ua avanoa foi le Nofoa mo se tasi o sui usufono e tulai mai e faaauau le saunoaga, e tele le tatou taimi.

Manaia le taimi lenei o la e faafogafoga tapuai mai itumalo aua ua faofale uma aiga, tulou i sala le gagana o le upu foi mai vaeane le paia o le Fono, e le o toe mamao foi le tatou palota e fua i ai le lelei o le sausau a le sui usufono.

Ia, na ou tapa lau Afioga i le Sui Taitaifono o le Komiti o Tupe pe muamua ona e saunoa ae mulimuli le Taitaifono ae faasolo pea le tou Komiti aua o lea e i ai isi sui usufono ia e le o lavea i le Komiti e manaia pe a tulai mai e saunoa pe afai o la e ua tapena ma sauni. Ia, foi maia i le alii matua o lea itu o le Maota, lau Afioga i le Laauli mai le Gagaifomauga Nu.3.

Susuga Hon LAAULI POLATAIVAO LEUATEA (Gagaifomauga Nu.3): Ou te manatu ua ava atu i lau Afioga i le Fofoga Fetalai, ua gona foi le Maota, ona o lea ua faliu le la i lona tauafiafi.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E manatu o se laolao lelei leni e avatu ai se upu a leni itumalo, o lea ua tomua atu le tamaitai faipule o leni itumalo e faaleo ni lagona aemaise foi o ni motugaafa ma ni fautuaga aua le lufilufiina o le tamaoaiga o le tatou atunuu. Sa manatu foi e le faaluaaina le aso leni, sa faapea o taeao ona taumafai lea o se leo leaga sa ave le faamamalu ma se faamuamua i le Lauga Faataupou a le Pule Faavae o le Puleono i Salafai le Afioga ia Namulauulu. Ae ua manatu o lea ua e faatauinau lau Afioga i le Fofoga Fetalai, ia e le faia se loto, ae alu i le ia faalolo e tauavea ai se manatu ma se lagona i leni taeao na liugalua. Ia malie ia te oe upu a lou gutu ma mafaufauga o lou loto le Alii e, o Oe o lou papa ma lou olataga, o Le na togiolaina au. O le tatalo faatauinau a le Taitai o le Sauniga ina ua faapaia le Maota leni, fai mai le saunoaga a le Taitai, o Le Atua e, ia e afio i le fale lea, le Atua e, ia e afio i le fale lea ma ia tumau le faauuga i luga o le Palemene o Samoa. O upu tomua ia o le taumafai atu o sou vaivai lau Afioga i le Fofoga Fetalai. O le a taoto Samoa ma ona sa, aua o lea ua afio le tupu na tafai, o le Atua soifua o Le ou le Mana ma le Malosi uma lava, o le Atua le Tama, le Atua le Alo ma le Atua le Agaga Sa, o lea ua pine faamau i ai le Faavae o le ta Malo. A o le leo o le tauafiafi o Aana sa tauave ai le anavatau e faapea, taoto au, o lou taimi lea. A o le alaga mai le vasa ma le moana, ua taunuu le valoaga o le faaolataga ua taunuu i Mataniufeagaimaleata, Faleu ma Utuagiagi, Malaola ma Nafoga. O le ta saolotoga lena Samoa, o taeao ula na o le tatou atunuu o lea e puaiina mai ai faamanuiaga mo Samoa mai le amataga e oo mai i le aso. Tatou ave laia o le faamua i le Atua ua tatou sunui ala o taua, ae tatou sisi le fua o le manumalo o ia ua tatou maua ai ao ma iu o manumalo.

Tulouna lau Afioga i le Fofoga Fetalai, o oe lava o le ua faalanumaaveave e le toe sili atu se tasi i lou nofoa vaevelololoa e faalogo ia te oe le Palemene o Samoa. Ou te le toe faaopoopo se iota pe ou te toe fofola se fala i lau Afioga Leaupepe Toleafoa Faafisi, ua tusi i maa papa o le Palemene leni le tautua ua oo, tautua matapalapala aua le tautuaina o le atunuu ma lona Palemene i ona vaega eseese, e faatulou atu i lau afioga.

Afio lau Afioga i le Palemia ma le mamalu o lau Kapeneta, o outou o sui ua faia mai i le fuifui e fili tagaga i ai le filifiliga a le Palemene aemaise o sui mamalu uma o tootoouli o Samoa mai itumalo e fia. Le paia i Aiga ma a latou Tama, Tama ma o latou Aiga, le Usoga a Tumua ma Pule, Ituau ma Alataua, Aiga i le tai ma le Vaa o Fonoti. Malo le soifua manuia i leni vaega o le aso.

O le upu a Iesu Keriso o le taimi e lelei ai la outou malolo, o le taimi lena o lo o matou galulue pea aua le feau a lou Tama, e manatu e faapena le afiifi leni. O lea ua faasolo le la i lona nofoaga, ae o lo o vaaia pea le galulue a lou Palemene aua se manuia o Samoa o nei ma a taeao. E faatalofa atu foi i Ofisa Sili o Pulega o Matagaluega ma Faalapotopotoga a le Malo. O outou lava o vae ma lima ma le aao malosi e faatinoina mea uma o lo o pasia atu i le Maota leni.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Le tapuaiga a lau Afioga i Le Ao mamalu o le Malo ma lau masiofo, faatalofa atu. Lau Afioga i le Sui o le Fono o Sui Tofia ma lou faletua. Tulouna le tapuaiga i faafeagaiga taulagi i soo se fata faitaulaga, aua le Atua ma Lona finagalo. Le uso i lo tatou Malo i Sasae, e le tau fai se upu, e tasi le tama, tasi le tina, e uso i taua. Lau Afioga i le Kovana sili, le Fofoga Fetalai, Maota o sui ma le faigamalo. E faafetai atu i le fetalaiga i le taeao lenei Namulauulu, ua logo i tino matagi lelei, e mitamita faiae le lagona faasui ma le tatou nofoapule i lau faatofalaiga, aemaise o lau saunoaga faataupou, faafetai faaeaea itumalo. E leai se tuluiga o saunoaga e te le i oo i ai, e leai foi se vaipanoa o paia o sa ma faiga o lo tatou atunuu, e te le i paia, ona lagona lava lea o le agaga faafetai. Leaga e faamemelo Pule i le pule faavae. E le tau fai atu o Leaula ma Letufuga tofi na o atu o lea e filitagaga maua le nofo a Pule. Ia maua lau tofa, faautautaga aua lo tatou va faafeagai ai.

Ua ou manatu lau Afioga i le Fofoga Fetalai, o se laolao lelei lenei e avatu ai se lagona o lenei itumalo. E le o toe po Malae i le mataupu ua tulai i lou sui usufono. Ua ou faleesea ai, ua ou tulai i se tulaga o ee, ona o se mataupu na tulai mai e le toe tau faailoaina lau Afioga i le Fofoga Fetalai, i nai ou manatu ma nai ou lagona sa folasia i malae. Ae ua faapena ona faaalua i ai finagalo o lau Afioga i le Fofoga Fetalai, faapea foi le finagalo o le Taitai o le Vaega Faaupufai ma sui usufono mamalu uma o lo tatou Palemene. O le mea moni, e leai se agaga ou te faatau matatao, e leai se agaga ou te ati se olo, pe fau se pa i lo tatou va faafeagai ai. E leai, leaga e le o le faatonuga lena na ou sau ma au. O le tofa ma le faautautaga a le itumalo ia sa-Tupua ma sa-Malietoa, sau e alu e tautua lo tatou itumalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai

FOFOGA FETALAI: Ou te vaelupeina le saunoaga a le sui mamalu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Sa ou manatuí ..o le mea e fia faasao. Sa ou manatu e le oo le sui usufono i le tulaga ua toe agai i ai lana saunoaga. Aemaise o se sui usufono sa tusi aao i ai le Palemene e avea ma Fofoga Fetalai, o se sui usufono foi sa ou filifilia e avea ma Minisita o le Kapeneta. E malamalama lelei i tulaga o le Vaega Faaupufai. Sa nofo i le Nofoa lena ma faafoefoe mai aií í e malamalama lelei i tulaga ma aiaiga o le avea ai o le sui o le HRPP. I le tulaga e fai ai lana filifiliga, na mafua ai ona oo mai i totonu i le Vaega Faaupufai, ma saina ai feagaiga i mea e tatau ona ia mulimulitai i ai, o ia o le sui o le Vaega Faaupufai lenei. E tatau foi ona malamalama mulimai ia muamai. O mea sa tupu i taimi o lona tuua. Ou te le tau fai atu, o le fono lenei o le Fonousu a le atunuu, e le tatau ona aumai i ai le mataupu lenei.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Ae le mafai foi ona ou nofonofu i lalo ma ou faalogologo atu pea o sausaunoa le sui usufono i mea ia, e tatau lava ona ou faauilavea. Leaga e le pogisa i le sui usufono sa nofo i ina i le Nofoa, e malamalama lelei ma faafoefoe mai ai taulumaga o faaiuga a le Maota lenei, i luga o le aia tatau faapati ma le aia tatau faasui. A oo loa ina fetotoai mea ia e lua, o la e silafia lelei e le sui le mea e oo i ai le faaiuga.

E le o ni mea faatoa fai nei ananafi, o mea na fai mai lava i le amataga o le Vaega Faaupufai lenei, ma e tatau ona malamalama i ai le sui. O le ala lea ou te tulai atu ai, ma e le mafai ona ou nofonofu i taimi uma e te talanoa ai i mataupu ia, e tatau ona ou faasaoina.

FOFOGA FETALAI: Ou te faamalulu atu i le sui usufono, se i tau fai atu foi se lagona. E faitau eseese Tutuila ma Ape e pei o le upu e fai i le la usoga. Ona ou manatu lea, e faamalulu atu i le finagalo o le sui usufono o lo o saunoa. Ia talu ai ona ua tulai mai le faauilavea i le Palemia, e i ai itu maaleale e manumanu i ai i tulaga ia. E i ai lava le laolao e uma foi taeao, e faapena ona maua foi aao o nuu ma tulaga o i ai i feeseeseaiga i le eseeseaga o finagalo ma lagona. Ou te faamalulu atu i le faafofoga tapuai mai a Samoa, o le a tatou toe asa i tua, e ese ai la tatou galuega o lo o faapena ona tagofia i le Maota. O le mea lea, ina ia faafaigofie la tatou galuega, ou te faamalulu atu i le sui mamalu e pei ona e saunoa. O lea foi ua taoto i lumamea nei le finagalo o le Palemia. Tulai mai le sui usufonoí ..

Susuga Hon LAAULI POLATAIVAO LEUATEA: Ou te asuasua atu vai malu i puega lau Afioga i le Fofoga Fetalai. O lea lava sa ou faaoololomaau, ou te le sii lava se ta i si au folasaga na avatu. O le aano moni, e le faia i tua sou lagona, leaga o le mataupu ua lagona Samoa atoa, e leai se vaipanoa o le lalolagi e le i silasila. Ona ou manatu lea i le tulaga aloaia, e avatu iinei sau faamaluluuga, o le agaga lena o lea na ala ai se taumafai atu.

E faamalulu atu i lau Afioga i le Fofoga Fetalai e pei o ia upu, na ou tapa ai lau Afioga i le amataga. Ua ou momoli atu vai malu i puega pe afai ua feeseeseai manatu ma lagona i lea taimi. Faamalulu atu foi i le Palemia, e silafia e le Atua mea uma, ma le avatuga o le lagona, aua se Tulafono taua. Ae afai ua pao papa pe le talafeagai i lo outou finagalo, ia malu ave i fale. Faafetai i la tatou Vaega Faaupufai, e le mafai ona tuua i tua, ou te le sola e pei o le sola a Faleata, pe ou te mou e pei o le mou a Aana. E leai, na ona ou faalatalata atu i le agaga o le loto maualalo, lagona ona ua iu ai le taulaumea ma loifofoga ae potu pea lagona, o faaleleiga ma faamagaloga. O lea ua e tali i si ou fanoga, ia pau lava lea o lau tuualalo aumai le alofa, e fai ma fusi o feagaiga sa osi. Ona ta te lei mafuta i ni pepa, o na i ou mata na tatou faafesagai. Ia tumau le la i luga o Kipeona, tumau le masina i luga o Aiorona, aua la tatou Vaega Faaupufai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E le mafai na tauese e le mafai foi ona ou tulai i se tulaga ou te tu ma ou toe sasau, e leai e le o le agaga lena lau Afioga i le Fofoga Fetalai. E pau lava lea, o le alofa moni e avatu lava i luma, tele pe itiiti pe paopapa, ia faatafatafa i le finagalo, a faaoga lelei, a leai ia natia ifo i fatualavai. Lau Afioga ona ua ou manatu, e le toe natia, o lou alu ese mai i le Minisita lau Afioga, o le ala leaí .

FOFOGA FETALAI: Ua ou manatu, ne i o tatou toe alo i le ogasami ua tuanai, o itu ia o lo o popole ma manumanu i ai le taofi. E pei lava foi ona avatu i le taimi ua sola, e faapena ona faitau eseese ia lagona e pei o le upu e fai i Aana. Ona ou manumanu lea i o tatou toe foi i se eseese sa i ai i futia ua sola. Ae o lea ua maua atu lou finagalo ua maua foi e le Afioga i le Palemia, ona i ai lea o le manatu, ia taoto maia. Ao le tulaga o lo oulua finagalo, e leai e ese le tatou galuega. E matau foi i le tapuai mai a Samoa, ona e le avatua i luma foi pe tatou te faia se finauga, i faiga faavae ua faapena ona uma ona faataoto, i lea itutino ma lea itutino. E le gata foi i le Palemene e pei ona silafia, o lea foi sa faitauina i le aso i le faautotoga o le sui usufono mo Faasaleleaga Nu 2, ia le tulaga o tatou Tulafono o le Faatinoga o le loto faamaoni. O vaega ia e tau i le Palemene, e i ai foi vaega tau i Faalapotopotoga e pei ona tulai mai ai ia upu fai o Malo. E pei o itu ia e musu foi le Fofoga Fetalai, tatou te toe oo i le ogasami lea. Ae ui i lea ua ou manatu ua i fale le matega i lo oulua finagalo, masalo o le finagalo foi lea o le Palemia. Ae talosaga atu ma le agaga faaaloalo, ia sui mamalu e o lo o saunoa. E leai, e faapena e tupu matagi i liu o vaa, e le aveva foi lou taulagalaga e tusa ai o lenei taimi, e faapena foi, e leai se gaumatau. O Samoa e leai se gaumatau na o le gaulofa. E pau lava lea o le mea ia tatou savavali i le amiotonu a le Atua. O le mea aupito sili lena ona taua. Pe ou te tautala i gagana a tagata atoa ma agelu ae leai se alofa, o le sumepalo tagitagi po o le apa memea taalili. E faavae i mea uma lava na le Tulafono. O le Tulafono tatou te faavaea I faiga faavae, tatou te Fausia faiga faavae e fua i le alofa fai mai ai le Atua. O le mea la lea, malie le sui mamalu tatou see ia i se isi vaega o le saunoaga ma le tala o le tupe.

Susuga Hon LAAULI POLATAIVAO LEUATEA: Faafetai i lau Afioga i le Fofoga Fetalai, ua ou manatu e oo i itutino le lagona o le ava atu. Ae o le mea lenei o le aveese o le faatuatuaga e le o se mea faigofie, e le o se mea e talia gofie, lau Afioga ou te faapena atu se faamatalagaí

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e pau lava lea o si mea o lea ou te fia talanoa atu ai, i le tulaga lea ua talanoa mai ai le sui usufono.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

O le tausaga lenei 2019, o le tausaga 1979 na faatu ai le Vaega lenei, o le fasefulu lenei o tausaga talu ona tulai mai le HRPP ma ana faiga faavae sa fesuisuia. E fesuisuia e tasi lava le auala na faatino ai faiga nei lau Afioga i le Fofoga Fetalai. O le taumafai ina ia faatumauina ia le tulaga o le maopoopoga. O le tausaga e 1989, tolusefulu tausaga talu ai, na faamuta aloaia ai i totonu i i, totonu o le Palemene lenei, ia se tasi o sui o le Vaega Faaupufai sa taitaia le tatou Komiti o Tupe, faamuta a i totonu o le Palemene lenei ona ua le faatuatuaina e le Taitai o le Vaega Faaupufai ma le ma le Vaega Faaupufai atoa. O le mafuaaga na faatino ai le fuafuaga lena. O lea la ou te talanoa atu i le talafaasolopito o le Vaega Faaupufai na mafua ai ona tulai mai o le Vaega e maopoopo. E le faapea e tulai atu lava le tagata ia e fai le mea e manao ai ma teena, tutu i luma o le Tulafono o se Tulafono e aafia ai le Faavae. E leai se sui na faia le mea lena talu ona tulai mai le Vaega lenei. Se i vagana isi tamai Tulafono na fai ai ma le faaiuga foi i le isi foi sui usufono lea na iu lava ina alu aveva ma Taitai o le Itu Agai. O mea o Tulafono a le Vaega lenei e le tataua ona aumai i totonu o le Maota lenei. O lea ou te tautala atu i faiga faavae a le Vaega lenei, e malamalama lelei i ai le sui usufono aemaise o le taimi na faafoeina ai le Nofoa o le Palemene ma ou tuualalo atu i ai ma faamanatu i ai mea ia.

Lau Afioga i le Fofoga Fetalai, o le ala lena sa ou manatu lava e manatua e le sui usufono tulaga ia ae ua pogisa atoa lona finagalo ona e i ai le mafuaaga. O le mafuaaga o lea sa ou taumafai ai e faalelei le la misa ma le uso lea e nofonofu atu i ou tua, lea e malamalama i ai le sui usufono lea, faalelei i ou luma. Toeitiiti tolu tausaga o ou taumafai e fai le faaleleiga. A o le fetotoai la lea, lea na iu ai lava ina faamavae le sui usufono ma faagaulemalie ai lava, ma faatino ai le faiga lea. Ou te musu e tautala atu i mea ia, ae tau ina ou faamaalo iuofe, o le mafuaaga lena, sa ou taumafai i le lua i le tolu tausaga o ou taumafai e teuteu i le vatapuia, ina ia aua ne i oo i le faamasinoga le la mataupu. O le a la le mea lea ua i ai? O lea ua oo lava i le faamasinoga, ma ua sili atu ona taugata ma ua sili atu ona toe mataga ai lava laua ia. A o lau taumafai atu la ina ia fofu mea ia, a o le a la le tulaga lea ua aliali mai? Lau Afioga i le Fofoga Fetalai, se ou te musu e auiliili atu mea. Ae afai e tutulai mai pea le sui usufono o lea le mafai loa ona ou taofia mea faavaega.

FOFOGA FETALAI: Malo faafetai. Ia o itu ia lau Afioga e i le sui usufono mamalu mo Gagaifomauaga Nu.3. O itu ia o lea ou te manumanu i ai, a o le mea moni, e le mafai ona tuuaunoina e le Palemia le faamatalaina o itu uma ia e pei ona e tulai mai, aua e tataua la ona tatou o e faatino le tulaga o le faamatalaina o le mea moni ma le mafuaaga na mafua ai ona tulai le faafitauli e pei ona e tauasaina i lenei itula. Ae ou te faamalulu atu, o le manatu lava ina ia popo mai i fale manu, e manumanu foi aua ne i puaina i ala le tulaga o le faafofoga tapuai mai a Samoa. Ioe, o le agaga maualuga o tatou i o tatou tiute ina ia tatou faatino le tatou galuega i le agaga ma le faamaoni.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E pei o le tulaga lena, ae manumanu alofa. Ia e leai e faapena se lagona ae a e fausia i lou finagalo sa matou tuualalo, ia e manatu ona tatou taunuu lea i se taunuuga lelei i lenei afiafi. O lea foi ua tatou tulalata i le taimi e manava ai le tatou galuega, ou te talosaga atu o a fa au lau Afioga i le sui usufono mamalu...

Susuga Hon LAAULI POLATAIVAO LEUATEA: Ia, e faamalulu atu lava Toleafoa, ou te asuasua atu vaimalu i puega ina ne i tau eseese Tutuila ma Ape i sou lagona lea e tau momoli atu, o lea foi ua oo le saunoaga a le Afioga i le Palemia i le faamasinoga. Na ou aloalosa lava ma le mataupu lea, e ese le uiga o le mea lea na ou taamilo atu ai. O le ma faamasinoga ma Peseta ua uma, ua uma lau Afioga i le Fofoga Fetalai. O le agaga moni lena Toleafoa, ua maea, o lea e iloa uma e le Palemene le faaiuga o le faamasinoga. A o le mataupu lea e fai nei, o le va o au ma le Malo, ua faasaga mai le Malo ia te au, o lea ua tauave e le Loia Sili le mataupu. O le tulaga tiga lena lau Afioga i le Fofoga Fetalai o le tautua, tautua, tautua toe faasaga mai fasioti?

FOFOGA FETALAI: Ou te faamalulu atu, e te silafia e i ai foi a tatou faiga faavae faa-Vaega Upufai o Malo e tausia ai le maopoopoga. O le tulaga tonu a lena, ioe.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e i ai a si mea sia e le mafai ona ou taofia, leaga e le mafai ona tali atu le Loia Sili, e le mafai ona tali atu le Loia Sili, a o le mafaufauga lea e i le sui usufono, e matua sese atoa le mea lea. O le Loia Sili ma le latou Ofisa, o itu ia e vaavaai i ai i latou. E i ai le sui usufono na oo mai, faamavae mai ma le Palemene lenei, ona oo atu lea ia te au i le fale, talosaga atu mo sau fesoasoani. O au la ua oso lou alofa i ai, ona o le talosaga atu ua molia e le Ofisa o le Loia Sili, e le o le Loia Sili lea e i ai nei a o le Loia Sili muamua atu, ua ia molia le faletua. O au la ua oso lou alofa i ai, ona ou sau loa lea i le taeao ou mateletele atu i le Loia Sili, ae saunoa mai le Loia Sili, o le matou tautoga lea aemaise le faamasinoga lea na uma atu, faasalalau i le nusipepa, faasalalau matilatila lava i le nusipepa, o au na forge ina mataupu nei. O au la lenei ua tei. O le tulaga la o le temokarasi ma le amanaia e Malo o le rule of law, o mea ia o la e mataitu mai e le lalolagi. Ona fai mai lea o le Loia Sili ia te au, o le matou Tulafono Faavae lea, o le matou puipuiga o le Malo, aemaise ua oo i luma o le Faamasinoga ae talau mai i i ua tautino e se isi lona solitulafono ae leai se mea e faia i ai e le Loia Sili, o le a lea tulaga? O le matua afaina lava o le Ofisa o le Loia Sili ma le vaaiga o Tulafono a le Malo lenei.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Na faatoa ou malamalama ai i ina, ma e le mafai ia i latou ona taofia le latou gaoioiga e fai i luga o le latou tautoga o le faamaoni, tausisi ma vaai ma puipui le Faavae, o le Tulafono sili a le Malo leni. Vaai i mea ia e tutupu mai fafo, Palemia o Kanata ona ua nofo ma taumafai e taofi le Loia Sili mai le molia o se tagata faipisinisi, o lea foi la e upuia ai le Palemia o Isaraelu. O le Palemia o Samoa le Afioga ia Vaai na molia. E leai ma se mea a Vaai na faia, e le i faaoga e Vaai lona power faa-Palemia e taofi ai le Ofisa o Leoleo, taofi ai le Loia Sili mai le moliaga.

Lau Afioga i le Fofoga Fetalai, o aga ia, e tele lou alofa i e ua momoli i luga e le Loia Sili, ae le mafai ona ou tagofia le Loia Sili leaga o la e mulimuli le Loia Sili i le Tulafono Faavae o le atunuu leni o le puipuiga o le amiotonu. E oo loa i ai le faaiuga a le Loia Sili, e le mafai lava ona taofia e se isi malosi. Lau Afioga i le sui usufono, o lou masalomia o lou le fesoasoani atu ia te oe, o le puipuiga lea o le Malo. O le ala lena lea ua ou tulai atu ai leaga e le mafai e le Loia Sili ona saunoa mai i se tuuaiga ua faia i totonu o le Maota leni. O le ala lena sa ou musu ai e talanoa i le mataupu leni. E muliai fai le mea leni a ua leva ona e le toe agai mai ta te feiloai i au mataupu ma le Vaega HRPP. E muliai ona fai le palota lea na fai, ua leva lava ona e le o toe vaega i le vaega faaupufai leni. O le mea la lena e tatau ona ou faamanatu atu ia te oe, o le tatou mafutaga, na pau a lena o le mea e malamalama i ai au, o sui ia e faamaoni i a latou tautoga. O le ala lena ua le alofia ai lau faaiuga na fai ia te oe, ae ou te le faapea atu foi ua ou aveesea oe. O le a lau faasilasilaga? Ua e faamavae mai le Vaega aua o mea ia sa e faia, o le taunuuga lena e tatau ona e faamavae. Ou te le i faasalalauina na ou tulia oe, na ou avea i le Vaega, le tatou Komiti ave foi i le fonotele a le Caucus ma latou ioeina ai le tulaga ua oo i ai le tatou mafutaga.

Lau Afioga i le Fofoga Fetalai, e faamalulu atu i le sui usufono, a na e oo atu ia te au ma tau atu na mea ou te taua atu i tua, ae leaga ua e laga i totonu o le Maota, ua tatau loa ona ou tali atu leaga o lea e faafofoga Samoa, ma o le tulaga lena o le Ofisa o le Loia Sili, po o le Ao o le Malo, po o le Palemia po o le Fofoga Fetalai ae a silasila loa le Loia Sili e le talafeagai ia se uiga e tulai mai e fai lava le moliaga.

Lau Afioga i le Fofoga Fetalai, o le amiotonu lena faale-Malo ma o le puipuiga foi lena o le atunuu leni i le va feagai ai ma Malo uma o le lalolagi, o Samoa o lea e pulea e le Tulafono e faatonutonu ai le amiotonu o tagata uma o le Malo. Lau Afioga i le Fofoga Fetalai, o le faapuupuuga lena o lau tautalaga.

FOFOGA FETALAI: Malo faafetai. Se malie lava le sui usufono se i ou fesoasoani atu. Ua ou manatu o le a le tuuloaina e le Fofoga Fetalai le mataupu o lea ua manino mata o le vai i le matau faalogologo. Ia o itu ia sa ou fefe ma ou popoe i ai.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 & Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

E ese le lagona sa i ai le manatu o le Fofoga Fetalai, sa manatu i le tatou palota foi lenei tauvalaau sa i ai, a o lea e tulai mai e ese foi le tulaga o lo o ua i ai le mataupu e pei ona aliali mai. Ona faapea lea, o le Tulafono Tumau, o le a se mea e tagofia ua oo i luma o le faamasinoga po ua tagofia ai le tulaga faafaamasinoga, po o le tagofia foi ma taua ai se suafa o i latou ua mautofi o le Malo, e le mafai ona tagofia ma e le talanoaina i le Palemene ona leaga e le mafai ona tali mai i latou o Ofisa Sili o Pulega ma e mautofi o le atunuu i le Tulafono, aemaise foi o le mataupu ua faapea ua paia ai le Tulafono. Ona i ai lea o le manatu ua ou faamuta le mataupu lenei, ma ua ou faamuta foi le taimi o le sui usufono e pei ona ou taumafai atu i le agaga faaaloalo o le a faafofoga mai foi le atunuu. E leai, e le faapea ou te tu i le Malo pe ou te tu i le sui usufono mamalu o le Palemene. E leai, ou te manatu ina ia tatou agai tonu e tusa ai ma tatou Tulafono Tumau.

Ia, o le faaaliga lea ma le agaga faaaloalo. Malie le sui usufono, o le a ou le toe tuuina atu se avanoa ona talu ai afai ou te tuu atu le avanoa i lau Afioga Laauli, e toe tulai mai foi le Malo ma toe tuu foi i ai le avanoa. Ma malie lau Afioga...

Susuga Hon LAAULI POLATAIVAO LEUATEA: E leai sou loto e faia lau Afioga i le Fofoga Fetalai. E leai se isi mea ou te toe laa i tua, na o lau faaiuga lau Afioga o le a le toe oo sou leo o lea ua faalava lau faaiuga. Le Nofoa, e le toe i ai sou leo e faia, na o si mea lava lea, ou te le i faia lava se mea e leaga ai le Palemia ma ou te le i faia foi se mea e faaaoga ai le Palemia e taofi le mea lea, e leai. O lo o manino ma fetusiaiga, silasila i faufauga la e i tua o au. Ae o le a ou alu e fai lau faamasinoga. Lau Afioga i le Fofoga Fetalai, ua oo atu lau tusi e momoli atu i lau Afioga ne i te i ua le vaaia au i le vaiaso fou, ou te toe tulai ai i luma i o ou te tali faafa, faalima i le faamasinoga. Ou te le i faia se mea aua le Afioga i le Palemia.

FOFOGA FETALAI: Malie lau Afioga, faafetai. Malie le sui usufono. Malie lau Afioga o lea ua ou faamuta le mataupu. Ia, malie lau Afioga, o lea lava ua e silasila i ai e le tuumamaina e le Malo, e tatau lava ona toe tulai mai e faasao se mea e le o sau i le saunoaga a le sui usufono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le tulaga lea ua ou toe tulai atu ai, e tatau lava ona ou toe tulai atu ma ou toe faamanatu i le sui usufono nei tausaga sa ou taumafai atu ai e fai le lua faaleleiga ma settle i tua le lua mataupu. Toeitiiti lava a taunuu, toeitiiti lava a taunuu ae tasi a si tamai mea na le mafai ai ona ua e teena, ae na oo lava i ai le finagalo o Peseta. O mea ia e settle ai maua i tua. Na e ioe lava, e tasi lava si tamai mea laitiiti na e toe teena ai le faaleleiga na faia i ou luma.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

Afioga Hon LAAULI POLATAIVAO LEUATEA: Lau Afioga i le Palemia, e silafia e le Atua.

FOFOGA FETALAI: E faamalulu atu i lau Afioga Laauli...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O lea la ua oulua o fai le lua faamasinoga, i le lua lava faaiuga ua uma ona fai

Afioga Hon LAAULI POLATAIVAO LEUATEA: Silafia e le Atua. O le fasiotiga lena o au le mea na faufau e ave le Kamupani ma Peseta. Ae faafelea isi tagata o le Kamupani?

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: O le mea lena na ou tulai atu e faasao. le sese lea e te tulai soo mai ai.

FOFOGA FETALAI: Laauli, ou te faamalulu atu.

Afioga Hon LAAULI POLATAIVAO LEUATEA: O le mea lena na fafau, e ave le kamupani ma Peseta ae valiano uma matou.

FOFOGA FETALAI: E i ai le malosiaga o le nofoa, ia ua leva foi ona e i le galuega,

Afioga Hon LAAULI POLATAIVAO LEUATEA: Malie lau Afioga i se upu ua laavale...

FOFOGA FETALAI: E i ai le manatu e le tatau ona tupu lena mea.

Afioga Hon LAAULI POLATAIVAO LEUATEA: Se upu ua laavale, ia faafoi mai ia Laauli. Malie Toleafoa, o le a ni lagona ma ni manatu ua avatu, ia faamalie foi i le faafofogaaga a lo tatou atunuu, aemaise le faafofoga mai a si ou itumalo, leaga e le taugofie mo au nei.

FOFOGA FETALAI: Ia, faafetai.

Afioga Hon LAAULI POLATAIVAO LEUATEA: Ioe, faapea foi le faafofogaaga a lo tatou Palemene, le tatou Vaega Faaupufai, ia o alofa na o alofa nei. Faafetai ia te outou na outou manatu ia te au. Faamagalo foi ia latou o fai au ma o latou fili.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Ia faamalulu atu i lau Afioga.

Afioga Hon LAAULI POLATAIVAO LEUATEA: Ia avatu pea ia te outou, ae malie lau Afioga Toleafoa, o le a foi Sina i Futu.

FOFOGA FETALAI: Ia faafetai.

Afioga Hon LAAULI POLATAIVAO LEUATEA: Tapuaiga a Samoa, o le a ou alu e fai le mea lea i gatai. A uma, I will be back.

FOFOGA FETALAI: Faafetai, faamoemoe i le Atua.

Afioga Hon LAAULI POLATAIVAO LEUATEA: Faafetai. Manuia le Fono.

FOFOGA FETALAI: E leai se mea e faigata i le Atua, faamoemoe i le Atua. Ia malo faafetai i le manatu mai i le taumafai atu a le nofoa, leaga o le ta galuega sa e seei ai foi i futia ua sola. Ona i ai lea o le manatu, e faapena ona e manatu mai i lou uso, ui i lea, ia malo faafetai.

Ou te faamalulu atu i le matau mai a le Palemene e tusa ai o lenei afiafi, leai o tatou e faapena. O le faamaoni e pei na outou faafofoga i ai, i le tolaulauina o Tulafono o le loto faamaoni e pei ona faatautoina ai le sui usufono o Faasaleleaga Nu.2, ia e faapena, e faatino ia le tatou galuega, i le agaga ma le faamaoni.

Ia ona i ai lea o le manatu, ou te faamalulu atu i lau faafofoga tapuai mai Samoa, ia o uiga ia o Taitai o le atunuu. O fea lava e tetele i ai Pesega, ia ae matua lava i nuu lelei. Ia e lelei foi ona saili i lalo, ia aua o le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: Lau Afioga i le Fofoga Fetalai...

FOFOGA FETALAI: Ia...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui: E le tatau ona po le aso o ita pea. E pau lava le mea ua ou tulai atu ai, faamalulu atu i le sui usufono ua ou faamagaloina foi ia ni faaletonu. Ua leva foi na ou faatalitali po o afea e ono sau ai ma te talanoa, talu mai le fonotaga talu ai e le i oo mai lava.

Ia Laauli e i ai se taimi ona e susu mai lea ta talanoa ma inu se ta coffee, ae ua ou faamagaloina foi ia te oe. Ia faauma ai lea mea i lenei po.

18 IUNI 2019

**Tulafono Tau Faaofi o le Faatatauina o Tupe Faaopoopo (Nu.2) 2018/2019 &
Tulafono Tau Faaofi o le Faatatauina o Tupe 2019/2020
– felafolafoaiga i luga o le faitauga faalua**

FOFOGA FETALAI: Ia e faapena, e faapena uiga o le soifuaga lea tatou te i ai. E pei ona matou fai atu e leai se gaumatau na o le gaualofa, ia ae o le feutagai, o le mea sili lena ma taua. Ioe e i ai avanoa, e tele taimi o le tagata ae itiiti lava taimi o le Alii. Ia ona faapena lea ona suiga malie. O a ni eseesega, e faigofie lava, e faigofie i le Atua ona fofa faafitauli.

O le mea la lea, o le matou tala lea ma le agaga faaaloalo. Ia talu ai...

Afioga Hon LAAULI POLATAIVAO LEUATEA: Ia, ua ou toe tulai atu lava ona ou te le manao ou te folomolemoleina le faaaloalo i le Afioga i le Palemia, ia e talia, talia ma le agaga faaaloalo, ona o au nei o le tagata malamalama. Ia ae se i uma lau mea lea i le vaiaso fou, then Iðl be back. Iðl be back and have a coffee with him. Manuia le Fono.

FOFOGA FETALAI: Faafetai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: E faaiu ai lava i le mea lea, se Peseta, a mafai ona oulua faalelei, ia ua manuia uma tatou. O au foi na ou nofo sauni e faalelei le lua misa, ae lea ua te i ua lavea atu ai fua i lua mea. Ia ae afai lava ua oulua mananao e settle i tua le lua mataupu, ia tatou talatalanoa. Ia ae o le mataupu la lena, e leai la sau feau i le Loia Sili. Ae o le tatou lava va ia, e leai se mea o afaina.

FOFOGA FETALAI: Ia, *‘e a ulu tafega ae selefutia Vaisigano’*. E a oulua mea ae afaina ai le toeaina. Se o oulua se, ae... ia o uma e vaai e tootutuli i luma o le toeaina ma faatoese i le toeaina, matua oulua leaga tele.

Ia tulou e sala le gagana vaeatu le faafofoga tapuai mai a Samoa, ia o uiga ia o le soifuaga. Ia ae faapena, o le matua alofa, ia o lea ua saunoa atu le Palemia ma le Taitai o le Malo. Maua avanoa, o e toe feutagai, faapena, ona i ai lea o le manatu o lea foi ua ave se upu e faamalulu ai foi i le tapuaiga a Samoa, ia o uiga ia o le soifuaga tatou te i ai. E i ai taimi e maninoa ai mea sa nenefu i le tofu lava o le tagata ia ma lona mafaufau e faatino ai lona lagona, manatu lava ia na o ia. Ia ae a soalaupule, ia o i ina e maua ai matagofie e tusa ai o le finagalo o le Alii.

Ia ona o lea ua tatou taunuu i le taimi e muta ai ia le tatou galuega i lenei aso, ia ona i ai lea o le manatu, ae tatou te le i tolopo, o le a faaiuina ia le tatou fonotaga i se tatalo. Ou te tapa ma le faaaloalo le sui usufono mo Falelatai ma Samatau, Susuga i le Aoa Fesoasoani, ia e tulai mai e faaiu ia le tatou Fonotaga i se tatalo.

Na tolopo Taualumaga a le Fono Aoa Faitulafono i le itula e 7:15 i le po seia aulia le itula e 9:00 i le taeao o le Aso Lulu, 19 Iuni 2019.